

**NATIONAL ASSEMBLY OF  
SEYCHELLES**

*Tuesday 4<sup>th</sup> July, 2023*

*The Assembly met at 9am*

*National Anthem*

*Moment of Reflection*

*Mr Deputy Speaker in the Chair*

**MR DEPUTY SPEAKER**

Bonzour tou Manm Onorab, tou *staff* Sekretarya, piblik ki pe ekout nou. E nou ava dir en bonzour spesyal, bann envite ki avek nou ozordi, en vizit ki'n organize par Onorab Naddy Zialor pour bann dimoun avek abilite spesyal ki avek nou ozordi. *Welcome to the National Assembly* e mon swete ki zot kapab pas en moman agreab avek nou pour sa Mardi le 4 Zilyet, ki osi *Independence Day* Leta-z-Ini.

Donk lo non Lasanble Nasyonal, nou dir felisitasyon nou bann koleg, zanmi Ameriken pour zot *Independence Day* ozordi.

Nou pour *proceed* avek nou *Order Paper* ozordi, ki ava dominan par *question time* enkli *PNQ* e apre i annan Mosyon. Donk nou pour bouz lo premye

*item PNQ* e mon ava demann madanm raporter pour kriy bann zofisye, ki pour avek n ou bomaten. Mersi.

Mon ava swet labyenveni *panel* ki fek zwenn nou pour *Private Notice Question* e *panel* i dirize par Minis pour Finans Planifikasyon Nasyonal e Komers Mr Naddy Hassan, i akonpanyen par *Comptroller General* manmzel Astride Tamatave e *Deputy Controller General* Mr Jude Commettant. *Welcome*, e mon ava pas laparol avek *Leader* Lopozisyon pour son *PNQ*.

**HON SEBASTIEN PILLAY**

Mersi Mr Speaker. Bonzour Mr Speaker e bonzour nou bann envite ki dan Galeri. Byenveni dan Lasanble Nasyonal. Bonzour tou koleg Onorab e bonzour tou dimoun ki a lekout e bonzour Minis avek ou *panel*.

Mr Speaker avan mon demann mon kestyon, mon le zis met a ou latansyon ki mon'n vwar en let, en kominike pe sirkile par Otizm Sesel, ki fer referans avek serten term derogatwar ki'n ganny servi dan en odyo.

Mon le zwenn avek Otizm Sesel pour kondann okenn kalite langaz ki dekrir okenn dimoun dan okenn fason ki pa anliny avek latolerans e

konpasyon, ki nou annan koman en sosyete.

Mon'n ganny sans ekout sa odyo e mon trouve ki sa bann kalite komantr i pa akseptab. E i tre derogatwar, menm si en komantr vize ver en lot dimoun ki travay pour nou. E mon demann Lasanble pour kondann sa bann kalite langaz, e mon demann ek lotorite konsernen pour pran aksyon imedyata avek sa bann kalite konportman, pour asire ki sirtou si i annan pour fer avek lansennyman e zanfan; ki sa bann komantr napa plas dan en lekoul oubyen en landrwa kot zanfan i sipoze pe ganny formen. Mersi Mr Speaker.

Mon kestyon pour Minis i lir koumsa:-

Eski Minis i kapab enform sa Lasanble konbyen *Suspense Account* Gouvernman i annan, e konbyen larzan an total i annan dan sak kont e ki aktivite ki pe ganny finanse atraver larzan dan sa bann kont? Mersi Mr Speaker.

### **MR DEPUTY SPEAKER**

Mersi Onorab. Minis larepons.

### **MINISTER NAADIR HASSAN**

Mersi Mr Speaker. Bonzour Mr Speaker. Bonzour Dirizan Lopoziyon. Bonzour tou bann Manm Onorab e bonzour tou

dimoun a lekout. Onorab mersi pour ou kestyon. Mr Speaker a lafen Zen 2023, i annan an tou 152 *Suspense Account*, pour en valer R409milyon 925mil 228.63sou.

Mr Speaker i annan 2 kategori prensipal pour *Suspense Account*, enn i pour proze spesifik, e lot sa ki nou apel, "*Trading and Operating*" pour bann antite ki fer reveni en legzanp se parey *SBC* e *SLTA*.

Pour proze spesifik sa i enkli par egzanp renovasyon Lekol Belonie, sant renovasyon batiman pour Zidisyer, parey parmi lezot. Mr Speaker anvi ki pour napa ase letan, pour pas an detay lo tou bann kont, nou pour donn en lalis avek Lasanble ek tou detay al lo sa 152 kont. Mersi Mr Speaker.

### **MR DEPUTY SPEAKER**

Mersi Minis. Donk prezan mon'n vwar i annan bann Manm ki'n endike zot le demann siplemant lo kestyon. Onorab Zialor?

### **HON NADDY ZIALOR**

Mersi Mr Speaker. Avek ou permisyon, mon ti a kontan ankor enn fwa swet labyenveni tou mon bann koleg ek zanmi ki pe viv avek en dezabilite de lapar lasosyasyon. Mon a profite pour fer en mansyon

spesyal pour de dimoun ki'n fer Sesel fyer, ki prezan dan lasal avek nou, sa se Mr Jean Marc De Silva e Mr Richard Sophola ki aport meday lor pour Sesel dan *Special Olympic*.

**(APPLAUSE)**

**HON NADDY ZIALOR**

Alors zot tou ki prezan, zot tou ki la, i en plezir pour avek nou e mon swete zot pas en letan agreab.

Mon kestyon siplemanter Minister i koumsa:-

Eski Minis i kapab konfirman si serten sa bann *Suspense Account* in la depi plizyer lannen? E ki a ler aktyel i annan en travay ki pe ganny fer, pour konn lorizin tou sa bann kont e rezon spesifik ki zot in ganny kree?

E an plis ki sa, eski Minis i pare pour annan en dyalog konsiltasyon e zwenn avek *FPAC* par egzantp dan letan *recess* pour regard sa dosye en pti pe pli o profon? E sa i ava ede pour anmenn plis latransparans lo sa size. Mersi Mr Speaker.

**MR DEPUTY SPEAKER**

Mersi Onorab. Minis larepons.

**MINISTER NAADIR HASSAN**

Mersi Mr Speaker. Mersi Onorab pour ou kestyon. Wi Onorab, dan sa 152 *account* i annan bokou, bokou kont ki'n la pour plizyer lannen e bann *staff* anba gidans Ms Tamatave pe fer en travay ki *ongoing*, pour *clean up* tou sa bann kont. Nou bezwen get son bann lorizin e tousala i annan en kantite louvraz ki pe ganny fer pour *clean up* sa bann *Suspense Account*, i en gro louvraz ki bann *staff* pe fer. So larepons ou kestyon wi. Lo dezyenm bout nou toultan pare pour antreprann en diskisyon lo sa avek bann Manm. Mersi.

**MR DEPUTY SPEAKER**

Mersi Minister. Onorab Cosgrow.

**HON WALLACE COSGROW**

Mersi Mr Speaker. Bonzour Mr Speaker. Bonzour Minis avek ou *panel*. Bonzour tou Manm e en bonzour spesyal pour tou bann envite anler dan Galeri. Mr Speaker mon'n ekout avek latansyon bomaten ler Minis i dir nou i annan 152 *Suspense Account*.

*Now*, si nou mazin byen letan ki Prezidan, sa letan Onorab Ramkalawan ki ti dan Lasanble Nasyonal, i ti enn bann dimoun ki ti koz fortman lo sa zafer *Suspense Account*, e

i ti met en pake presyon lo Gouvernman avan, pour ferm bann *Suspense Account*.

Me ozordi Mr Speaker 2023, lafen Zen 2023 i annan 152 *Suspense Account* anba direksyon Minis e Prezidan. Mon ti a kontan demann Minis, be kwa ki'n sanze dan panse - *thinking* Prezidan ozordi ki a en serten moman i ti dir nou ferm tou sa bann *Suspense Account* e ki ozordi nou annan 152. E mwan mon konnen poudir en pe - pandan letan Gouvernman avan ti annan en bon pe travay ki ti'n ganny fer pour ferm en bon pe sa bann *Suspense Account*, pour fer tou pas anba *Treasury Single Accounts* si mon pa tronpe.

E si Minis i kapab dir nou kwa egzakteman la ozordi ki zot pe tenir anba sa *Suspense Account* menm si pa ava al an detay? Pour ki rezon ki zot pe kit sa bann *Suspense Account*? E anvi ki nou, nou vot Bidze per *head* e depans i sipoze anba sa bann laliny Bidze. Mersi bokou Mr Speaker.

### **MR DEPUTY SPEAKER**

Mersi Onorab pour ou kestyon, ki dayer nou bezwen rod bann fe e *press for action*. *I'm not so sure* si Minis i kapab dir ki Prezidan pe panse? Pou premye

kestyon, me selman sey debourye Minis.

### **MINISTER NAADIR HASSAN**

Mersi Mr Speaker. Mersi Onorab pour ou kestyon. Larepons ou kestyon i ase senp Onorab, ler nou pe koz lo *Suspense Account ok*, parey mon'n dir i annan 2 *Suspense Account*.

I annan bann ki annan pou fer avek bann proze spesifik, kot proze in komanse dan en lannen, *ok* e sa proze i *spillover into the subsequent year* e sa larzan ki'n ganny bidzete, sa i ganny met dan en *Suspense Account*, pour kontinyen fer sa depans *the subsequent year*.

Dezyenm, i annan bann *Suspense Account* ki nou apel sa bann "*Operating and Trading Accounts*", se bann antite ki annan en, i osi annan en lobzektif komersyal e larzan ki zot fer i al dan sa bann kont, sa i normal, larzan ki antre pour sa bann antite i al lo sa kont.

Trwazyenm, i annan sa ki nou apel bann "*legacy issues*", *ok*. I annan plizyer, plizyer kont ki'n ouver dan plizyer lannen lepase, e sa i bann kont ki pa kler akoz in ganny ouver, e sanmenm sa ki annan sa legzersis ki bann *staff* pe fer, pour regard tou sa bann kont, *close* sa bann *account* mon ava

- avek ou permisyon Mr Speaker - apre mon a demann Ms Tamatave pour donn plis lenformasyon lo ki kantite *Suspense Account* ki'n ganny fermen an 2021/2022 pe ganny fermen.

Lo kote kestyon ki Polisi sa Gouvernman? Sa osi i en repons kler Onorab, se ler nou annan *Suspense Account*, premyerman nou bezwen kler lo akoz sa *Suspense Account* i egziste?

E bann paramet ki nou pe met an plas pour en kont kapab al dan *Suspense Account* fodre ki proze in fini komanse, ouswa i pe al komanse vreman, vreman vitman.

Dezyenm, ki proze pour fini dan sa *subsequent year*, sa larzan pour ganny servi *within 6 months*, par egzanp. So tousala i vin en *framework around* ki mannyer nou zer *Suspense Account*.

Savedir ki mon pe dir la se, nou bezwen en *framework* pli organize avek plis kontrol, lo otour *the use of Suspense Account*. So-

E menm dan nou Lalwa *PFM*, sa osi i annan bann lamannman pour anmennen se met plis lord, ki pa'n egziste lepase, *around the use of Suspense Account*. Mersi.

### **MR DEPUTY SPEAKER**

Mersi Minister. Manmzel Tamatave pour donn leksplikasyon lo bann ki'n ganny fermen? 21,22.

### **COMPTROLLER GENERAL ASTRIDE TAMATAVE**

Mersi Mr Chair. Bonzour Mr Chair. Bonzour tou Manm Onorab. Onorab parey Minis in dir, *over the years* in annan legzersis ki'n kontinyelman ganny fer dan netway bann *Suspense Account*.

Par egzanp si mon kapab an 2020, nou ti frenm 9 *Suspense Account*; an 2021 nou ti frenm 52 *Suspense Account*, e an 2022 nou'n frenm 19 *Suspense Account*.

E sa legzersis i kontinyel, par egzanp *even* dan sa lalis 152 ki nou annan ozordi, i annan ki letan nou pe fer *the exercise*, in montre ki nou pour bezwen fermen, akoz larzan pe zis *brought down year in, year out*, e nou napa sa lenformasyon petet lo *the purpose of the Suspense Account*.

Me selman zis pour mwan azoute parey Minis pe dir, *currently* letan nou pe ouver tou *Suspense Account*, sirtou bann ki *Trading and Operative account*, nou fer sir ki i annan en *TOR*.

E dan sa TOR i spesifikman dir ki larzan ki sipoze antre dan sa *Suspense Account* e kalite depans ki otorize pour ganny fer dan sa bann *Suspense Account*. Sa i pour bann ki *Trading and Operating* e bann ki pour bann proze spesifik, lo son let letan nou aprouve i annan en let ki nou *issue*, lo son let i mete spesifikman *the purpose of* sa *suspense* e ki dele letan i annan pour sa Minister depans sa larzan. Mersi.

**MR DEPUTY SPEAKER**

Ou annan klarifikasyon?

**HON WALLACE COSGROW**

Mersi Mr Speaker. Zis enn pti klarifikasyon anvi ki Ms Tamatave in koz lo kantite ki'n fermen. Si nou kapab ganny enn pti lenformasyon lo kantite ki'n ouver depi 2020 ziske 2023? Mersi. Nouvo.

**MR DEPUTY SPEAKER**

Eski i annan sa lenformasyon?

**COMPTROLLER GENERAL  
ASTRIDE TAMATAVE**

Mersi Mr Chair. Mr Chair pour 2020 ziske 2023, nou pour napa lalis ouver, me selman nou kapab donner me pour lannen pase, 2022 nou ti ouver lavalier en total R143milyon of

*Suspense Account*, lannen pase. Mersi.

**MR DEPUTY SPEAKER**

Mersi. Prosen lo lalis Onorab Lemiel.

**HON SYLVANNE LEMIEL**

Mersi Mr Speaker. Bonzour Minis avek ou delegasyon, tou nou bann envite anler dan Galeri. Mon bann koleg, Manm Onorab e tou dimoun ki a lekout.

Minis premyerman enn mon ti a kontan konnen petet an tou dan sa bann *Suspense Account*, eski zot annan sonm an tou konbyen larzan i annan ladan? Zot ti ferm 52 an 2021, 19 - 2022, konbyen larzan an tou sa nou'n gannyen? E sa bann larzan ki zot pran dan sa *Suspense Account* kote i retournen? Mersi.

**MR DEPUTY SPEAKER**

Mersi Onorab. *Panel?*

**MINISTER NAADIR HASSAN**

Mersi Mr Speaker. Mersi Onorab pour kestyon. Mr Speaker avek ou permisyon mon a pas laparol avek Ms Tamatave ki i a donn sa bann detay sa bann sif ki Onorab in donner. Mersi.

**MR DEPUTY SPEAKER**

Mersi Minis. Manmzel Tamatave?

**COMPTROLLER GENERAL  
ASTRIDE TAMATAVE**

Mersi Mr Chair. Mr Chair *Suspense Account* laplipar zot *usually* larzan i sorti - i annan bann *unspent* larzan in ganny tire dan Bidze, par egzantp i ganny mete dan *Suspense Account*. Sa i enn, e apre i annan bann *suspense* ki dan *Trading and Operating* ki sa i ganny zere par sa antite konsernen. E *over the years* nou'n vwar kot sa loperasyon in ganny antre dan Bidze, kot reveni in antre koman dan *consolidated revenue* e depans osi i ganny osi *accounted for* dan - kote zot depans.

So sa i bann ki dan legzersis nou frenmen. so bann-

An prensip tou lede sa larzan i larzan Leta e letan nou frenmen sa larzan i al dan en Kod ki nou apel li en *General Revenue Balance*. Nou apel li *GRB* kot Trezor, i zis en Kod kot nou transfer sa larzan, pour nou kapab *close* sa bann *Suspense Account*.

E laplipar kont ki nou'n fermen *over the years*, i bann kont ki ti napa larzan ladan. Me selman i ti zis la, anpandan e napa tranzaksyon.

Par egzantp an 2020 dan sa 9 ki nou'n fermen, son total ti pour en lavaler R9.9milyon. An 2021 sa ki nou'n frenmen an total i en valer R366.6milyon, e an 2022 sa ki nou'n fermen ti pour en total R904.8milyon. Mersi Mr Chair.

**MR DEPUTY SPEAKER**

Mersi manmzel Tamatave. Prosen lo lalis i Onorab Gill.

**HON CHURCHILL GILL**

Mersi Mr Speaker. Bonzour Minis. Bonzour tou Manm e tou dimoun dan Galeri. Mon premye kestyon se tou sa bann *Suspense Account* mannyer nou'n ganny eksplike se larzan ki nou vot Bidze; en legzantp par egzantp nou ti vot Bidze 2023, prezan i annan serten larzan ki'n al dan *special project* dan *Suspense Account*, oubyen *specific project*.

Me selman ler nou reganny, Bidze par egzantp la pour lannen 2024, nou pa gannyen en lalis lo *Suspense Account* kantite larzan ki pe ganny *carry forward*.

Me selman sa bann Bidze ti ganny aprouve par nou. So i montre poudir i annan en *lapse* la kot *at least* pour lenformasyon sa ti devret la, prezan Manm Lasanble i a konnen be sa kantite larzan

pa'n depanse alors Minis selman in met dan nou latansyon, in atase deryer, ler i pe fer son prezantasyon Bidze, en mannyer nou a konnen i annan serten kantite letan. Eski sa i en keksoz ki de lavan Minis i posib pour fer?

Mon dezyenm kestyon sa bann *Suspense Account* mon mazine tou lotorizasyon i sorti kot Minister Finans e mon vwar li en pe difisil ki mannyer nou pa konnen ki mannyer zot in ganny ouver, oubyen ki pour rezondet, si tou lotorizasyon i sorti kot Minister Finans?

Apré mon trwazyenm kestyon, pour *Trade* ou'n dir nou poudir, zot, zot annan zot prop *Suspense Account*.

Akoz ki *trade* son bann reveni ki i anmase i pa al direk dan *consolidated* parey lezot? Petet donn nou en leksplikasyon kekfwa i annan son rezon me selman donn nou son leksplikasyon?

Apré dernyen lekel ki donn lotorizasyon *signatory* lo sa bann *Suspense Account* - i sa bann *MDA* zot menm oubyen tou *authorized signatory* kot Minis Finans? Mersi.

#### **MR DEPUTY SPEAKER**

Mersi Onorab. I annan 4 pwen. *Panel?*

#### **MINISTER NAADIR HASSAN**

Mersi Mr Speaker. Mersi Onorab pour ou kestyon. Onorab mon a reponn premye kestyon, apre mon a pas laparol ek Ms Tamatave pour detay lo, detay spesifik lo sa bann *query*.

Lo premye kestyon, *list of Suspense Account*, mon pa vwar en problem ki lafen lannen, nou kapab soumet avek Lasanble en lalis of bann *Suspense Account* ki pour *carry forward* pour bann proze. Mon a pas laparol ek Ms Tamatave. Mersi.

#### **MR DEPUTY SPEAKER**

Mersi. Manmzel Tamatave?

#### **COMPTROLLER GENERAL ASTRIDE TAMATAVE**

Mersi Mr Chair. Mr Speaker. Tou lotorizasyon *Suspense Account* parey Onorab Gill in mansyonnen, i lotorizasyon i sorti kot Minister Finans. *Suspense Account* i ganny zere par bann Minister spesifik.

Par egzanp si en *Suspense Account* i dan *SLTA* par egzanp, pour son *trading operating account* se *the accounting officer* kot *SLTA* ki *operate the Suspense Account*, so i pa pe ganny kontrole par Minister Finans me selman, tou peyman i pas par Trezor e nou, nou annan en rol *oversight* pour nou



zwe lo sa *Suspense Account*, ki *part of* nou legzersis tou le lannen or tou le *half a year*, nou get mouvman dan sa bann *Suspense Account*.

E nou osi annan legzersis kot nou gete si *the Suspense Account is being used for the purpose of it*. Petet zis pour mwan koriz Onorab i pa Departman *Trade* ki annan en *Suspense Account* spesifikman.

Dan *Suspense*, i en kategori i *Trading and Operating*. Nou annan detrwa Minister ki annan bann *Trading and Operating Account*, i bann kot bann tranzaksyon i pas anba la. Par egzanp *SLTA*, parey nou konnen *SLTA* i fer bann *private works as part of* son manda e reveni ki antre dan *consolidated revenue* en poursantaz ladan i al dan sa *Trading and Operating Account*. E *SLTA* i fer bann depans spesifikman anver bann proze prive.

*SBC* osi *as part of* son manda, *SBC* i fer *advert* e reveni ki kolekte *from* son bann *advert*, i al dan son *Suspense Account* e dan son *suspense* i pas depans relye avek son loperasyon, par egzanp bann *local production*, even peyman bann *part-timers'* par ler, so i annan zot bann depans ki zot

fer anba zot bann *trading and operating*.

*So as part of* nou legzersis nou bezwen kategoriz nou bann *Suspense Account* osi Mr Chair. Par egzanp pour lemoman nou annan nou bann *Economic Code* i preski *similar*. Nou - dan nou legzersis nou bezwen kategoriz lekel *suspense*, ki *trading and operating*? Lekel bann ki pour en proze spesifik? E nou annan bann *Suspense Account* par egzanp konmela ki parey en *control account* si mon kapab met li koumsa.

Par egzanp nou annan *Environmental Trust Fund*, en legzanp ki larzan ki antre i la dan sa *Suspense Account* i annan bann proze anver manda *ETF* i ganny depanse anba sa *Suspense Account*. Par egzanp larzan ki antre - ki bann anba *Travizory* ki al anba ki pey *ETF contribution*, i al dan sa *Suspense Account*. Zis pour mwan donn en pe legzanp, bann diferan kalite *Suspense*. Mersi.

### **MR DEPUTY SPEAKER**

Mersi. Manmzel Tamatave ou telman abitye vin dan *Committee Stage Bidze*, prezan ou annan sa manni “Mr Chair”, nou konpran ou. Onorab Gill.

### **HON CHURCHILL GILL**

Mersi Mr Chair. I annan enn ki pa'n donn mwan larepons. Bann - Mr Speaker *sorry* - bann - i annan enn ki pa'n donn mwan larepons se bann *signatories*. Eski bann *signatories* i kot sa bann MDA ki annan sa oubyen i kot Minister Finans? Mersi.

**MR DEPUTY SPEAKER**

Mersi. I annan en klarifikasyon lo *signatory*. *Authorized signatories*.

**COMPTROLLER GENERAL  
ASTRIDE TAMATAVE**

*Authorized signatories* Mr Speaker i sa Minister spesifik. Mersi.

**MR DEPUTY SPEAKER**

Son *accounting officer*.

**COMPTROLLER GENERAL  
ASTRIDE TAMATAVE**

Sa *accounting officer* dan sa Minister. Yes.

**MR DEPUTY SPEAKER**

Mersi. Onorab Lemiel nou'n ganny en lasirans mon swete ou'n note. Prosen enterven an lo mon lalis i Onorab Terence Mondon.

**HON TERENCE MONDON**

Mersi Mr Speaker. Bonzour Minis avek ou lekip. Mon

kestyon, premye kestyon. Eski Minis i kapab dir nou si sa bann *Suspense Account* i ganny odite par Oditer Zeneral tou le-z-an? Dezyenman i annan sa kategori "*Legacy*", ki annan bann *issue* avek, konbyen *accounts* ki tonm dan sa kategori? E ki defi ki zot pe fer fas avek pour zot kapab konplet sa legzersis dan en dele letan rezonnab? Mersi.

**MR DEPUTY SPEAKER**

Mersi Onorab. Mon'n note trwa pwen.

**MINISTER NAADIR HASSAN**

Mersi Mr Speaker. Mersi Onorab pour ou kestyon. Lo premye kestyon wi, *as part of the normal audit work of The Auditor General* i kouver *Suspense Account*. Lo kote dezyenm kestyon kantite kont? Si ou ti kapab zis kekfwa mon'n mank en pe plis detay.

**HON TERENCE MONDON**

Konbyen *accounts* ki tonm dan sa kategori kot i annan sa "*legacy issues*", ki ou'n mansyonnen? Mersi.

**MINISTER NAADIR HASSAN**

Onorab. Lenformasyon mon gannyen avek Kontroler Zeneral se ki nou abandonn zot, ler nou donn zot sa lalis i ava detaye ki

kantite ki bann, nou apel sa bann *legacy issues*.

Lo kote ki bann *challenge* spesifik, an vi ki Kontroler Zeneral avek son tim ki pe fer sa legzersis, kekfwa mon a les laparol pour li eksplik en pe bann *challenges* ki zot pe, *face* avek. Mersi.

**MR DEPUTY SPEAKER**

Mersi Minister. Manmzel Tamatave?

**COMPTROLLER GENERAL  
ASTRIDE TAMATAVE**

Mersi Mr Speaker. Mr Speaker tou le-z-an letan Oditer Zeneral i fer son rapor. Nou pour konstate i annan en lalis e i annan en seksyon kot i ekrir lo *Trading and Operating Account* e zot spesifikman mansyonn *the least of Suspense Account*, zot mete deryer sa bann *Suspense Account*.

Tou le-z-an nou, nou anvoy *email* kot bann Minister pour nou demann zot ki zot pe al fer avek sa larzan e dan ki dele letan ki zot ekspekte depans sa larzan. Problenm ki nou pe gannyen i annan bann sanzman ki'n arive dan bann antite piblik e sa *historical information along the way* petet, in ganny perdi.

Kot mon pe *mean* in perdi *in terms of historical memory*,

kekfwa dimoun pa pe mazinen *for what purpose* sa larzan ti'n ganny mete la e i kapab sa proze spesifik in fini, i reste en balans, ou vwar sa balans i reste anpandan.

Kan sa proze i fini, sa balans i devret pe fermen e nou *move away from that suspense*.

So sa i bann *challenge* ki nou pe rankontre. I annan lenformasyon ki nou pe rode avek bann Minister ki nou pa pe resevwar *timely*, me selman *as sort of* nou legzersis nou Minister Finans nou bezwen pran en desizyon lo la.

So si en *suspense* in la pour 5an en legzanp, *without any movement* savedir sa larzan pa - pa neserer! Sa larzan pa bezwen la, so nou bezwen fer en desizyon pour nou frenm sa bann kont koumsa. So nou annan ki *dormant* pour 5an par egzanp. Mersi.

**MR DEPUTY SPEAKER**

Lo sa pwen avan nou al pli lwen. Me eski i annan en *time limit* ki zot pour dir *ok* 5an nou fermen? Nou pa pour les li al 6an, nou pa pour les li. Eski i annan en *time limit* ki zot pour a sertennman fermen? Non lo sa pwen.

**COMPTROLLER GENERAL  
ASTRIDE TAMATAVE**

Mersi Mr Speaker. Mr Speaker *as part of sa framework* ki nou pour met an plas pour *Suspense Account*, definitivman nou pour bezwen met en *time limit*. E par egzantp *currently* letan nou ekrir let nou dir Minister i annan 6 mwan pou depanse.

E nou *monitor*, i annan ki fer zefor pour depanse, e zot rankontre bann *challenge* par egzantp *Procurement* bann lezot *challenge* ki i anpes zot fini depans sa larzan.

Me nou pour bezwen fer rantre *as part of PFM Framework* letan nou fer revizyon pour nou *meet* sa dele letan pour nou kapab *build in*, *instill* sa disiplin *when it comes to Suspense Account*. Mersi.

### **MR DEPUTY SPEAKER**

Mersi. Prosenman lo lalis Onorab Aglae.

### **HON EGBERT AGLAE**

Mersi Mr Speaker. Bonzour Minis avek ou *panel*. Swivan larepons ki Ms Tamatave in donnen konsern *timeline*, mon ti a kontan eklersi nou Lasanble premyerman sirtou kot i konsern *project specific*, *ok?* Par egzantp nou vote dan Bidze pour bann diferan antite, mon pran en legzanp parey Minister

Lasante. *Ok* lanons in ganny fer pour aste *MRI*, 50milyon.

Eski sa larzan definitivman i al dan en *Suspense Account* li ouswa i ankor la? Akoz i annan serten mansyon la, ki pour ganny donasyon, so ki pour arive la? Sa i enn.

Dezyenman dan rapor Oditer Zeneral i fer mansyon *Trading and Operating Accounts* parey ou'n dir, me i pa fer mansyon okenn lodit kot i konsern *project specific* dan sa bann departman.

Ki mannyer sa bann lodit pour fer pour dir ki sa larzan pe ganny depanse *according to what is budgeted?* Sa –

E dernyen dan sa 52-*Suspense Account*, ki ou'n mansyonnen ladan. Konbyen ladan petet ki *project specific?* Mersi.

### **MINISTER NAADIR HASSAN**

Mersi Mr Speaker. Mersi Onorab pour ou kestyon. Lo ou premye kestyon *project specific* parey ou'n donn legzanp *MRI* wi, zot in fer provizyon pou *MRI*, me apre ki nou ti pour ganny en, nou pour ganny en don, pour *MRI* so otomatikman nou'n fer – so nou pa'n aprouve pour *carry forward* sa larzan dan *Suspense Account*.

So napa en *Suspense Account for MRI* akoz, son bi ki ti pour *fund* dan *MRI* in fini ganny ranplase akoz nou pour ganny en don pour *MRI*.

Lo kote dezyenm keston mon ava pas ek Ms Tamatave pour eksplik la diferans ant *auditor lo operating account e project specific*. Mersi.

**MR DEPUTY SPEAKER**

Mersi Minister. Manmzel Tamatave?

**COMPTROLLER GENERAL ASTRIDE TAMATAVE**

Mersi Mr Speaker. Oditer Zeneral letan i fer odit kont Gouvernman i fer odit dan son totalite. Savedir letan i pour pran Minister Finans par egzanp, i sipoze pe get tou bann vot, ki annan anba Minister Finans. Sa i ava enkli son vot bidzeter, okenn *grants* ki anba Minister Finans e okenn *Suspense Account* ki anba Minister Finans.

E parey nou konnen Oditer Zeneral i fer *sampling* letan i fer odit, so i pa nesese ki i pour tous, tou sa bann *Suspense Account* letan i pe fer lodit kot en Minister respektif. Me - *but as part of* zot lodit, zot pran *the whole listing* pour sa

Minister. So zot fer odit pour bann *Suspense Account*.

E *as part of* zot odit, tou le-z-an nou Minister Finans nou bezwen *provide* Oditer Zeneral tou nouvo let ki nou'n *issue* pour louvertir nouvo *Suspense Account*. Tou *Terms of Reference* ki nou'n agree pour bann *Trading and Operating Account*, so tou le-z-an nou donn Oditer Zeneral tou let e tou *TOR*.

*In regards* pour sa lalis 152 *account* an 2023 - sa 152, *in terms of* proze spesifik nou annan, nou annan - Mr Speaker mon a - Mr Speaker mon a rod sa lenformasyon e ....

**MR DEPUTY SPEAKER**

Ou ava retourn lo la apre...

**COMPTROLLER GENERAL ASTRIDE TAMATAVE**

... mon retourn lo la wi silvouple. Mersi.

**MR DEPUTY SPEAKER**

Ou bezwen zwe avek sa *Excel*. So nou ava pas lo lot entervenans Onorab Conrad Gabriel.

**HON CONRAD GABRIEL**

Mersi Mr Speaker. Bonzour tou dimoun espesyalman bann atlet, bann dimoun dezabilite avek mwen enkapab. Mersi tou

bann Manm Lasanble. Minis mon ti a kontan lo ou proze spesifik Pointe Larue ki annan sa proze Nageon Estate *Redevelopment Plan*.

*So basically*, nou ti annan 2.5 ki ti ganny met 2022, *phase 1- 7.3, phase 2* e la 2023, nou'n ganny met nou ti ganny 5.7milyon. Eski ou kapab donn ou garanti zabitan Pointe Larue si tou sa larzan ki'n ganny mete dan sa *Suspense Account*, i la aktyelman, vi ki proze pa ankor demare apre 6mwan, la pour sa lannen? Mersi.

#### **MR DEPUTY SPEAKER**

Mersi Onorab. Eski *panel* i annan sa *breakdown*, lefet ki *Deputy Controller General* ki ansarz tou bann zafer proze mon mazinèn?

#### **MINISTER NAADIR HASSAN**

Mersi Mr Speaker. Mersi Onorab pour ou kestyon. Mon ti ava demann Kontroler Zeneral pour klarifye sa *issue*, lo kote sa proze Nageon Estate. Mersi.

#### **COMPTROLLER GENERAL ASTRIDE TAMATAVE**

Mersi Mr Speaker. Mr Speaker nou napa en proze Nageon Estate dan *Suspense Account currently*. Sa ki Onorab pe fer referans avek i *PSIP*. Akoz in mansyonn 2023, 24, ek 25. So

sa i dan Bidze so Bidze i pa *Suspense Account*. Sa ki dan *Suspense Account*, i pa dan Bidze. *In terms of* - si mon kapab retourn *back* lo kestyon Onorab Aglae Mr Speaker.

#### **MR DEPUTY SPEAKER**

Aglae. Wi.

#### **COMPTROLLER GENERAL ASTRIDE TAMATAVE**

Pour lemoman nou kapab dir, *but* i kapab sa i sanze an mezir nou get sa bann deskripsyon, me nou annan 63 *account* ki nou *refer* zot avek bann parey bann *PSIP*. Savedir pour bann proze lenfrastruktir e 89 ki pour bann *recurrent* e sa i enkli bann *trading and operating* e osi bann par egzanp akizisyon *of vehicle*, bann keksoz *a recurrent nature*. Mersi.

#### **MR DEPUTY SPEAKER**

Mersi manmzel Tamatave. Ou annan klarifikasyon ouswa ou korek? Enn pti klarifikasyon.

#### **HON CONRAD GABRIEL**

Mersi Ms Tamatave. Solman malgre dan *PSIP* zis sonn Lasanble en garanti si sa larzan i *actually la, because it's been 6 months now*, *project* pa ankor demare. Mersi.

#### **MR DEPUTY SPEAKER**

*It's a new subject matter pour konnen si. Akoz sa i en size ki Local Government. Likel ki ti pe fer sa proze Local Government ouswa SLTA, ouswa Housing? Savedir SIA.*

**HON CONRAD GABRIEL**

SIA. Mr Chair.

**MR DEPUTY SPEAKER**

*Wi. Infrastructure Agency. It's a new subject matter. My advice to the honorable Member, petet ou merit take up. Ekrir zot e mwan mon fer sa aswiv pour distrik Mont Buxton. Mon zwenn avek management sa bann antite e nou figure out larzan si i ankor la? Kot i pour ale? Kan proze? So my advice to you would be pour fer sa.*

Prosen enterven  
Onorab Philip Monthy.

**HON PHILIP MONTHY**

Mersi Mr Speaker. Bonzour Minis ek ou delegasyon e bonzour tou bann envite dan Galeri. Minis ou'n koz lo plizyer sa bann *Suspense Account* ki'n ganny fermen, akoz ti napa en proper *framework* anba ki zot ti pe *operate*.

Ler ou annan ou bann tel kondisyon, ki bann posibilite koripsyon ki kapab ganny arive, oubyen antreprann atraver sa bann tel *Suspense Account*, ler

ou annan sa bann kont ki egziste nou napa *proper monitoring*, nou napa en *proper framework* pour anba ki sa bann *account* i fonksyonnen? Mersi.

**MR DEPUTY SPEAKER**

Mersi Onorab. Panel?

**MINISTER NAADIR HASSAN**

Mersi Mr Speaker. Mersi Onorab pour ou keston. Onorab toultan ler ou napa en *framework* anba ki en keksoz i *operate* anba, i toultan kree loportinite pour mank kontrol, pour mank sa *monitoring*.

San menm sa i enportan e mon konnen bann *staff* pe travay vreman dir lo la pou *set up* sa *framework*, akoz sa i pour anpes posibilite frod, anpes posibilite koripsyon. So larepons ou keston se ki ler napa, i toultan *increase possibility of* sa bann keksoz mal arive.

So sa mon kapab donn en garanti avek Lasanble ozordi, ki nou pour annan en *framework* e sa *framework* pour enn ki met kontrol e *monitoring* lo bann *Suspense Account*. Mersi.

**MR DEPUTY SPEAKER**

Mersi *Minister*. Onorab Rocky Uranie. Prosenman.

**HON ROCKY URANIE**

Mersi. Mersi Mr Speaker. Bonzour Minis ek ou delegasyon, tou koleg Onorab. Bonzour spesyal pour nou bann dimoun avek abilite spesyal ki anler dan Galeri e byensir tou zabitan Zil Pros ki a lekout.

Minis si ti annan tou sa bann larzan dan *Suspense Account* ki ou'n nonmen en kantite larzan. Akoz ki nou ti ganny dir ki kof i vid? Mersi.

**MINISTER NAADIR HASSAN**

Mersi Mr Speaker. Mersi Onorab. Mon vreman apresye ou'n demann sa kestyon, akoz ou'n donn mwan loportinite pour mwan klarifye sa size kof vid.

So Onorab i annan de keksoz nou pe koz lo la. I enportan pour realiz sa. I annan rezerv Labank Santral ki asiz ek Labank Santral. I annan kont Gouvernman ki apel kont 1401, sa i kont Gouvernman ki fer tou depans ladan.

Gouvernman pa fer depans dan rezerv pei. Si Gouvernman i bezwen servi rezerv pei i servi larzan dan 1401 ki an Roupri, i pey Labank Santral, Labank Santral i donn li *foreign exchange* pour fer bann peyman *foreign exchange*. Sa kot mon krwar zot konfize.

Zot konfiz le de, rezerv pei e kont Gouvernman.

Ler i dir “kof ti vid”, se kont Gouvernman ki ti vid, pa rezerv. Be si ou napa larzan dan 1401 pour ou pey Labank Santral pour servi larzan dan rezerv, ou napa pour aste rezerv. Sa mon krwar fodre ganny kler sa.

Akoz mon kapab menm kekfwa vin prezant ek Lasanble, pour eksplik ki mannyer, Gouvernman i fonksyonnen. Akoz i annan en kantite konfizyon, lo zot kote. Mersi.

**MR DEPUTY SPEAKER**

Mersi. Mersi ou annan klarifikasyon lo diferans ant sa de kont?

**HON ROCKY URANIE**

Wi be la - zot ki sanz *tune* akoz zot ki'n konfiz piblik deor, in dir poudir “kof i vid”. Zot in sanz *tune* e nou pa'n nonm rezerv nanryen nou ti annan en kantite larzan e larzan i pour Lepep Seselwa kantmenm dan *Suspense Account* i larzan piblik Seselwa. Larzan Seselwa sa! So pa bezwen anbet dimoun deor fer krwar kof i vid!

**MR DEPUTY SPEAKER**

Mersi. Minis ou le re-klarifye ladiferans ant le de *account*.



**MINISTER NAADIR HASSAN**

Wi. Wi. Wi Mr Speaker. Mr Speaker mon krwar kekwfa avek ou permisyon ti a bon bann teknisyen i vini e eksplik diferans akoz konfizyon i reel lo sa kote. Mersi.

**MR DEPUTY SPEAKER**

Mersi. Minister. Sa ti bann - Onorab Uranie ti dernyen lo bann Manm ki'n endike zot le demann kestyon lo sa size. Donk aprezan mon ava pas laparol avek loter Mosyon Onorab Pillay pour nou *wrap up* sa sesyon *PNQ*.

**HON SEBASTIEN PILLAY**

Mersi. Mersi Mr Speaker. Mr Speaker zis pour note, resaman dan en *meeting* piblik ou ti ancor enn fwa servi sa term, "kof vid", ou ki ti servi sa term dan *meeting* piblik Anse Etoile.

So si i annan konfizyon ki pe ganny fer se ou ki pe konfiz dimoun. La aprezan ou'n vin donn nou en leksplikasyon....

**MR DEPUTY SPEAKER**

Onorab!

**HON SEBASTIEN PILLAY**

Si in *the first-place* ou donn sa leksplikasyon...

**MR DEPUTY SPEAKER**

Onorab *move to the question!* Annou evite remontrons okenn dimoun ki nou *quest* dan sa Lasanble. Mersi.

**HON SEBASTIEN PILLAY**

Pa ankoler! Mon konpran ou, mon konpran ou pa ankoler Mr Speaker pa ankoler. Ler nou dir laverite zot le ankoler.

Ler nou koz laverite nou le ankoler. Par egzantp Mr Speaker annou sey ganny en konpran en keksoz la en.

An 2020 balans ler ou pran *trading and operating* ek bann *general accounts* ti R309milyon, an 2021 balans ariv R338.2milyon sa i dapre rapor Oditer Zeneral.

Me Minister Finans dan Lasanble pe donn mwan en lot sif. Kestyon ki mon le demande se lekel sif ki korek, *as of* kont Gouvernman fermen 2021, parey Oditer Zeneral in raporte, oubyen eski se sif Minister Finans ki korek.

Dan sa konteks, si sif Minister Finans ki korek, akoz ki sa lenformasyon pa'n ganny enkorpoze dan rapor Oditer Zeneral pour donn nou vre portre lo bann kont ki dan *Suspense Account?* Sa i premyerman.

Dezyenmman, Mr Speaker, Onorab Uranie i annan rezon! An 2020, ti annan

309milyon dan bann *Trading and Operating Accounts*, so ou pa kapab dir ti napa larzan! Sanmenm sa ki nou pe sey fer ou konpran aret konfiz dimoun.

Me Speaker pa le nou koz lo lefe ki ou ki ti servi sa term, “kof vid” mon pa konnen akoz ou ti deside fer sa, be ou ki konnen. Kestyon ki nou annan pour demann ou prezan.

Anba sa bann kont i annan plizyer kestyon ki'n vini ki'n dir poudir ki mannyer nou pe kontrole eksetera. Ms Tamatave in konfirman ki zot bezwen ekrir sa bann antite pour zot konnen.

Be ki mannyer nou pour konnen nou Lasanble ki pe pase, ki depans ki pe ganny fer dapre Bidze ki nou'n aprouve si Minister Finans li menm, i bezwen ekrir sa bann antite pour konnen ki depans ki pe ganny fer?

Lasanble i aprouv en Bidze dapre en Lalwa ki vin devan nou e sa se *Appropriation Act*. Me selman Gouvernman i deside depans li dan fason ki anvi depans li. Nou konsernen avek sa. E mon trwazyenm pwen Mr Speaker, mon le retourn lo R50milyon ki nou ti'n bidzete pour *MRI*.

An 2022 nou ti pas en *Supplementary Budget* ki ti sipoze al ver aste en nouvo *MRI*,

nou annan Lagreman bilateral ek en pei ki pe fer donasyon e sa i byen. Me avek sa *MRI* pou annan lezot konponan ki pour vini, pour met li an plas.

Sa ki nou ti a kontan konnen ki'n arive ek sa R50milyon ki ti sipoze ganny bidzete e ganny *amalgamate* ek Bidze Minister Lasante si - partikilyerman Bidze *Health Care Agency* e eski dan sa R50milyon larzan in ganny retenir pour fer bann travay ki pour neser pour fer antre sa nouvo *MRI*? Ki baze lo lenformasyon ki nou'n gannyen, i pour pli gro e ki Minister Lasante pour bezwen finansman ler i arive pour fer li, pour met li an plas. Mersi Mr Speaker.

#### **MR DEPUTY SPEAKER**

Mersi Onorab. Eski in annan larepons pour bann pwen ki'n ganny souleve?

#### **MINISTER NAADIR HASSAN**

Mersi Mr Speaker. Mersi Onorab pour bann kestyon. Lo - mon a pran dernyen kestyon, lo *MRI*, lo ki'n arive ek sa 50milyon Dolar - pa Dolar sa R50milyon? Non- R50milyon i kler i pa'n perdi. Dan *Supplementary Budget* ti annan sa 50milyon parey mon'n eksplike.

Ler nou'n ganny konfirmasyon lo donasyon, sa R50milyon ki sa - ou konnen nou bezwen konpran Bidze e kont Gouvernman *ok*. Bidze i sa ki in ganny *proportioned by* Lasanble *ok*, kont Gouvernman i *cash*, ki annan dan kont Gouvernman. *Ok*. La! Dan Bidze R50milyon ti'n ganny provizyonnen, nou'n ganny donasyon, savedir nou pa bezwen sa R50milyon, pour aste *MRI*, napa okenn *Suspense Account* ki'n ganny kree, sa larzan i tonbe dan Bidze *ok*?

La, mon krwar ankor si prezan nou pou al lo kekyon ti annan larzan dan *Suspense Account*, me kof ti vid. Mon'n eksplike, mon eksplike kekfw Ms Tamatave ed mwan, pour edik bann Manm diferans Bidze, *Suspense Account* avek *cash* ki dan 1401, sa ki nou pe dir kof Gouvernman. Ed mwan silvouple. Mersi.

**MR DEPUTY SPEAKER**

Manmzel Tamatave ou le klarifye sa?

**COMPTROLLER GENERAL  
ASTRIDE TAMATAVE**

Mersi Mr Speaker. Mr Speaker parey letan nou fer Bidze, *let's say* nou'n dir Bidze Gouvernman pour en lannen i

R10bilyon en legzanp, depans Gouvernman i R10bilyon.

I pa vedir ki dan kont Gouvernman ozordi nou annan R10bilyon. Reveni i antre tou le zour par bann diferan sours ki nou kolekte reveni; par egzanp *tax* e bann *non-tax*, e depans osi i ganny fer toulezour.

So ki nou, nou bezwen fer koman Minister Finans, se prepar *cashflow*, sa ki nou fer bann *weekly cashflow*, ki nou fer sir, ki letan peyman i *fall due*, i annan larzan dan kont Gouvernman pour pas sa peyman.

Par egzanp si nou pour *go* petet pour adres sa *issue*, kof vid. 1401 lafen 2020, malgre ou ti annan *Suspense Account*, ki ti pour en valer *lets say* R200milyon, i pa vedir ki sa R200milyon ti la *at that point in time*, i ganny rezerve zis pour *Suspense Account*. I form parti dan *total* larzan dan kont Gouvernman.

Me ki Gouvernman bezwen fer sir, letan peyman pe *fall due*, anba tou son bann kont, ki kont Bidze, Kont *Suspense* i annan larzan pour fer sa peyman *and this is where* sa davans *from* Labank Santral ti vini 2020, pour fer sir ki i annan ase larzan dan 1401, pour pas peyman Gouvernman.

Mon swete ki sa in *bring* en pe *clarity to the matter* Mr Speaker.

**MR DEPUTY SPEAKER**

Mersi manmzel Tamatave. Minister ou le azout keksoz?

**MINISTER NAADIR HASSAN**

Wi. Mersi Mr Speaker. Mersi Ms Tamatave pour eklersi sa. Mon krwar la sa i ava kler poudir dan *1401* ti napa larzan. Nou ti pret larzan pour nou kapab pey bann depans Gouvernman e si zot le, si zot le sa pli kler mon a donn tou bann Manm Lasanble *statement of account* ki Gouvernman i annan, kekfwa ti a bon osi pibliy sa pour tou Seselwa vwar ki kantite larzan ti annan dan *1401 once and for all*.

Mon konnen Mr Speaker *PNQ* pa ti lo *1401*, me selman Onorab in lev sa *issue* mon krwar i bon mon klersi. Lo lezot kestyon ki Onorab in leve lo kote si nou bezwen ekrir bann antite, pour ganny detay? Onorab sa i egzakteman, aköz mon dir ki keksoz pa ti annord e aköz nou bezwen met en *framework* an plas, pour prosedir i ganny swiv lo kreasyon bann *Suspense Account*.

Lo kote *figure* sa ki ou'n mansyonnen pour Oditer Zeneral e sa ki Minister Finans,

mon a demann Ms Tamatave pour klersi diferans ant sa de *figure* ki ou pe rode mansyonnen. Mersi.

**MR DEPUTY SPEAKER**

Mersi Minister. Manmzel Tamatave?

**COMPTROLLER GENERAL ASTRIDE TAMATAVE**

Mersi Mr Speaker. Mr Speaker nou ava fer en rekonsilyasyon ant *figures* ki Oditer Zeneral in raporte e *figures* ki nou, nou'n donner. Me petet zis pour mwan mansyonnen i annan bann *Suspense Account*, ki annan *debit balance*, ki pa sipoze annan *debit balance*, aköz tou *Suspense Account* ou sipoze annan larzan, ou pa kapab fer *overspending* dan en *Suspense Account*.

So dan *figures* Oditer Zeneral li, i pe pran sa bann *debit balance* ki pe *minus*, ki pe redwir sa *credit balance* me par kont nou, nou *figures* nou pe bann *credit balance* aköz nou bezwen al rode, kwa ki'n koz sa bann *debit balance* dan en *Suspense Account*. Aköz i pa sipoze annan en *overspending* dan *Suspense Account*. Mersi Mr Speaker.

**MR DEPUTY SPEAKER**

Mersi manmzel Tamatave e mon note Onorab *Leader* Lopozisyon ou en klarifikasyon?

Solman i annan en keksoz ki'n konfiz mwan akoz mon pe swiv mon osi. Ou bann sif ki ou'n donneren ki dan rapor Oditer Zeneral ki la avek mwan, mon pa'n - fodre amwen mwan ki'n manke. Eski zot ti'n mansyonn sa bann sif?

Akoz mwan mon'n sezi bann sif lo kestyon Onorab Lemiel ki ti annan - lakantite ti annan dan *closed account* 2020, 21, 22. Mon pa'n sezi *unless* mwan ki'n mank sa bout ki'n swiv akoz in konfiz mwan en kou lo kestyon Onorab *LOTO*.

*Proceed* avek klarifikasyon. Silvouple.

### **HON SEBASTIEN PILLAY**

Mersi Mr Speaker. Mr Speaker Ms Tamatave in reponn mon klarifikasyon ki mon ti pour annan lo bann *account* ki dan *debit*, ki pa sipoze dan *debit*.

Me selman mwan mon pe *still* sey ganny en konpran ki pe pase, egzakteman la. Ler nou koman Lasanble nou vot en Bidze dapre Konstitisyon, se nou donn Gouvernman sa larzan *according to* sa laliny ki nou donn li dan sa Lalwa ki vin nou.

Gouvernman i kapab varye depans dan sa laliny, me pa kapab tir larzan dan sa laliny pour met en lot landrwa. Nou ti vot anba en *Supplementary Budget* pour laliny Minister Lasante pour R50milyon. Minis pe efektifman dir mwan sa R50milyon i pa'n ale pour Minister Lasante prezan.

Be anba ki permisyon ki zot kapab pran larzan ki nou Lasanble nou'n vote, tir li anba en Minister e met li anba en lot, san ki zot retourn kot Lasanble pour regulariz sa depans? Sa premye kestyon ki mon annan, zot pa sipoze kapab fer li. Nou ki bezwen donn zot laprouvasyon pour fer li.

Me sa ki nou'n ganny dir par *HCA* se ki sa larzan dapre Minister Finans in al dan en *Suspense Account* e ki sa larzan i sipoze ede avek bann konponan ki annan pour fer avek lentrodiksyon sa *new MRI*.

E rezon nou pe met sa presyon se ki pour fer sir poudir ler nou annan bann depans ki pour vini ek sa, nou pa bezwen rod en lot *supplementary* pour pey sa. Me kestyon ki souleve Mr Speaker se ki'n arive ek 50milyon e kwa ki'n ganny peye ek sa 50milyon? Kote ki in ale e anba ki Bidze in al ganny mete? Lasanble pa konnen.

Mon dezyenm klarifikasyon Mr Speaker. Mon vwar plizyer leksplikasyon pe ganny donnen lo 1401 ozordi, pe ganny eksplike, i byen, i byen zot pe eksplike si ti'n eksplike *in the first place* i byen. Akoz sa ki tou dimoun ti ganny dir se ki kof i vid *ok*.

Ankor anba bann davans. Lo rapor Oditer Zeneral in montre poudir an 2020 ti annan 975milyon an davans. *Ok* sa ki mon pa ganny en konpran Mr Speaker, an relasyon ek sa bann kont, si nou dir poudir avan ti napa kontrol, avan ti napa kontrol Minis ki pe dir! Mwan mon konnen ti annan akoz rapor Oditer Zeneral in kontinyelman raport lo sa bann kontrol ki la.

Akoz alor ki *Suspense Account* in ogmante ekspononsyelman 2an depi ki nouvo Gouvernman i vin o pouvwar, e nou pa ankor kapab met sa bann kontrol ki Minis pe dir nou. Par egzanp nou'n ganny nonmen en balans R452,528 milyon. I - se sa ki mon'n ganny dir? R452milyon,528mil? 409, *ok* e *closing balance* an 2021 ti 338.2milyon *as reported by* Oditer Zeneral ki ou pe dir mwan i pe pran *debit of R2.1million* i pe mete.

Se sa dan son latav ki nou pe vwar, so kekyon, ki Lasanble i annan se eski i pour annan depans ki ganny fer dan sa *Suspense Account* ki Lasanble pa pour zanmen konnen sa depans in ganny fer? E ki mannyer Lasanble prezan pour *exercise* en kontrol lo depans si Gouvernman i annan sa kantite *accounts, not only trading and operating*, me prezan mon annan *general project specific account* ki pe ganny entrodwir ki nou napa kontrol prezan.

So eski zot kapab dir nou prezan ki zot pour fer, pour asir Lasanble ki nou pour kapab annan en lizye pour fer *oversight* lo sa ki pe pase?

E mon *welcome* ki Minister Finans i ava anvoy sa rapor vizavi sa bann *Suspense Account* an sa ki konsern zot balans e depans ki pe ganny fer ladan. Mersi Mr Speaker.

### **MR DEPUTY SPEAKER**

Mersi Onorab. Eski *panel* i ava annan en larepons pour nou kapab termin sa sesyon lo sa enn kekyon. Mersi.

### **MINISTER NAADIR HASSAN**

Mersi Mr Speaker. Mersi Onorab. Kestyon lo *MRI funding* mon'n fini reponn se larzan ti dan *Supplementary Budget*,

larzan in ale kot Lasante, me sa larzan pa'n ganny depanse, akoz *MRI* in vin en don, *ok?*

So sa larzan pa'n al okenn par, kot en lot landrwa. I pa'n ganny *reappropriate* sa larzan *ok?* Mon eksplik ankor, fer kler, larzan dan *supplementary* ler Lasanble i aprouve, *it goes to the Ministry* i fini ganny *apportioned - appropriated to the Ministry*. Ler sa Minister pa *spend* sa larzan, *ok*, i annan de keksoz ki kapab arive *either* ler larzan pa'n ganny *spend*, i pa'n ganny *spend*, savedir i tonbe ouswa i ganny *carry forward* dan en *Suspense Account* ki ozordi nou pe diskite.

*For the MRI* dan 50milyon, sa larzan sa 50milyon pa'n ganny *carry forward* dan en *Suspense Account*, *ok?* Lo kote komanter lo kontrol, Onorab mon konnen poudir ki bann *staff* pe travay, zot nouvo *framework* pour *Suspense Account*, i pa'n zanmen annan en *framework* pour *Suspense Account*.

Ler mon'n dir napa kontrol, mon'n dir li anliny avek poudir ti napa en *framework* pour *Suspense Account*. Ou'n demann mwan akoz pa'n ganny fer pli boner prezan? Kestyon i senp, bann *staff* i annan en kantite priyorite, pour travay lo la. La zot pe ganny letan zot pe

travay lo la en kantite *urgency* dan bann lezot keksoz ki zot ti pe fer.

Lo kote *oversight*, nouvo *framework*, mon'n mansyonnen ki tou le lafen lannen Lasanble i a ganny lalis *Suspense Account*, Oditer Zeneral i kouver *oversight of Suspense Account* dan son odit. Savedir zot ganny en kopi rapor Oditer Zeneral.

Lo kote ou'n dir ki la nou'n entrodwir nouvo *Trading and Operating Account*. Nou pa'n entrodwir i en keksoz ki *already* in *existence* ki ti pe ganny servi, napa nanryen nouvo ki'n ganny entrodwir. Mersi Mr Speaker.

### **MR DEPUTY SPEAKER**

Mersi Minister. In anmenn nou zis ler pour nou termin sa sesyon *PNQ* lo sa kestyon e mon not premye kestyon Onorab Naddy Zialor ki ti pe demande ki, si Minister Finans i a pare pour zwenn *FPAC* pour depouy sa size en pe plis.

Minis in *welcome*, so i en *challenge* pour *FPAC* prezan pour pran lof Minis Finans e nou fer en travay lo la. Nou ava remerisi *panel* ki'n zwenn nou ozordi bomaten, sirtou manmzel Tamatave ki *Controller General* avek son Depite Mr Commettant.

Bonn kontinyasyon lazournen nou ava eskiz zot

depar avek nou. E nou ava osi fer laranzman pour lot zofisye ki pour zwenn nou pour kontinyasyon *Question Time*. Mersi.

Nou kontinyen prezan avek *Questions for Oral Answer* e nou akeyir avek nou Sef Egzekitiv *Seychelles Petroleum Company* Mrs Sarah Romain e mon krwar ki premye fwa ki Mrs Romain i vin dan Lasanble depi son lapwentman. Non? An Fevriye? Premye fwa.

So nou ava *welcome* ou e ankor enn fwa felisit ou pour ou lapwentman e swet ou tou de bon dan sa travay enportan, me pa neserman fasil. Nou pour pas lo kestyon nimeron 88 se Onorab John Hoareau. En moman Onorab Hoareau.

Ou annan en? Ou annan en *point of order* Onorab?

### **HON SEBASTIEN PILLAY**

Non-mon ti pe zis - ou ti'n, ou ti'n - *raise en issue* ki FPAC nou pran on *board* sa ki ou'n dir *regarding* bann *Suspense Account*.

### **MR DEPUTY SPEAKER**

Minis in *offer*. Wi.

### **HON SEBASTIEN PILLAY**

Minis in *offer*. Nou aksepte avek gran ker pour resevwar sa bann lenformasyon. Nou pour osi met

devan ou lenformasyon ki nou'n gannyen avek Minister Lasante, se pour sa rezon nou ti pe pous sa *issue*.

Pa pour- pa pour nou me pour en size ki nou ti'n pran dan FPAC, ki nou ava met devan ou pour ou konpran aköz nou ti pe klarifye sa. Mon ti le an pasan Mr Speaker *remind* ou mon annan en *matter of privilege* ki mon krwar mon pou pran apre kestyon.

### **MR DEPUTY SPEAKER**

Wi ou'n vin koz avek mwan lo la. E mon pe swiv *Order 25*. Mersi.

### **HON SEBASTIEN PILLAY**

Mersi.

### **MR DEPUTY SPEAKER**

Onorab Hoareau. *Please proceed with your question. Thank you.*

### **HON JOHN HOAREAU**

Mersi Mr Speaker. Bonzour Mr Speaker. Bonzour Minis e Mrs Romain, CEO SEYPEC e osi bonzour tou bann dimoun ki pe ekoute. Mon kestyon i lir koumsa:-

Eski Minis pour Finans, Planifikasyon Nasyonal ek Komers i kapab eksplik Lasanble aköz ki program *cadet training* pou bann zenn,



ki pe fer en karyer navigasyon lo *tanker* in arete e ki plan *SEYPEC* pou *training* bann maren pou le fitir?

### **MR DEPUTY SPEAKER**

Mersi Onorab. *Panel* mon ava envit zot pour larepons.

### **MINISTER NAADIR HASSAN**

Mersi Onorab pour sa kestyon. Mr Speaker, formasyon pour bann maren ki travay lo *tanker SEYPEC* in toultan ganny konsidere koman en keksoz enportan dan devlopman sa lendistri, pour asire ki premyerman lo bann *tanker* petrolye *SEYPEC*, nou annan dimoun ki kalifye pour travay.

Dezyenmman *SEYPEC* i donn loportinite pour bann Seselwa kapab ganny en karyer dan sa lendistri, ki osi benefisyer Sekter Maritim ek Lekonomi Ble Sesel.

Ozordi *SEYPEC* i annan li 5 *tanker*, 4 ki zot loperasyon pe ganny zere aletranze, e enn pli pti ki son loperasyon i baze isi lokalman e osi deservi okenn bezwen dan larezyon.

Depi ler *SEYPEC* ti antre dan biznes *tanker* an 2002, pour transpor karbiran dan bann diferan Por o nivo mondyal, *SEYPEC* in depans li R86.8milyon, pour investir dan

formasyon e lantrennman pour bann maren Seselwa.

Ozordi *SEYPEC* i annan li 93 maren Seselwa ki kalifye e aktivman pe travay lo son bann *tanker*. E lo tou *tanker SEYPEC* i annan apepre 50-55poursan Seselwa koman lekipaz, ki pe travay a nenport ki moman.

E i enportan pour note ki saler provizyon pour pansyon e lasirans ki bann maren in resevwar; zis pour lannen pase in kout apepre \$6.4milyon oubyen apepre R90milyon.

Parmi sa 93 maren Seselwa ki aktiv ek *SEYPEC* nou annan nou plizyer ran ki enkli:-

5 kaptenn, 3 sef enzenyer e en premye zofisyer, 3 dezyenm zofisyer, 4 dezyenm enzenyer, 58 *rating* ki enkli bann maren lo *deck*, 8 kwizinyen, 10 *cadet* ki pe al fini zot lantrennman byento an Zilyet pour vin en dezyenm zofisyer, ek en *cadet* enzenyer ki fek al komans son letid Irlann.

Mr Speaker lenvestisman ki *SEYPEC* in mete dan devlopman sa bann maren ziska ozordi, in kout li R86.8milyon, in definitivman benefisyer bokou bann maren Seselwa.

E pour note inisyalman e pour bokou lannen sa depans direk ki *SEYPEC* in fer lo lapar son lekipaz ti gratwit. In annan

serten ki'n benefisyé avek lantrennman, me apre zot in swazir pour aret travay lo *tanker*, e parkont i annan ki'n ganny en *loan* avek *SEYPEC* pour fer zot lantrennman me zot pa'n onor zot obligasyon finansyel ki'n osi poz en risk finansyer pour *SEYPEC*.

*SEYPEC* in ofer bokou labours pour bann etidyan ki'n enterese dan sa karyer, e ki zot in kapab al fer zot letid dan bann liniversite tel ki Irlann, *Sud Afrique*, Sengapour, Lostrali, *Sri Lanka* e Langleter.

An plis depi 2014, *SEYPEC* in devlop li bann programm lantrennman ki donn loportinite bann ki anvi komans en karyer dan sa lendistri. Tou le lannen depi 2014 *SEYPEC* ti pe anbark 12-15 *trainee* maren ki ti pe ganny siporte finansyerman par *SEYPEC*, pour al etidye e ganny leksperyans lo son *tanker*.

Sa programm *cohort* pandan sa dernyen 10an, in vwar 112 Seselwa an tou ki'n benefisyé avek sa loportinite kot zot ti kapab al *CINEC Sri Lanka* pour zot, pour fer zot premye lantrennman apre ganny plase lo bann *tanker SEYPEC*, pour kontinyen devlop zot e ganny leksperyans.

Dernyen group ki nou apel zot "*Cohort 8*", ti pran – ti ganny

pran an 2022 e ozordi zot lo *tanker SEYPEC* pe travay. Mr Speaker lannen pase *SEYPEC* in asiste 7 maren, pour fer zot lantrennman Irlann e zot in fek kalifye e ganny zot sertifika konpetans sa lannen, koman dezyenm zofisyé dan navigasyon.

E la, sa lannen, nou pour vwar finisyon en programm lantrennman pour devlop 10 zofisyé segon dan navigasyon, ki'n dire pour 3an e ki'n ganny fer lokalman an kolaborasyon avek Lakademi Maritim Sesel, e *CINEC Sri Lanka* e ganny sipor finansyel *ANHRD* ek *SEYPEC*.

I enportan pour note ki *SEYPEC* i pa'n aret lantrennman pour son bann maren lo *tanker*. Mr Speaker *SEYPEC* in ozordi pe kontinyen avek lantrennman a kour term pour son bann maren ki deza pe travay, pour gard zot touzour a zour ek konesans dan sa lendistri.

Me sa lannen in annan en poz lo bann lantrennman lonterm. Menm si nou pa'n pran nevyenm *cohort* an 2023, nou pe planifye pour pran zot an 2024.

Sa ki enportan pour note osi se ki *SEYPEC* i a en pwen, kot son bann *tanker* pe apros 20an. E ki lakonpanyen pe fer en revi konplet, pour regard

stratezi ki i pour adopte vizavi demann pour transportasyon karbiran, lefikasite e performans son bann *tanker* anvi zot laz e konpetisyon ki annan lo marse.

*SEYPEC* pour bezwen regard opsyon ki annan pour ogmant lakantite lannen ki *tanker* i kapab kontinyen travay. Andotmo *SEYPEC* pe revwar si i pour ranplas son bann *tanker* ki pe vyeyri, oubyen si i pour kontinyen servi sa menm laflot, prenon kont profitabilite *tanker* pandan sa dernyen 21an.

Ler nou stratezi pour *tanker* i ava an plas, ki nou ekspekte pour arive apartir Septanm sa lannen, *SEYPEC* i ava dan en pli bon pozisyon pour pronons son lekor lo lenvestisman ki i pour fer ek son bann *tanker* e osi program lantrennman lonterm son bann zofisye ek maren abor son bann *tanker*. Mersi Mr Speaker.

### **MR DEPUTY SPEAKER**

Mersi pour larepons Minis. Onorab Hoareau ou annan siplemanter?

### **HON JOHN HOAREAU**

Mersi Mr Speaker. Mr Speaker mon ti a kontan ki Minis i konfirm ek mwan, poudir si bann *cadet*, bann dimoun ki ti'n

anrezistre pour zot fer *cadet training*, bann ki'n ganny 36mwan *sea time*, si lannen prosen zot pour kapab al zot *training*?

E osi mon ti a kontan konnen, anvi ki ou'n dir i annan 93 maren Seselwa, mon ti ava kontan konnen konbyen maren etranze i annan e ki letan ki ou pe mazine pour kapab ranplas sa bann dimoun? Mersi.

### **MR DEPUTY SPEAKER**

Mersi Onorab. Panel?

### **MINISTER NAADIR HASSAN**

Mersi Mr Speaker. Mersi Onorab pour kestyon. Lo premye kestyon, lo kote si nou kapab konfirmen bann *registered cadet*? Parey mon'n dir dan mon larepons, tou sa pour baze lo sa *replacement strategy tanker* ki *SEYPEC* pour konklir sa louvraz an Septanm.

So nou bezwen regarde plizyer faktor, profitabilite biznes *tanker*, marse enternasyonal, tou keksoz mannyer i ete, e baze lo sa desizyon ganny pran, prezan *SEYPEC* li i ava dan en pozisyon pour gete si i vo lapenn pour kontinyen investir dan bann lantrennman lonterm.

So tousala i ava baze lo sa desizyon ki pour pran an Septanm. Lo ou dezyenm

kestyon *regarding* konbyen maren etranze i annan, e ki dele letan pour nou ranplas zot? *CEO* ou ava annan sa lenformasyon? Mersi.

**MR DEPUTY SPEAKER**

Mersi Minister. *CEO* Romain?

**CEO SARAH ROMAIN**

Mersi Mr Speaker e mersi Onorab pour ou kestyon. Lo - nou annan 4 *tanker* aletranze ki pe travay Lerop e lo sak *tanker* nou annan nou - lo 2 *tanker* nou annan nou 17 maren abor e lo lot de nou annan nou 18. Lo *Progress* par egzantp *Seychelles Progress*, nou annan nou 17 manm lekipaz e 10 ladan, i Seselwa. Savedir 59poursan lekipaz lo sa bato i Seselwa.

Lo *Seychelles Pioneer* nou annan 17 manm lekipaz e 9 maren lo sa bato i Seselwa. So sa i fer 53poursan. Ler nou regard *Seychelles Patriot* nou annan 18 manm lekipaz e 11 lo la i Seselwa, savedir i fer 61poursan. E ler nou regard lo *Seychelles Prelude* nou annan nou 18 manm lekipaz e 10 lo la i Seselwa, sa i fer 56poursantaz Seselwa ki lo nou bann *tanker*.

E nou annan en *tanker* ki isi sa i *Seychelles Paradise* e lo la nou annan nou 99poursan ki Seselwa sof ki sef enzenyer ki

en etranze. Me nou annan sef enzenyer ki Seselwa. E zour sa sef enzenyer Seselwa i abor nou annan nou 100poursan lekipaz Seselwa lo *Seychelles Paradise*.

Prezan ou dezyenm bout kot ou pe regard kan nou pe kapab ranplas tou avek Seselwa? Sa i pour depan antyerman lo progresyon, bann maren dan zot karyer. So si zot pe pas zot lantrennman, toultan nou pe promouvwar bann progresyon pour vin, pour vin sef zofisye, dezyenm sef enzenyer eksetera.

Me selman sa i pour depan lo lantrennman e parey nou pe dir nou toultan nou ti anvi, *at least* ki en *tanker* par - nou ti'n met 2020 pour nou kapab annan en *tanker* ki annan tou lekipaz Seselwa. E nou ti kapab annan, aletranze akoz nou annan nou, nou sef enzenyer, me i pa'n fasil pour nou ganny tou Seselwa en sel kou lo sa bato, me selman lo *Seychelles Paradise*, nou kapab.

Me i pour pran nou en bon pe letan mon kapab dir, kekfwa nou kapab dir ankor dan en 5an, petet si nou *tanker* nou ankor pe servi li e tousala i pour depan lo nou stratezi ki nou pe, nou pour adopte vizavi, vizavi si nou pour kontinyen avek nou *tanker* mannyer i ete; si nou

pour ranplas nou *tanker*? Si nou pour aste enn nouvo?

E tousala i pour depan lo stratezi ki nou ekspekte annan an Septanm sa lannen. Mersi Mr Speaker.

### **MR DEPUTY SPEAKER**

Mersi *CEO*. Onorab Romain ou pa ti'n lev lanmen lo sa kestyon, ou pa annan drwa demande ou. Wi ou pa annan drwa demande. Prosen Onorab. Onorab William.

### **HON WAVEN WILLIAM**

Mersi Mr Speaker. Mr Speaker mon anvi demann avek Minis par lefe ki en pe letan, ti annan en konsern kot bann maren Seselwa, ki letan zot vin ater, pour en pe letan e sa osi in ganny leve dan koman en kestyon dan *meeting* piblik, resaman avek Prezidan kot zot pa pe ganny sipor an term saler.

So mon anvi konnen, an vi ki in annan bann menas pour serten maren peser, bann - *well* bann maren Seselwa kite, al lo lezot bato ki vreman Minister ouswa *SEYPEC* pe fer pour fer sir bann maren ki nou pe *train* zot pa ale me ki zot ganny sa sipor ki zot pe demande?

Akoz i vre i en konsern letan ou ater en pe letan ou pa pe ganny en saler, parey en

nenport ki dimoun, i en lanbara. Mersi.

### **MR DEPUTY SPEAKER**

Mersi Onorab. *Panel*?

### **CEO SARAH ROMAIN**

Mersi Mr Speaker. Mersi Onorab pour ou kestyon. I vre ki koman en *seafarer*, en maren abor nou *tanker*, i maren i ganny peye ler i lo Kontra. Si ou pran par egzanp en sef enzenyer par egzanp i pour ganny li en Kontra 4mwan *ok*, e i pour ganny li en peryod 4 mwan kot i pa pe travay i lo *rest*, apre i reganny son - oubyen i kapab pran 3 mwan depandan kan i kapab remonte.

Me apre i pour rebran ankor en lot peryod 4mwan e dan son saler, ki nou pe pey sa sef enzenyer par egzanp. Ozordi i en sef enzenyer lo bato *SEYPEC* i ganny peye pres \$12mil par mwan, san *tax*. E dan son saler, so la nou pe koz nou pres R175mil par mwan ki i pe travay, i pa pe pey okenn *tax*, aköz son travay i an deor ziridiksyon Sesel.

E dan son saler, i ganny i annan en provizyon ki ganny fer pour pey li ler i ater osi e ler zot retourn ater *SEYPEC* pa anpes okenn maren Seselwa pour anpes li al travay. Me selman sa ki nou demande se ki zot

enform *SEYPEC*, ki zot pe al fer antreprann en lot travay.

Akoz *SEYPEC* i kouver tou maren ki abor 24 lo 24 avek en lasirans e sa aplik zis pour bann maren ki lo *tanker*. E sa lasirans i kouver zot, i kouver zot *spouse* e i kouver zot zanfan anba laz 18an.

E sa lasirans i kouver okenn evantyalite ki arive ek zot medikal, repatriyasyon pour al dan en pei aletranze, e alors sa ki nou dir avek sa maren Seselwa ler i vini, vi ki i ankor dan *pool SEYPEC*, i enportan ki zot fer *SEYPEC* konnen e zot ganny lotorizasyon *SEYPEC* avan ki zot al pran en lot metye.

Akoz si ou pe al pran en metye ki pour met - pe met ou lavi an risk ou - i ariv en keksoz avek ou, se nou ki pe pey sa lasirans pour ou. E se pour sa rezon ki nou dir avek zot vin dir avek nou, ekrir nou poudir mon enterese pour mwan pran en lot lanplwa.

Me solman sa ki enportan se ki sa peryod ki zot ater i en peryod ki zot bezwen poze, aköz bann maren i travay dir, 4 mwan en sel kou e wi mon konpran zot a dir poudir, sa lot 4 mwan i en bon pe letan, me selman parey mon'n eksplike nou fer provizyon pour enkli zot larzan koman ler zot ater osi. Mersi Mr Speaker.

### **MR DEPUTY SPEAKER**

Mersi Mrs Romain. I annan 8 Manm ki'n eksprim lenterere pour demann kestyon lo sa kestyon solman zot konnen presedans ki'n etabli, apepre 15 minit mon *stress* sa enn, enn pti gin. *So unfortunately for time management I cannot allow any further supplementary question* lo sa size.

Donk nou pour remerisi Mrs Romain avek nou e nou ava eskiz son depar pour nou pran kestyon nimerò 89. E nou ava demann *parliamentary reporter* pour rod lot zofisye ki pe vini. Mersi. Bonn zournen Mrs Romain.

Pour kestyon 89 lo nou *Order Paper*, nou ava dir byenveni avek nou dan Lasanble ozordi bomaten Mr Francis Lebon, ki Sekreter Prensipal pour Departman Komers e osi Sekreter Prensipal pour Lanvironnman Mr Denis Matakinen byenveni.

E kestyon 89 i sorti kot Manm Elekte pour distrik Mont Buxton ki erezman i dan *Chair* ozordi, donk mon pe demann Onorab Flory Larue pour demann kestyon lo mon par silvouple. Mersi.

### **HON FLORY LARUE**

Mersi Mr Speaker. Bonzour Mr Speaker. Bonzour Minis ek ou *panel*, bonzour bann dimoun dan Galeri, bonzour tou Manm e dimoun dan lakour.

Eski Minis pour Komers i kapab dir nou Lasanble ki demars ou Minister in komans fer pou protez bann resours zenetik Sesel atraver resers e lanrezistremans atraver Lofis Drwa Entelektyel? Mersi.

### **MR DEPUTY SPEAKER**

Mersi Onorab. *Panel?*

### **MINISTER NAADIR HASSAN**

Mersi Mr Speaker. Mersi Onorab pour sa keston. Mr Speaker bann resours zenetik ki'n ganny dekrir dan Konvansyon lo Diversite Biolojik - *Convention on Biological Diversity 1992*.

Koman bann matyer zenetik pour bann plant, zannimo e mikroskopik ouswa lezot lorizin, ti annan konteni erediter ki annan valer. En pe legzanp enkli bann plant medisinal, plantasyon agrikol, plant agrikol e bann zannimo.

Bann resours zenetik li menm, ki ganny trouve dan lanatir, i pa en form propriyete entelektyel, akoz zot pa bann kreasyon ki'n ganny mazin par imen ki pour kapab ganny

proteze direktman koman en propriyete entelektyel.

Alors ki mannyer sa bann drwa i kapab ganny proteze? Mr Speaker, lenvansyon ki baze ouswa ki ganny devlope an servan bann resours zenetik ek zot bann konesans tradisyonnèl asosye, i kapab ganny proteze anba sistenm propriyete entelektyel swa atraver en patant, ouswa atraver en sistenm '*Sui generis*' ki regle drwa bann operater reproduksyon, bann plant ki servi resers e aktivite reproduksyon pour kree bann nouvo varyete e lespe plant.

Ki bann Lalwa ki an egzistans dan Sesel ki protez bann resours zenetik? Mr Speaker Sesel anba Lalwa Propriyete Endistriyel 2014 e Regilasyon Propriyete Endistriyel Nimero 902014, i fer provizyon pour proteksyon bann resours zenetik e konesans tradisyonnèl, par proteksyon bann patant.

Seksyon 10 anba Lartik 3(b)1 ek 2, i site, "ki en lenvansyon i enkli servi bann matyer zenetik, ouswa biolojik ek konesans tradisyonnèl." Son deskripsyon i bezwen idantifye klerman lorizin sa resours e deskripsyon sa lenvansyon, e i kapab ganny servi pour

enterpret bann *claims* ki kapab ganny fer.

Ziska prezan napa okenn lanrezistremman patant an relasyon avek bann resours zenetik, anba sa seksyon.

Sesel ti osi depoz son notifikasyon pour akse sa Konvansyon anba Nasyon-z-Ini lo Trete Enternasyonal lo Plant Zenetik pour Manze ek Lagrikiltir le 30 May 2006, e i ti pran lefe le 29 Out 2006.

Sesel i kontinyen partisip koman en Manm aktiv lo sa Trete. En lot opsyon pour proteksyon i atraver proteksyon varyete bann plant. Annefe Sesel i dan prosedir pour drafte Lalwa e Regilasyon ki pour donn proteksyon drwa bann operater.

E sa travay pe ganny fer an konsiltasyon avek diferan partener, tel parey Departman Lagrikiltir, ensi ki Departman Lanvironnman. Mr Speaker, o kour sa dernyen lannen ki'n pase anba 11enm Fon Devlopman Linyon Eropéen ek Lasistans, en eksper Propriyete Entelektyel Departman Komers an kolaborasyon avek Biro Rezistrar, ti komans en proze pour reviz Lalwa e Regilasyon lo Propriyete Entelektyel dan Sesel.

Sa Lalwa i enkli entrodwir en *Plant Variety Protection Bill* ki

pour donn e protez bann agrikilter oubyen fermye, e osi pour protez devlopman e lagrandisman bann plant pou legim tradisyannel.

I menm rekonnet drwa bann fermye pour konserv, itiliz, fer lesanz e menm vann bann varyete plant proteze. Normalman kan sa i arive, i annan serten kondisyon ki atase avek.

Savedir sa Lalwa i pour permet konservasyon e lilizasyon dirab bann resours fitozenerik ki i vin avek bann diferan mezir, ki permet lesanz ant bann resours zenetik, ankouraz lilizasyon bann varyete tradisyannel, e menm permet partisipasyon bann dimoun ki annan sa bann resours zenetik dan zot propriyete.

Sa Lalwa i osi kapab ganny servi koman en lenstriman pour Sesel vin en Manm Linyon Enternasyonal pour Proteksyon, bann nouvo varyete plant ki baze lo Konvansyon Enternasyonal pour Proteksyon bann Nouvo Varyete Plant byen koni koman, “UPOV”.

Alor pour fer sir bann operater i ganny byen ankadre e proteze, bann operater i bezwen fayle zot aplikasyon endividyel ek Lotorite sa Linyon



ki son bann manm, i annan manda pour donn bann operater zot drwa.

Dan ka Sesel, lentansyon pour ratifye e vin en manm sa linyon i date depi Novanm 2014, pandan sesyon en group travay pour vin en Manm Lorganizasyon Mondyal pour Komers *WTO*, kot Sesel ti donn son langazman pour form par sa linyon e Gouvernman ti pour notifie, pa pli tar ki lafen 2015 lo ratifikasyon sa Konvansyon.

Dezormeman o kour bann lannen ki'n pase, Sesel pa'n arive ratifye sa Konvansyon, akoz mankman dan Lalwa e Regilasyon ki kouver proteksyon bann diferan varyete plan. Lotorite konsernen pe deza antreprann bann travay nesese dan sa domenn. Mersi Mr Speaker.

### **MR DEPUTY SPEAKER**

Mersi pour larepons Minis. Onorab Larue ou annan siplemanter?

### **HON FLORY LARUE**

Mersi Minis. Mersi Speaker. Minis lefe ki ou dir pour lemoman bann keksoz i ankor pe ganny etabli, eski Minister Komers ek Minister pour Lanvironnman i annan plan pour met okenn *funds* akote

pour siport petet Liniversite Sesel, ouswa en lot laboratwar pour *at least*, fer bann resers lo bann plant - plant ouswa zannimo andemik ki annan Sesel, pour nou kapab *at least* annan en *bank* lo ki kalite sibstans ki annan dan sa bann propriyete ki andemik pour Sesel, pour komanse? Mersi.

### **MR DEPUTY SPEAKER**

Mersi Onorab. *Panel?*

### **MINISTER NAADIR HASSAN**

Mersi Mr Speaker. Mersi Onorab pour sa kestyon. Larepons kestyon se wi, en keksoz ki nou kapab konsidere pour donn sa sipor finansyel pour fer plis resers.

Me osi ki nou ti a kontan ankouraze osi se plis dimoun pour vin devan, pour montre poudir ki i annan sa lentere, e ler nou vwar poudir i annan sa lentere, *then* nou kapab komet pour met plis fon osi ladan. Mersi.

### **MR DEPUTY SPEAKER**

Mersi. Minis. Onorab Pillay.

### **HON SEBASTIEN PILLAY**

Mersi Mr Speaker. Mr Speaker *around* 2010 oubyen 2011, Sesel ti *become party to the Nagoya Protocol* ki sipoze en lagreman pour si oule *regulate*

*benefit sharing* lo bann *genetic material*.

Par egzantp, pour ou fer dimoun konpran sa ki nou pe koz lo la par egzantp nou annan nou bann plant medisinal. E si en lot dimoun dan en lot pei i vini i servi en plant medisinal ki andemik ek Sesel e i prodwir en - si oule en latizann oubyen en keksoz, en lakrenm a baz sa plant medisinal, i sipoze annan en *Benefit Sharing Agreement* ki ganny etabli ant nou e sa lot parti ki sorti dan lot pei, aköz probableman son pei osi i *party to the agreement*.

Lezot pei par egzantp Etyopi pa ti'n fer li e i annan, i annan serten eleman zenetik, ki Etyopi in perdi, ki lezot pei par egzantp *Holland* in *cash* lo la, in fer bokou larzan, milyon e de bilyon Dolar lo la.

Me si nou, nou deza annan *Nagoya Protocol*. Eski i en problenm pour, pour bann Lotorite konsernen met an pratik sa protokol an sa ki konsern *benefit sharing*? E si i annan en problenm kote ki sa problenm i ete e ki zot lentansyon pour sey rezourd sa sityasyon par lefe ki nou'n etabli en premis pour annan kontrol lo lafason ki sa i ganny servi?

Nou pa ti a kontan par egzantp "*neem*", en keksoz ki

nou, nou annan isi, i ganny servi dan en lot pei aköz i annan bann *properties* medisinal. I kapab annan ki'n deza in fini ganny pran ki nou'n perdi, me i annan petet pa ankor ganny pran e ki nou bezwen rod en fason, pour proteze. Mersi Mr Speaker.

### **MR DEPUTY SPEAKER**

Mersi Onorab. *Panel*?

### **MINISTER NAADIR HASSAN**

Mersi Mr Speaker. Mersi Onorab pour kestyon. Mr Speaker avek ou permisyon vi ki sa i en kestyon teknik lo kote Minister Lanvironnman ki mannyer nou *domesticate* sa bann Lagreman ki nou'n agree avek. Mon ava envit *PS* pour Lanvironnman pour reponn. Mersi.

### **MR DEPUTY SPEAKER**

Mersi Mr Matatiken.

### **PS DENIS MATATIEN**

Mersi Minis. Bonzour Mr Speaker. Bonzour bann Onorab e tou dimoun a lekout. Onorab wi, parey ou'n eksplike lo kote *Nagoya Protocol*, Sesel wi i deza en manm ladan.

E an rezilta sa ki nou koman en pei nou'n fer, nou'n deza komans prosedir, e mon kapab dir sa ti komanse en pe boner depi dan bann lannen

2018, kot nou ti annan en Polisi ki nou ti devlope e sa i apel, “*the Seychelles National Access and Benefit Sharing Policy*”. Mon kapab montre ou en kopi la.

E an plis ki sa, ki nou'n osi, nou'n osi pe fer, nou'n deza komans devlop en Lalwa, ki pour ede letan en dimoun parey ou pe fer masyon poudir letan i pe vin Sesel, i annan serten resours zenetik ki i enterese avek, i enportan ki i annan en Lagreman kot nou koman en pei nou osi nou benefisyé.

E parey legzanp osi kot ou'n donner, lo ka Letyopi mon krwar sa ou ti pe *relate* enn pti pe lo sa *issue theft* ki bann lafarin ki zot ti pe servi. E mon krwar i annan bokou mon kapab dir, lemonn nou menm nou'n aprann avek en tel ka.

E mon krwar i enportan pour nou koman en pei aköz pa zis selman pour nou protez nou bann lespes, ouswa mon kapab dir ou bann resours zenetik, me osi lo kote lo parey nou apel sa bann *traditional knowledge*.

Bokou fwa letan en dimoun parey ou pe dir si en lakonpanyen i enterese parey en lakonpanyen farmasi, letan i pour enterese pour rod kekfw a en latizann pour serten maladi, premye keksoz ki i pour rode pour deza rod konesans, kwa ki dimoun i deza pe servi?

E mon krwar sa osi i parey nou konnen i annan bann dimoun parey ki erbalis, i annan bokou nou, nou servi bokou sa bann resours tradisyonnèl e sa i premye keksoz ki zot rode.

Anba sa Lalwa ki nou pe sey fer, ki nou'n aktyelman *draft*, mon kapab dir, ti annan menm nou ti *validate* lo kote son *Bill*, me solman son regilasyon osi i annan ankor en pe travay pour fer lo la.

I enportan pour nou kapab protez, sa bann laspe osi lo kote *traditional knowledge* avek nou resours zenetik tou lede. Mersi.

#### **MR DEPUTY SPEAKER**

Mersi. Ou annan klarifikasyon lo la Onorab?

#### **HON SEBASTIEN PILLAY**

Mersi Mr Speaker. Mr Speaker antretan ki nou pe devlop sa *framework* ki neser, nou konnen poudir nou, nou *blessed* avek de posibilite ganny resours;

Enn lo later, me kot mon krwar nou annan bokou plis potansyel se, se dan lanmer. E i deza annan, bann prodiksyon ki pe fer a labaz bann prodwi, ki nou annan, me nou pa konnen si sa bann prodwi pe ganny

anvoy-e avek en lot *third party* apre.

Eski zot pe fer okenn travay pour *monitor* bann prodwi ki ganny fer a baz serten prodwi Sesel? I kapab en konpanyen lokal ki fer li me ki li i pa konnen ki en lot konpanyen aletranze i servi sa prodwi, pour *enhance* en prodwi ki zot deza annan.

En lot legzanp ki mon kapab donner se *trade* dan *kernel* kokodmer. Par egzanp, i annan serten resers ki pe dir poudir i annan kokodmer, i annan serten propriyete pa zis medisinal, me i kapab menm afrodisyak.

So eski nou pe konmans al dan sa laliny pour nou kapab *monitor* sa? Akoz i potansyel pour vin en lendistri ki kapab zener en kantite - en kantite reveni pour pei, me osi ki nou bezwen protez sa bann resours.

So kote ki sa bann dimoun i ale e ki kote ki annan en repertwar sa bann lenformasyon ki si Lasanble i ler fer *oversight* lo la, oubyen si en dimoun i le gete, kote ki nou pour ganny akse ek sa bann lenformasyon? Mersi Mr Speaker.

### **MR DEPUTY SPEAKER**

Mersi Onorab. *Panel?*

### **PS DENIS MATATIEN**

So lo kote sa kestyon, mon krwar ou'n demann en kestyon ki vreman valid Onorab. Mon krwar sa ki nou, nou kapab dir lo, parey letan ou pe get lo size *kernel*, *kernel* i en prodwi ki pe ganny *trade*.

Me solman parey ou pe dir, son *end uses* nou osi lo kote nou parey lo kote Minister, nou vwar poudir i enportan pour nou konnen pour kwa ki ganny servi. E dapre bann resers ki nou'n fer i annan diferan - diferan keksoz ki zot dir sa prodwi i ganny servi.

E mon krwar sa kestyon ki Onorab in demande premye lo kote parey si nou kapab kit sa *information bank*, mon krwar sa i vreman enportan.

Akoz si demen nou le negosye avek swa en lakonpanyen, ki vin kot nou, mon krwar premye keksoz se ki nou bezwen konnen, kwa ki nou annan e mon krwar sa i enportan pour nou kapab demen kapab negosye mannyer kekfwa si i annan bann benefis ki kapab ganny fer.

Lo kote an term si i annan en repertwar, an se moman mon pa pour dir i annan, me selman, ki mon kapab dir sa bann lenformasyon i en pe eparpiye partou. Parey lo kote - parey si nou pe get lo kote parey

bann *traditional knowledge*, i annan diferan dimoun, diferan erbalis, e sakenn i fer son pratik. I annan i dir ou, i annan pa le dir ou e i annan mon konnen kekfw a ou kapab ganny serten lenformasyon osi parey kote kot kiltir i konsernen.

Me solman an term bann diferan, bann mon kapab dir, bann propriyete sa bann resours zenetik sa i enn pti pe eparpiye partou; nou napa en repertwar. E mwan mon panse *once* ki nou'n fer en Lalwa, parey sirtou letan ou pe koz lo *monitoring* mon krwar i vremen enportan pour ou annan sa repertwar e sa i pour ede.

Demen si en dimoun i anvi vin devan avek ou, zis konmsi pour dir, be *ok* mon ti ava enterese dan en tel prodwi, *then* mon pa kapab dir li mon annan deza annan sa, la nou kapab asize, nou kapab fer en lagreman e sa i kapab parey ou pe dir i kapab anmenn bokou benefis pour pei. Mersi.

### **MR DEPUTY SPEAKER**

Mersi Mr Matatiken. Onorab Loze.

### **HON JOHAN LOZE**

Mersi Mr Speaker. Mr Speaker i enteresan ki Onorab LOTO in lev sa size "*neem*". *The patent for Neem was first filed by W.R.*

*Grace and the Department of Agriculture Lanmerik. L'Inde* in bezwen lager pour son bann propriyete zenetik depi basmati, *neem*, bred mouroum, tou zot in pran.

*Biopiracy* ozordi is the new form of colonialism, kot bann gran lakonpannyen dan was, pe vin dan bann pei tyermonn zot pran sa ki nou annan zot al avek, zot al *patent* enternasyonalman e zot dir pour zot.

Mr Speaker mon pe gete si nou, nou pe pran li dan konsiderasyon Sesel dan Lezislasyon ki nou pour anmennen pour sey *handle* sa zafer *unfair patenting*, ki pe arive atraver lemonn.

E si i kot ou departman, ou annan sa keksoz ki petet Onorab Larue li i ti pe sey leve, ki Liniversite Sesel ti a kapab travay lo sa bann resers, ouswa si ou departman i deza fer sa bann resers, ouswa si zot anvizaz-e fer? Pour sey *stave off* sa ki'n arive avek en pei parey *L'Inde* ki demen nou napa en *case* parey *le fameux "Texmati"* ki kot en lakonpannyen *Texas* ti'n apel basmati rice "*Texmati*". Mersi Mr Speaker.

### **MR DEPUTY SPEAKER**

Mersi Onorab. Panel i annan en larepons.

**PS DENIS MATATIEN**

Onorab mersi pour ou kestyon. Mon krwar kekfwa lo sa kestyon ki ou pe demande, an term kwa ki annan an mezir? Ki mon okouran avek *Protocol Nagoya* i annan en *Clearing-House Mechanism*, kot sak fwa en dimoun i sipoze vin kot ou, i vin sers, i vin rod serten materyo kot sa i ganny poste.

So in deza annan bann diskisyon, kot okenn lakonpanyen parey sirtou letan zot pe fer parey zot anvi fer bann *patenting* kot zot deklare, kote kot i annan parey nou apel sa en *certificate of origin*, kot zot bezwen deklare kote zot in ganny sa prodwi.

E mon krwar lo kote bann *case*, parey ki'n arive e I *mean* baze lo leksperyans ki nou'n vwar, se ki bokou bann dimoun zot in profite pour konmsi pour vremen kot zot in vwar gap, zot in vremen abes sa bann gap e se pour kwa ki ou vwar poudir i annan bokou bann lakonpanyen parey ou pe dir dan was, oubyen dan bann serten landrwa, kot zot in antre dan pei, e zot in pran serten prodwi kot zot in ale zot in *patent*.

E prezan ki ou tant pour remarke, i annan - sa pei li menm li, kot sa resours zenetik

in sorti, i pa'n benefisyé. Me avek sa protokol, sa i en keksoz ki nou kapab *basically track e monitor* lo la. Mersi.

**MR DEPUTY SPEAKER**

Mersi Onorab. Mr Matatiken. I annan en lot Manm ki'n eksprim lentere pour demann kestyon lo sa size me i *management* letan. So nou pour bezwen pran *break* la. Nou ava rezwenn 11er10 avek kestyon 90 ki pour prosen lo nou *Order Paper*.

Donk 11er 10 nou a rezwenn.

**(BREAK)**

**MR DEPUTY SPEAKER**

*Welcome back* tou dimoun. E pou bann ki fek zwenn nou, ankor enn fwa bonzour, pou kontinyasyon nou *Question for Oral Answers* dan Lasanble Nasyonal, ozordi bomaten.

Nou pou aprezan pran kestyon 90. E pou sa kestyon nou ava akeyir avek nou, *Executive Director*, dan biro Sekreter Deta pou Finans manmzel Irene Croisee ki zwenn Minis pou reponn sa en kestyon. E mon ava envit, kestyon i sorti kot Manm Elekte distrik Mont Buxton, mon ava

envit Onorab Flory Larue pou demann kestyon 90 silvouple?

**HON FLORY LARUE**

Mersi Mr Speaker. Eski Minis pou Finans i kapab dir nou lasanble ki mezir ou Minister pe pran pou asire ki kliyan i aret esper en kantite letan pou resevwar en servis ki in peye *online* avek en antite Servis Piblik? Mersi.

**MR DEPUTY SPEAKER**

Mersi Onorab. *Panel?*

**MINISTER NAADIR HASSAN**

Mersi Mr Speaker. Mersi Onorab pou sa kestyon. Mr Speaker, Gouvernman i annan en stratezi lekonomi limerik ki i pe enplimante. Kot enn son priyorite se pou zisteman pou fer plis servis *online* otan ki posib. E osi redwir kantite tranzaksyon *cash* dan son sistenm.

Lentrodiksyon servis limerik sirtou pou ofer kliyan sa opsyon pou pey sa servis *online*, pou ede redwir kantite letan ki kliyan i bezwen espere, pou zot resevwar zot servis ler zot in fini peye.

An se moman i annan 4 antite prensipal ki pe ofer kliyan sa opsyon pou pey zot servis *online*. Akoz zot ki kolekte

plis reveni lo lapar Gouvernman.

Sa se Lotorite Plan Sesel, Lotorite Laysenns Sesel, Divizyon Lanrezistremant e Komisyon Reveni Sesel. Sa servis limerik ki pe ganny ofer, i annan pou lobzektif fasilite proses peyman pou bann man piblik e osi pou Gouvernman. Sirtou sa ki konsern idantifikasyon e alokasyon peyman.

Sa i ava osi ede pou donn kliyan servis ki zot in peye *online* pli vit. Mr Speaker, an sa ki konsern Komisyon Reveni Sesel, resaman Gouvernman in ouver en kont pou SRC, kot Labank Santral. Sa i vedir tou peyman ki relye avek *tax* i bezwen ganny fer dan sa kont, lefe ki SRC i enn bann antite ki kolekte plis larzan de lapar Gouvernman, Louvertir sa kont separe, i vedir pou annan en rediksyon dan kantite letan ki pran pou idantifye peyman kliyan. E donn zot sa servis ki zot in peye.

Parey sa Lasanble i kapab osi konstata, an Zen mon *Minister* in komans en konpany mediatize kot bann *advert* pe pase. E sa pou ale tou dilon sa mwan osi pou konsyantiz e sansibiliz manm piblik pou fer peyman atraver sa bann *platform* limerik.

Nou bi se pou ankouraz plis dimoun pou fer zot peyman atraver sa bann *platform*. Akoz zot lavantaz prensipal, se ki i pli fasil e pli vit pou fer idantifikasyon e alokasyon sa peyman a sa antite respektif. En lot parti sa konpany pe vize ver kliyan ki prefer sa opsyon tradisyonnèl, savedir pou fizikman al labank pou fer peyman.

La nou pe demann zot pou idantifye byen pou lekel antite ki zot pe fer sa peyman, e pou *e-service*. Zot kapab fer sa par tou senpleman ekri limerò *invoice* konplet ki konpri; abrevyasyon sa antite, lannen e sa seri limerò dan seksyon deskripsyon ler zot pe ranpli zot bann form nesese labank.

Tou antite i annan en seri limerò *invoice* ki inik pou li. Sa osi i permet Gouvernman idantifye e fer alokasyon sa peyman pli vit. Mr Speaker, i enportan pou note ki en antite pou selman *process* en servis enn fwa ki annan laprev peyman.

Toudmenm, Mr Speaker dan sa demars pou adopte plis teknolozi e ofer plis servis Gouvernman nou bann *platform* limerick, sirtou an sa ki konsern peyman, anvi nou plan a long term, pou redir

kantite tranzaksyon *cash* dan Gouvernman.

Mon a profite pou fer en lapel avek tou kliyan Gouvernman pou otan ki i posib pou zot servi sa opsyon peyman *online*.

Akoz i anmenn bokou benefis pou zot, e pou Gouvernman. La osi mon ofer en lapel avek sa bann antite ki pe ofer sa servis *online*, pou zot osi kominik plis avek zot kliyan. E pou eksplik zot pli byen bann prosedir entern, avek bi donn manm piblik en pli bon konprenezon mannyer zot sistenm entern i marse. Mersi Mr Speaker.

### **MR DEPUTY SPEAKER**

Mersi Minis. Onorab Larue, ou annan siplemanter lo sa keston?

### **HON FLORY LARUE**

Mersi Mr Speaker. Mersi Minis pou ou larepons.

Minis, eski ou pe dir nou ki letan en dimoun pe fer en peyman pou en antite Gouvernman, kot son kont i en kont santralize avek *Central Bank* ki i annan en proses *manual in between*. Kot letan sa proses in ganny fer par sa kliyan dan labank. Ki apre i bezwen atann en dele letan pou



sa servis ganny *process* pou li apre reganny en konfirmasyon?

E an relasyon avek plan Gouvernman pou fer ki plis servis dan Gouvernman i vin *online*, swa pou bann tranzaksyon finansyel, swa tranzaksyon dokimantasyon letan dimoun pe ranpli bann *form*, eski Gouvernman an antye i annan en plan pou tou bann servis ki piblik i gannyen? E ki demars zot pe fer pou fer sa vin en realite? Mersi.

### **MR DEPUTY SPEAKER**

Mersi Onorab. *Minister*?

### **MINISTER NAADIR HASSAN**

Mersi Mr Speaker. Mersi Onorab. Onorab, defayans, ou konnen - ler nou ti komans ganny en pe konplent ki bann dimoun i fer peyman, me i annan en dele letan ki ler zot fer peyman, apre servis i ganny donnen. So, ler nou'n regarde *issue* se ki bann ki nou apel *reconciliation*.

Sa rekonsilyasyon, sa peyman i antre sa peyman i *link* avek ki *invoice* ki sa.

Sa i en prosedir *manual* ki ti pe arive, e ti pe ganny bokou difikilte bann *Minister* pou zot kapab war lekel peyman ki pe al avek lekel servis. So, sanmenm sa ki nou'n met an plas en *working group* dan *Minister*

*Finans*. E ti annan osi *Labank Santral* lo la, akoz zot ki fer peyman ansanm. Ti annan *Trezor*, kot nou'n *come up* avek sa nouvo prosedir ki pou fer bann peyman vin pli otomatik dan son *reconciliation*.

Savedir sa ler i an plas i a fer mwens letan pou fer sa *reconciliation*, ki prezan sa servis i ganny donnen pli vit, *ok*?

Lo dezyenm kekyon lo plan Gouvernman, Onorab! Mon *chair* nou'n apel li *the Digital Economy High Level Steering Group*. E plan Gouvernman lo kote *digitalization* tou bann servis lo ki *inclusive of* bann peyman tou, i ganny diskite li sa komite. I annan en plan aksyon.

I annan en plan *digitalization*, Gouvernman an antye *from* servis ki i ofer piblik. *From* son bann *work fee processes*, *from* son bann peyman. E sa i annan en *prioritization* ki'n ganny *agree in terms of* kantite resours ou annan pou nou fer li. So, plan Gouvernman i la, i pe fini komans ganny egzekite dapre kantite resours ki nou annan.

Nou antisipe ki sa dernyen *next 2an* ou mwens, nou kapab fini *provide* antye sa bann servis *digitalization* dan Gouvernman. Mersi.

**MR DEPUTY SPEAKER**

Mersi *Minister*. Napa okenn lezot kestyon siplemanter lo sa kestyon ki'n ganny endike. Donk, nou ava bouz lo lot kestyon. Akoz manmzel Croisee pe reste avek nou pou lot kestyon 92.

So, ki nou pou fer la, nou pou sot kestyon 91 Onorab Labrosse. Nou ava pran kestyon 92 Onorab Gill, koumsa nou ava kapab zis sanz bann zofisye ki pou la. *Proceed*.

**HON CHURCHILL GILL**

Mersi Mr Speaker. Minis, kestyon i lir koumsa. Eski Minis i kapab eksplik sa Lasanble:-

a) Ki zistans lenplimantasyon sa sistenm *Integrated Financial Management System* in arive e eski in kapab finans sa sistenm dan son totalite a sa sonm ki ti'n ganny bidzete? Mersi.

**MR DEPUTY SPEAKER**

Mersi Onorab. *Panel?*

**MINISTER NAADIR HASSAN**

Mersi Mr Speaker. Mersi Onorab pou ou kestyon. Mr Speaker, Gouvernman in fer en gran amelyorasyon dan lafason ki finans piblik i ganny bidzete, egzekite, zere, raporte e rann kont atraver plizyer reform ki'n

ganny enplimante pou bokou plizyer lannen.

Me in ariv en pwen kot nou sistenm teknolozi pa pe kapab siport plis reform e modernizasyon ki Gouvernman pe anvizaze. Sa i akoz sistenm i *manual*.

E osi diferan sistenm pe ganny servi pou diferan fonksyon, e zot pa entegre. Se pou sa rezon ki Gouvernman in deside enplimant en sistenm entegral, pou zesyon e lenformasyon finansyer, sa ki nou apel *IFMIS*.

Sa i pou permet bann prosedir finansyel prensipal Gouvernman ganny fer dan en sel sistenm. E entegre avek kanmarad, e i osi permet ki maksimonm lenformasyon finansyel Gouvernman i ganny zere dan en sel sistenm. Ki a osi fer ki lenformasyon i ava vin pli aksesib.

Bann prosedir ki ekspekte fer dan sa sistenm i enkli, preparasyon, egzekisyon e kontrol Bidze Gouvernman. Peyman ki Gouvernman i fer e kolekte, rikord e rapor bann lenformasyon finansyel.

Sa sistenm entegre, i pou rann prosedir e servis finansyel Gouvernman pli vit, pli efikas e amelyor lo transfer lenformasyon finansyel parmi bann lorganizasyon dan pei.

I pou osi permet Gouvernman pou moderniz lezot prosedir, tel ki prosedir peyman. Lenformasyon ki pou pli aksesib pou fer ki i annan plis latransparans dan lenformasyon finansyel Gouvernman.

Mr Speaker, sa sistenm li menm i dan son bann premye faz lenplimantasyon, kot bann dokiman teknik ki pou gid spesifikasyon sa sistenm anliny avek bezwen e *process* finansyel dan Gouvernman pe ganny evalye par en lekipe dan Minister Finans, avek gidans en konsiltan Fon Monneter Enternasyonal.

Sa faz i tre enportan aköz i pou asire ki tou bezwen en Gouvernman e son *process flow*, ek bon pratik e standar i ganny pran an kont avan ki proze i al lo *tender*. Premye faz evalyasyon bann dokiman teknik in konplete an Zen. Sa dezyenm faz evalyasyon i ekspekte konplete dan 3enm kar sa lannen.

Enn fwa ki sa faz evalyasyon i fini, Minister i ava kapab komans travay lo dokiman *tender*. E *tender* li menm i ekspekte lanse avan lannen fini, e sistenm i ekspekte vin operasyonnel an 2025.

Mr Speaker, en *Steering Committee* ek en Komite Teknik ki konpri bann partner relevan tel ki Labank Santral, Departman Lenformasyon Teknolozi Lenformasyon; e osi byen ki diferan group travay bann *working groups* in ganny met an plas pou lenplimantasyon e gidans pou sa proze.

Parey mon'n mansyonnen avan, Minister pe osi ganny lasistans teknik sorti kot Fon monneter Enternasyonal pandan sa premye faz proze. Minister i osi dan prosedir pou apwent eksper lokal, e osi byen ki enternasyonal. Aköz Gouvernman napa tou sa ekspertiz e leksperyans dan lenplimantasyon en tel sistenm.

Konsernan sa sonm ki'n ganny bidzete pou sa nouvo sistenm finansyel, Minister in fer en provizyon R30milyon an 2023, R75milyon an 2024, R45 milyon an 2025. E in prevwar ki sa Bidze pou sifizan. Mersi Mr Speaker.

### **MR DEPUTY SPEAKER**

Mersi *Minister*. Onorab Gill, ou annan siplemanter?

### **HON CHURCHILL GILL**

Mersi. Mersi Minis pou ou leksplikasyon. Mon premye kestyon se vi ki sa sistenm i pou

en sistenm tre entegre, eski i pou ganny *manage* par Labank Santral oubyen pou annan en konpanyen ki pou ganny met an plas pou asir fonksyonman sa sistenm?

Mon dezyenm keston, eski vi ki nou pe ganny ekspertiz avèk Fon Monnetè Enternasyonal. Eski sa sistenm osi i pou fer ki bann *requirements* Fon Monnetè Enternasyonal, i pou tonm an reg enn fwa ki sa sistenm i an plas?

E mon deryen keston se pou *functionality* s sistenm par bann *users*, eski sa osi i pou en keksoz ki pou asire ki ler sa kantite depans ki nou pe fer pou bann *user* ki pe servi sa i devret kapab *smooth* kot nou pa ganny okenn problem? Mersi.

### **MR DEPUTY SPEAKER**

Mersi Onorab. *Panel?*

### **MINISTER NAADIR HASSAN**

Mersi Mr Speaker. Mersi Onorab pou ou bann keston siplemantè. Lo premye keston, sistenm li menm li i pou dan Minister Finans. Me parey nenport ki *software* ki ou annan ou pou bezwen annan en sistenm sipor avèk sa lakonpanyen ki'n devlop sa sistenm. Sa i normal.

Me nou osi annan en tim *set up* dan Minister Finans ki annan bann *skill set IT*, ki pou kapab asire pou *maintain* sa sistenm. Dezyenm keston lo si sistenm li menm li i *cater for international requirements*. Wi, Onorab, anefè mon kapab dir preparasyon proze in pran en pe plis letan. Me akòz nou oule fer sir nou ganny li byen, *ok?*

Akòz nou pe fer en gro lenvestisman, e pou mwan preparasyon i vremen sa keksoz kritik pou fer sir ou kouven tou keksoz. E ki nou sa konsiltan *IMF* pe travay ek nou, i osi konpran kontèks lokal ler nou pe enpliman sa proze. So, mon konfidan ki tou bann *requirement* enternasyonal pou ganny *meet*.

Lo kote *functionality of system* wi, sa i toultan enn bann *challenge*. Akòz *developers* toultan zot tant pou devlop en sistenm ki zot, zot konpran. Me i enportan *to take into account* bann dimoun ki pou servi sa sistenm. E sanmenm sa ki bann *working group* i annan bann diferan *stakeholders* lo la. Ki zot, zot osi zot kapab met zot bann *input* lo sa, dan sa preparasyon proze.

Me lot keksoz kle osi, se *training*. Ler sistenm pou al an mars, i enportan ki nou pou

donn sa *training* tou bann antite Gouvernman, pou zot kapab servi li *maximize* sa lenvestisman ki nou'n fer. Mersi.

**MR DEPUTY SPEAKER**

Mersi *Minister*. Onorab Aglae?

**HON EGBERT AGLAE**

Mersi Mr Speaker. Minis ou'n site dan ou larepons i annan apepre ler mon kalkile sonm, apepre R200milyon pe al ganny depanse. Premyerman, eski ladan i annan en konponan bidzeter ki antre avek *IMF* pou kapab finans sa, dan son totalite dan lim menm?

E dezyenmman anvi ki osi annan serten lorganizasyon parey *World Bank* osi ki annan bann lekspertiz, eski Gouvernman in apros *World Bank* osi pou ganny sipor bidzeter dan sa laliny. Mersi.

**MR DEPUTY SPEAKER**

Mersi Onorab. *Minister*?

**MINISTER NAADIR HASSAN**

Mersi Mr Speaker. Mersi Onorab. Onorab sa *amount* ki an total i ariv apepre R150milyon, i ganny finanse par en *line of credit from* Gouvernman Lenn. Mersi.

Wi, Onorab *IMF* ek *World Bank* normalman pa donner

bann *project financing* koumsa. Me ki zot pou *provide* ou, se bann lasistans teknik. E parey ou war pou sa enn proze, nou'n ganny en kantite lasistans avek *IMF*, lo kote son laspe teknik enplimantasyon sa proze. Me *in terms of* finans sa proze li menm sa i pa en keksoz ki zot fer. Mersi.

**MR DEPUTY SPEAKER**

Mersi. Mon pa war okenn lezot dimoun ki'n endike zot oule demann kestyon siplemanter lo sa size. Donk, nou ava remerci manmzel Croisee pou zwenn nou ozordi bomaten. Nou ava swet li bonn kontinyasyon lazournen.

Nou ava fer provizyon pou kri 2 lezot zofisye ki sipoze zwenn nou pou kestyon 91. Pou nou kontinyen avek kestyon 91, e nou ava dir labyenveni Mr Randolph Samson ki Sef Egzekitiv *Financial Services Authority FSA*. E osi manmzel Odile Vidot, ki Direkter Zeneral pou *Financial Services Development Division*, mon prezimen touzour kot *FSA* sa. Donk, byenveni. E Onorab Richard Labrosse, kestyon i pou ou.

**HON RICHARD LABROSSE**

Mersi Mr Speaker. Bonzour Mr Speaker, bonzour tou dimoun

ki a lekout. Bonzour bann koleg isi prezan.

Mr Speaker, avan mon demann mon kestyon mon ti a kontan dabor felisit Mr Samson pou son lapwentman koman *CEO FSA*. E sa mon krwar i son premye zour, son premye fwa ki i vin dan Lasanble Nasyonal. En dimoun serye e travayan, e osi en ansyen koleg travay.

Mr Speaker san tarde mon al lo kestyon 91.

Swivan demann dan Sekter Finansyel, sirtou dan *securities dealer* ki Minister Finans ansanm avek *FSA* pe fer pour ankouraz plis dimoun pou zwenn sa domenn ki an demann a se moman?

### **MR DEPUTY SPEAKER**

Mersi Onorab. Mon ava envit *panel* pou repons.

### **MINISTER NAADIR HASSAN**

Mersi Mr Speaker. Mersi Onorab pou ou kestyon. Mr Speaker, pandan pandemik *COVID-19* Sekter *Securities* i en sekter ki'n reste rezilyan, par lefe ki sa bann biznes in deza adopte en model biznes ki enkli; lenfrastruktir teknolozi e bann lezot fason efikas pou zot opere.

Sekter *Securities* i donn abilite endividi pou annan lenvestisman alternativ konpare avek zis mentenir

lenvestisman pli tradisyonnèl parey *deposit* kont dan en kont labank. I vre ki *security dealer* i en kategori biznes dan sa sekter, ki annan en logmantasyon dan demann. E bokou lagrandisman dan zot loperasyon.

Sa sekter i annan potansyel pou devlope, e anmenn bokou benefis direk e endirek pou pei. Me pou devlop sa sekter, pou pei ganny *maximum* benefis, nou pou bezwen en group travayer tre kalifye ki annan sa formasyon ek ekspertiz dan sa domenn.

Mr Speaker, lo kote Gouvernman devlopman kapasite resours imen dan Sekter *International Finance* an zeneral, i en bann priyorite dan son plan nasyonal pou devlopman resours imen. Dan sa sekter, *package* saler i enn ki tre o, ki fer sa sekter enn tre atiran e konpetitif pou bann profesyonnel Seselwa.

Me nou pli gran defi e ki nou napa ase Seselwa ki'n ganny formasyon, ki kalifye e ki annan lekspertiz pou travay dan sa sekter. Toudmenm, loportinite pou travay e ganny formasyon dan sa sekter i annan Mr Speaker.

An se moman i annan diferan program ki pou ofer Seselwa sa sans, pou devlop zot

kapasite dan sa sekter, pou annan premyerman program labours Gouvernman.

Etidyan ki swazir pou al etidye dan okenn domenn dan Sekter Finansyel pou ganny priyorite, anliny avek nou plan nasyonal pou devlopman resours imen. An menm tan, nou osi annan lezot partner ki pe ofer labours ki priyoritiz sa sekter.

Mr Speaker, Lotorite Finansyel Sesel (*FSA*) i deza annan en program kot i ofer labours kalifikasyon lo nivo diplom avek *Charter Institute for Securities and Investment*. Bann diplom ki *CISI* pe ofer, i spesyalize dan bann domenn enportan pou sa sekter, tel ki *compliance*, *investment operations* e *capital markets*.

Sa labours i donn dimoun, i donn bagaz bann endividi ki deza dan sa sekter e osi donn loportinite bann endividi ki an deor sa sekter. *FSA* i osi annan bann lezot formasyon i ofer dan bann domenn kont blansisaz larzan ek *compliance*. E sa i ganny fer an kolaborasyon avek *International Compliance Association (ICA)*.

*FSA* pe kontinyen donn son langazman pou asiste sa sekter, pou fer sir ki bann endividi ki pe travay dan sa sekter i devlop bann lekspertiz

neseser. Sa mezir pou kre plis loubraz. E an menm tan kre lekspertiz lokal dan sa domenn.

Labank Santral osi i annan son program labours ki i ofer tou le-z-an, kot lanfaz lo Sekter Finansyel an zeneral. *Scheme loan* edikasyonnel ki Gouvernman in lanse resaman, avek bann Labank Komersyal i osi en opsyon. E i osi konsider bann sekter ki relye avek devlopman sa sekter, tel ki lenformasyon teknolozi.

Mr Speaker, Gouvernman i realize tre byen retonbe lekonomi, e finansyel domenn *securities dealer* pou pei. I pou sa rezon ki nou an konsiltasyon avek tou partner dan sa sekter, pou nou travay lo en plan detaye ki mannyer nou devlop sa domenn, ki pran kont potansyel bann defi. E propoz rezolisyon pou nou pei ganny *maximum* avek sa sekter.

Bann lezot laspe ki pou ganny adrese apard zis devlopman resours imen, i;

1) Ki mannyer pou fasilite prezans fizik sa bann *securities dealer* isi.

2) Laplikasyon sistenm *tax* pou sa sekter.

3) Asire ki tou Lalwa ki pou regulariz sa sekter i an konformite avek lezot, par egzanp *Lalwa Tax*.

4) Ranforsi regilasyon pou siperviz sa sekter.

5) Ranforsi kapasite *FSA* pou siperviz sa sekter. E dernyen devlop lezot lenfrastruktir parey biro, batiman oubyen later, pou ki sa sekter i kapab fer zot loperasyon.

Mr Speaker, avek tou sa travay ki pe ganny fer pou devlop sa Sekter *Security Dealer*, Gouvernman pou bezwen asire ki nou ziridiksyon i reste touzour an konformite avek bann lobligasyon enternasyonal pou pa konpromi nou repitasyon koman en pei. Mersi Mr Speaker.

### **MR DEPUTY SPEAKER**

Mersi *Minister*. Onorab Labrosse i endike ki i annan siplemanter lo la?

### **HON RICHARD LABROSSE**

Ok, Minis mersi byen pou ou bann larepons byen detaye. Mr Speaker mon ti annan zis 2 pti klarifikasyon mon ti a kontan Minis i eklersi lo la pou mwan.

Premyerman nou konnen ki Servis Finansyel Sesel *actually IBC* ki nou pe koz lo la, i dan son semen ler nou pe gete, i dan son semen pou *fade away* avek bann nouvo keksoz ki pe devlope.

La nou konnen poudir i annan en bon pe dimoun ki dan sa sekter *actually* ki'n komanse ki dan parey nou dir *CSP*. Eski Minis ouswa *FSA* i kapab dir nou, ki bann tranzisyon zot pe fer ek sa bann travayer ki'n deza annan diferan leksperyans dan sa bann lannen?

Mon dezyenm kestyon i, eski i annan en dialog ant Minister Finans ouswa *FSA* ek bann lenstitisyon profesyonnel, ki pe donn bann kour bann zenn, sirtou dan bann lenstitisyon pos-segonder menm ouswa liniversite ouswa menm Lenstiti *Guy Morel*? Mersi.

### **MR DEPUTY SPEAKER**

Mersi Onorab. *Panel*?

### **MINISTER NAADIR HASSAN**

Mersi Mr Speaker. Mersi Onorab pou ou bann kestyon siplemanter. Lo kestyon tranzisyon *from* sa vye model biznes *IDC* pou nouvo. Mon krwar lanfaz i devret bokou lo *reskilling, retraining*. Bokou mon mazine sa bann *staff* i deza annan sa labaz. Me i vremen pou zot servi sa avek bann loportinite formasyon spesyalman i fer sir i met devan pou zot kapab *increase* zot *knowledge* dan bann nouvo *areas*. Me labaz i la i zis annan



pou zot *reskill* e *retrain* dan bann nouvo *area*.

Lo kote diskisyon, Onorab zis pou enform ou mwan menm mwan personnelman mon'n fer diskisyon avek bann antite parey Liniversite Sesel, avek *Guy Morel Institute* e Minister Ledikasyon. E osi la i annan bann *talks* ki nou pou al fer, bann *careers guidance talk* ki nou pou al fer avek bann diferan etidyan dan segonder, dan *A-level*, *Business Studies*. Pou nou donn zot plis vizibilite ki bor pei pe ale. E ki loportinite lanplwa ki egziste e ki pe vini.

So, sa i en keksoz ki annan en kantite lanfaz pe ganny mete lo la a sa moman. Mersi.

#### **MR DEPUTY SEAKER**

Mersi *Minister*. Onorab Hoareau.

#### **HON JOHN HOAREAU**

Mersi Mr Speaker. Mr Speaker, mon ti a kontan demann Minis ki zistans zot in arive avek en Lalwa konpreansiv zisteman pou diriz sa sekter dan nou lekonomi? Vi ki bokou keksoz par egzanp lo size mendev, si ou pou kapab *outsource* oubyen si ou pou kapab servi en dimoun *part time* oubyen bann size koumsa i sipoze ganny met anba en Lalwa. Alor mon oule

konnen ki zistans zot in arive avek en Lalwa pou kontrol sa? Mersi.

#### **MR DEPUTY SPEAKER**

Mersi Onorab. Minis, ou annan en larepons pou sa?

#### **MINISTER NAADIR HASSAN**

Mersi Mr Speaker, Onorab. Mon krwar ki ou pe koz lo la se sa laspe sibstans, ki bann *requirements*? Mon ava zis pas avek *FSA*, ki a donn en *update* ki bor sa *White Paper* i ete lo la.

#### **MR DEPUTY SPEAKER**

Mersi. Mr Samson.

#### **CEO FSA RANDOLPH SAMSON**

Mersi Speaker. Bonzour Mr Speaker, mersi Minis pou pas laparol. Mersi Onorab Hoareau. E mon ti a kontan dir en mersi *as well to* Onorab Labrosse *for your kind words*.

Pou komanse lo kote *the White Paper FSA* nou'n komanserten travay lo kote *improving* sibstans dan Sekter *securities*. E sa travay *basically given* ki nou annan en ta *licensee* avek dimoun ki *involve* dan sa sekter. Nou'n komans li atraver en *White Paper* kot i annan diferan Lalwa ki nou bezwen sanze dan sa *Securities Act* dan

serten regilasyon ki nou bezwen sanze *as well*.

E nou'n *actually* fer sa prosesis kot nou'n diskit avek bann *licensees*, e *currently* nou annan en sesyon avek bann *licensees at the level* konmsi fizik ki nou pe zwenn ek zot. Sa i pou le 19 Zilyet, kot nou pou zwenn avek tou *licensees to go through the final points of the White Paper*.

So, *some of the matters* ki on discussion avek lendistri, i of course the main one is substance. And par anba substance i annan fizik. Fizik prezans fizik serten dimoun ki ou bezwen dan *jurisdiction*. Parey nou konnen pou kapab *regulate* en sekter, ou bezwen dimoun ki la, dimoun ki ou kapab vwar ou kapab *regulate* zot.

E enn bann keksoz ki nou pe gete lo kote direkter, *to have* direkter isi Sesel. E lo kote *the compliance function that's one as well* ki pou le moman i en fonksyon ki nou pe *outsource*. Akoz nou konnen poudir i annan en serten mankman dan mendev. So, *it's going to take some time to bring the industry* konmsi lo sa standar ki nou, nou bezwen.

So, *the outsourcing is one aspect* ki nou pe gete ki *whether* nou pou *allow outsourcing to*

*continue*. Akoz pou le moman nou annan en ta dimoun ki pe *provide outsourcing services, to the securities dealer licensees*. E an plis ki sa i annan serten fonksyon ki *presently* koman *supervisor*, nou remarke ki *there are certain issues* letan i vin lo kote *complaints*.

Nou war en ta konplent from kliyan, *from* bann investiser. So, travay pe ganny fer *as part of the discussion* pou sa *White Paper* pou fer sir ki poudir *the complaints handling mechanism is at par to international best practices*.

### **MR DEPUTY SPEAKER**

Mersi Mr Samson. Onorab Aglae.

### **HON EGBERT AGLAE**

Mersi Mr Speaker. Mon pou kontiny kot i konsern Lalwa. Nou annan nou *Securities Act* ki date depi 2007. Eksplik mwan si nou pe vin avek en lot Lalwa *more comprehensible* konpreansiv, pou *phase out* sa enn ki *existing* depi 2007 ki govern Lalwa kot i konsern bann *guidelines*, kot i konsern bann *security dealers*.

E dezyenmman konbyen *license operated securities dealer* ki valid, ki zot in aprouve ziska *maintenant*. Mersi.

**MR DEPUTY SPEAKER**

Mersi Onorab. Eski *panel* i annan sa bann lenformasyon avek zot?

**MINISTER NAADIR HASSAN**

Mersi Mr Speaker. Mersi Onorab pou ou kestyon. Lo kote *Securities Act*, nou pou napa en nouvo *Securities Act*. Me i pou en lamannman *of the 2007 Act*, lo kantite *licensee security dealers* ou annan *as at of day* i annan 144. Mersi.

**MR DEPUTY SPEAKER**

Mersi *Minister*. Onorab Larue.

**HON FLORY LARUE**

Mersi Mr Speaker. Minis, an vi ki dan ou larepons ou'n dir ki akse avek finansman, pou devlop konnesans dan sa sekter i enn bann defi ki bann dimoun ki ti a kontan devlop zot lekor i trouv zot ladan. E lefe ki in annan en debousman ki'n vin dan latansyon Minister Finans atraver kominikasyon ki'n ganny fer direkteman avek SS Payet de lapar en reprezantan pou *UNICAF*. Sirtou pou siport devlopman par *staff* ki deza *in service* pou kapab *achieve* en degre, *Masters-ouswa* Doktora. Ki plan ki Minister Finans i annan pou siport sa devlopman?

**MR DEPUTY SPEAKER**

Mersi Onorab. *Panel?*

**MINISTER NAADIR HASSAN**

Mersi Mr Speaker. Mersi Onorab pou ou kestyon. Onorab parey mon'n mansyonnen dan mon larepons, konmsi a nivo Minister Finans e osi Departman *National Planning*, nou oule fer nou annan sa plan resours imen. E dan sa plan resours imen parey mon'n anonse, Sekter Finansyel i en priyorite ladan.

Prezan ki nou oule fer *available*, avek bann *potential employee*, se en varyete opsyon ki mannyer zot kapab ganny *access* avek *training*. *Ok?*

So, *training* i vin dan diferan laform. I annan bann *training* kourt term. Bann *training long term*, e i annan *training* ki *funded*, i annan *training* ki pa *funded*, *ok?* So, lo bann *training* ki pa *funded*, nou annan sa *Education Loan Scheme* ki nou'n met an plas.

Me nou osi donn piblik en levantay opsyon ki *available*. E nou as Gouvernman nou pou pran tou of ki nou gannyen, e met sa devan bann etidyan, bann *staff* ki *in service* pou zot *make use of it*. Mersi.

**MR DEPUTY SOEAKER**

Mersi. Onorab Larue, ou annan klarifikasyon?

**HON FLORY LARUE**

Mersi Mr Speaker. Mersi Minis pou ou larepons. Minis i annan en serten kantite larzan ki pe ganny *donnen* koman *scholarship* par UNICAF. E dan zot lalis *training*, zot annan sa kad finansyer dan sa 3 kalite sertifikasyon, Degre, *Masters* e Doktora. E dan sa ka, sa dimoun ki *sponsor* sa etidyan i vwar li pe pey kekfwa zis 25poursan sa *scholarship*.

E sa i fer ki i atiran pou Gouvernman si zot, zot oule le donn sa kalite *training* zot *in-service staff*. Eski zot pe donn sipor sa dimoun ki'n vin kot Minister Finans pou demande ki sa *fund* i ganny zere par en pli gro antite? Akoz li, li menm li i pa pou kapab zer sa kantite larzan ki UNICAF pe propoze pou Sesel? Mersi.

**MR DEPUTY SPEAKER**

Mersi Onorab. Lenformasyon ki mon annan, se ki sa endividi ti an kontak avek SS Payet. E i annan en *meeting* ki'n ganny *set up* pou zot diskit sa *scholarship* program *from* UNICAF. Mersi.

**MR DEPUTY SPEAKER**

Mersi *Minister*. Sa ti dernyen entervenans ki'n eksprim lentera pou koze lo sa size. Nou ava remersi Mr Samson pou avek nou bomaten, e osi manmzel Odile ki dayer i travay Minister Finans. Mersi pou vini.

Nou pou aprezan pas lo kestyon 93. E nou ava fer laranzman pou ganny sa 2 lezot zofisyè. Bonn kontinyasyon pou nou 2 zofisyè ki avek nou. Nou pou aprezan kontinyen avek nou sesyon kestyon, e nou ava *welcome* 2 travayer sorti Labank Santral avek nou. Dabor nou annan manmzel Trudy Lucas ki en *Senior Economist*. E osi Mrs Pauline Raoul, ki en *Market Conduct Analysis*. Tou lede i sorti kot CBS, *welcome*. Mon ava envit Onorab Labonte pou poz son kestyon silvouple.

**HON ANDY LABONTE**

Mersi Mr Speaker. Bonzour Minis ek ou *panel*. Kestyon i lir koumsa;

Avek konsern piblik lo lentera *loan* personnel ki bann endividi i pran, eski Minis atraver Labank Santral i annan lentansyon lans en dyalog pou ankouraz bann bankye reviz zot kou lentera? Mersi.

**MR DEPUTY SPEAKER**

Mersi Onorab. Mon ava envit Minis pou larepons.

### **MINISTER NAADIR HASSAN**

Mersi Mr Speaker. Mersi Onorab pou sa kestyon. Mr Speaker avan mon lir larepons pou sa kestyon, i enportan pou mwan eksplike ki responsabilite Polisi Monneter i tonm anba responsabilite Labank Santral. E ki Minister Finans pa enterfer dan Polisi Monneter.

Sa i rezon akoz Labank Santral i annan son lotonomi ek lendependans. Savedir, larepons ki mon pe al lir i enn ki prepare par Labank Santral. E avek ou permisyon Mr Speaker, bann kestyon a ganny adrese par bann teknisyen Labank Santral.

Mr Speaker, Labank Santral atraver son Polisi Monneter ki ganny anonse tou le 3 mwan, i gid Lenstitisyon Finansyel lo ki direksyon lentere i sipoze bouze. Sa i an liny avek son lobzektif prensipal ki pou promouvwar stabilite dan pri komodite e servis dan pei.

Tou le 3 mwan apre ki Labank Santral i pran desizyon lo Polisi Monneter, i annan en langazman avek sa bann Lenstitisyon Finansyel atraver sa ki apel en *Bankers Forum* e

bann faktor lokal e enternasyonal ki'n ganny pran kont pou ariv lo sa desizyon.

Bann lenstitisyon finansyel lo zot kote, zot in ganny sans pou diskrit lo sa desizyon e rod okenn klarifikasyon. Pandan sa rankont Labank Santral i touzour souliny lenportans, ki son sinyal i sipoze annan lo marse finansyel.

Toudmenm, bann lenstitisyon finansyel i lib pou deside lo lentere lo zot loan ek deposit, gide par Polisi Monneter Labank Santral. Enn bann faktor kle ki lenstitisyon finansyel i konsidere ler zot ofer fasilite kredi, i degre risk asosye avek sa *loan* ouswa sa kliyan.

I annan 2 kalite *loan*, *secured* kot bann Labank i demann serten sekirite ouswa garanti. E *unsecured* kot napa okenn garanti ouswa sekirite. Normalman tou lentere lo bann *secured loans* i pli ba ki *unsecured loans*. Sa i akoz risk asosye avek *secured loan* i pli ba, an vi ki i annan en garanti ouswa sekirite atase avek.

Par kont Mr Speaker, mon analiz i montre ki popilarite bann *unsecured loans* i ogmante anvi ki kliyan pa bezwen okenn sekirite e i pli fasil pou ganny sa kalite *loan*. Me sa i vin avek en kou.

An sa ki konsern *loan personal* spesifikman, sa i relye avek depans prive e konsonmasyon par endividi. Sa kalite *loan* i tonm prensipalman dan kategori *unsecured*. Parey nou konnen Sesel i enport laplipar keksoz ki ganny konsonmen.

E alor pli gran parti sa bann *loan* personnel, i ganny e sanze lo marse deviz etranzer. Plis i annan demann pou sa bann tel kalite *loan*, plis demann pou deviz etranzer i ogmante.

Evantyeleman logmantasyon dan demann pou deviz etranzer i kapab anmenn en depresyasyon dan valer Roupi, si lakantite deviz ki i annan lo marse pa ogmante li osi. Par konsekans en depresyasyon dan valer Roupi, i anmenn logmantasyon dan pri komodite e servis lo marse domestik ouswa lenflasyon.

Mr Speaker, lobzektif primer Labank Santral i pou promouvwar stabilite dan pri lo marse domestik. Alor Labank Santral i ankouraz piblik pou servi bann fasilite ki ganny ofer dan sistenm finansyel pou ogmant lenvestisman olye pou depans lo konsonmasyon. Mersi Mr Speaker.

### **MR DEPUTY SPEAKER**

Mersi *Minister*. Onorab Labonte.

### **HON ANDY LABONTE**

Mersi Minis pou ou larepons. Parey Minis in dir ki i direkteman Labank Santral ki *deal* avek sa bann konsernan lentere *and so on*. So, en pti leklersisman petet vi ki nou annan *Bank Association*, eski Labank Santral i annan en mekanizm oubyen petet en fason pou li kapab enfliyans petet oubyen pran bann desizyon petet avek *Bank Association*, pou anpese ki i annan en *cartel*?

Akoz ler ou pe gete mazorite labank i pe plizoumwen sarz parey, i pa vreman annan sa konpetisyon ki ler ou dir ou pou sorti kot enn ou pou al kot en lot, ou pe ganny en pli meyer *deal*.

Aprè lo lot kote parey Minis in dir, i annan *secure loans and unsecure loans*, lamazorite dimoun konmela i pran en *loan* plizoumwen pou li kapab ganny en keksoz si oule.

So, vi ki nou deza annan en Labank parey *Nouvobanq* ki i plizoumwen ganny gete koman Labank Gouvernman, eski *Nouvobanq* koman en labank ki Gouvernman i annan *share* or i form parti, i kapab komans par annan serten negosyasyon or

donn legzanp ki lezot labank i kapab swiv? Mersi.

**MR DEPUTY SPEAKER**

Mersi Onorab. E mon krwar Minis i ava endike ki i ava les bann teknisyen CBS reponn son bann kestyon.

**MINISTER NAADIR HASSAN**

Mersi Mr Speaker. Mersi Onorab. Mon a zis pran sa dernyen kestyon, akoz li lo kote *Nouvobanq*. Sa i kot Gouvernman i annan *shares* ladan. Onorab, *Nouvobanq* in toultan *operate* koman en Labank Komersyal, avek *minimal* lenterferans *from* Gouvernman, *ok?*

Me en keksoz ki nou'n toultan pouse e par egzanzp lo to lenterere, to lenterere lo *loan* sa ki nou apel bann *loan housing*, pou le moman par egzanzp *Nouvobanq* i annan to lenterere pli ba lo *housing* ki 5.5poursan. So, sa i en keksoz ki Gouvernman in koze avek *Nouvobanq* pou regarde si zot in kapab fer desann. In desann ziska 5.5poursan.

E parey mon'n dir i annan *minimal interference*, akoz *Nouvobanq* i *operate on commercial terms*. E nou pa devret enterfer ladan. Mersi. Pou larestan kestyon mon a pas avek CBS. Mersi.

**MR DEPUTY SPEAKER**

Mersi *Minister*. Nou ava envit swa manmzel Lucas ouswa Mrs Raoul pou reponn.

**SENIOR ECONOMIST TRUDY LUCAS**

Bonzour Mr Speaker. Bonzour tou Onorab. Mr speaker, lo kote, lo kote langazman ki nou annan avek *Bankers Association* parey Minister in ganny li, parey nou'n prepare. E nou annan sa dyalog kontinyel avek bann banker, bann *Managing Directors* ki osi form par sa lasosyasyon banker.

E sa i ganny fer tou le kar lannen. E nou annan osi bokou langazman avek *Bankers Association*, kot nou annan toultan sa langazman pou nou koz lo sa size lo kote lenterere.

Nou konnen i en keksoz ki konsern tou dimoun. E i tout en langazman ki annan kontinyel pou nou kapab gete ki mannyer nou kapab amelyor sa bann sityasyon koumsa. Mersi.

**MR DEPUTY SPEAKER**

Mersi pou larepons. Onorab Cosgrow.

**HON WALLACE COSGROW**

Mersi Mr Speaker. Bonzour bann teknisyen ki fek zwenn nou. Mr Speaker enn bann

rezon akoz dimoun, i annan bokou dimoun ki tant pou al pran sirtou par egzans bann *secured loans*, en?

Akoz dimoun i annan serten bezwen, e konmsi zot napa sa, sa larzan. Sa kantite larzan *available* a sa moman ki zot bezwen al fer serten *purchase*, mazorite bann *consumer goods*, en?

*Now*, nou pe koz bokou lo bann labank. Mon keston i vize ver Labank Santral li menm, en?

*Now*, ki Labank Santral pe fer ouswa bann prodwir finansyel ki Labank Santral pe anvizaze vin avek pou kapab donn konsonmater plis swa?

Akoz ozordi si mon bezwen en serten kantite larzan, mon bezwen al pran swa en *secure loan* ouswa *unsecure loan* kot en labank, ki souvandfwa en *unsecure loan* i ariv an tou mon krwar i posib plis 20poursan lentere ki parfwa i anmar sa dimoun ki pe pran *loan* avek sa labank konsiderableman.

So, ki prodwir, eski zot pe anvizaze vin avek, *or* ki zot annan dan limedya la pou kapab donn konsonmater en levantay swa?

La mon pe mazin par egzans *hire purchase*. En pe letan i lo lata, kote i ete? Kan zot pou enplimante? E petet bann lezot

prodwir par egzans koz ek bann labank pou fer *available* plis *credit cards*, kot dimoun i kapab ganny en *higher limit*.

Kot lentere i en pti pe pli ba, kot i kapab fer serten *purchase* apre i pey par o mwan - *installment*. Eksplik nou en pti pe Labank Santral ki zot bann demars. Mersi.

### **MR DEPUTY SPEAKER**

Mersi Onorab. *Panel?*

### **MARKET CONDUCT ANALYSIS PAULINE RAOUL**

Bonzour Mr Speaker, Minis e tou Onorab. Mersi pou ou keston. Lo kote Labank Santral li menm, nou pa vremen travay lo bann prodwir ki nou pou met deor lo marse ki bann labank pou ofer. I plis bann labank zot menm ki vin avek zot bann prodwir ki zot santi ki i pou donn zot en lavantaz konpetitif lo marse, ki zot kapab ofer zot konsonmater.

Ki nou, nou pe fer selman, nou'n komans en legzersis pou evalye nivo konpetisyon ki i annan lo marse. E idantifye en pe bann baryer ki kapab anpes en dimoun sorti kot en labank, pou al kot en lot, kot i war i annan en lot prodwir ki pli satisfere li. *Or* i vwar i pou pli byen benefisyè.



E parey mon'n dir nou komans sa legzersis, e nou'n demann lasistans Lalyans pou Enklizyon Finansyel, pou ki nou kapab fer sa legzersis dan sa lannen. Mersi.

**MR DEPUTY SPEAKER**

Mersi. Ou annan klarifikasyon Onorab?

**HON WALLACE COSGROW**

Ya. Mersi Mr Speaker. Wi, mon kestyon ti plizoumwenn anver par egzantp ozordi zis labank ki pe prete *or* avek zis labank ki ou kapab ganny en serten nivo kredi.

I annan pei deor par egzantp mon kapab al kot en lakonpanyen loto, mon aste mon loto lo en baz kredi. Mon pa bezwen al kot labank mwan, mon al kot sa *dealership* loto mon aste lo en baz kredi.

Zisteman parey *hire purchase*, kot mon kapab al kot en laboutik aste keksoz lo en baz kredi e pey li serten lentere. So, sa bann kalite prodwir ki mon pe koz lo la ki posibleman i kapab *available* ki dan lezot pei i *available*. E ki zot Labank Santral zot pe mazin anmenn Sesel pou zisteman nou bann konsonmater i kapab ganny en swa.

I pa bezwen war li anmare avek en labank, ouswa si i pa

santi li anmare avek detrwa labank; si zot konpran mwan byen. Mersi.

**MR DEPUTY SPEAKER**

Mon krwar la sa voyaz i pli kler. *Minister* ou le reponn?

**MINISTER NAADIR HASSAN**

Mersi, Mersi Onorab. Zis mon ava pran sa enn kestyon, aköz kekfwä dan mon letan ler mon ti ankor Labank Santral nou'n travay lo sa bann Lalwa. Lalwa, Polisi i la, *framework* pou *hire purchase* i la. I zis mank Sekter Prive pou zot vini e komans ofer.

*Framework* regilatwar, Lezislatif i la li pou sa bann prodwir vini. Me i *up to* Sekter Prive pou pran sa bann loportinite ki egziste. Parey ou'n mansyonn lo kote *leasing*, *leasing* transpor lot. Ozordi, en lakonpanyen loto ki anvi fer *leasing* i kapab fer. I kapab fer. *Framework* i la fer. So, zot ki bezwen pran sa linisyativ pou zot antre dan sa bann biznes. Mersi.

**MR DEPUTY SPEAKER**

Dernyen Manm ki'n endike i le demann en kestyon lo sa size, Onorab Gill.

**HON CHURCHILL GILL**

Mersi Mr Speaker. Mr Speaker i kler ki sa size lentera en bon pe letan pe ganny diskite, nou tou nou konnen mon krwar nou dakor lo la. Me selman nou war nou'n bouz tre dousman lo la. Prezan i kler osi ki bann diferan kalite difikilte ki pei in fer fas avek, sa osi in kontribye ki nou pa'n kapab fer war en perse kot i konsern lentera pou dimoun.

*E moving forward*, eski si demen i annan lezot dimoun ki an vi vin fer labank Sesel, eski i annan sa lespas? E sa i en keksoz ki *Central Bank* i pou favorableman vwar sa. Petet sa i ava ede plis labank i ava ede pou pous lentera anba otomatikman. Mersi.

### **MR DEPUTY SPEAKER**

Mersi. Mersi Onorab. *Panel* i annan en larepons pou sa enn size?

### **SENIOR ECONOMIST TRUDY LUCAS**

Mersi Onorab pou ou keston. Wi, lo nou kote nou toultan envit plis konpetisyon dan Sekter Finansyel. E an fet i annan en seri prosedir ki ganny fer ler labank i vini, ki nou bann serten *macroprudential* ki nou bezwen gete. E apre ki in fini pas sa prosedir, nou a kapab ganny. Sa labank i kapab etabli Sesel. Mersi.

### **MR DEPUTY SPEAKER**

*Minister* oule azout en keksoz lo la?

### **MINISTER NAADIR HASSAN**

Mersi Mr Speaker. Onorab osi mon krwar mon'n mansyonn sa dan Lasanble dan lepase. Se ki ler nou pe koz konpetisyon, *ok?* Nou fasilman dir ki en kliyan i kapab. Si labank *x* i fer desann son lentera sorti la, bouz laba.

Me selman mon'n eksplike ki i annan plizyer faktor ki fer li difisil, e fer li ser pou ou sorti labank. So, i annan en *working group* ki mwan menm mwan pe *chair*, Labank Santral i lo la, bann lezot antite relevan kot nou pe idantifye. E sa i en legzersis ki in ganny mansyonnen.

Idantifye sa bann kou, sa bann faktor. E baze lo la, pran bann *policy decision* ki kapab redwir sa bann, nou apel sa bann *friction* ki anpes kliyan bouze. Mon lentansyon se ki nou kapab konplet sa legzersis sa lannen. E fer serten lanons dan Bidze, dan *Budget Address* pou 2024. Mersi.

### **MR DEPUTY SPEAKER**

Mersi *Minister*. Nou'n ariv lafen keston 93. Donk, nou ava remerci manmzel Lucas avek Mrs Raoul ki tou lede i sorti kot

CBS pou avek nou ozordi apre midi. Nou ava dir zot bonn kontinyasyon lazournen. E nou ava fer laranzman pou kri zofisyè pou reponn dernyen kestyon avek nou. Mersi pou zot partisipasyon.

Nou pou kontinyen aprezan, nou'n ariv lo kestyon limero 94 e nou ava *welcome* Mrs Seylina Joymon ki *Director General* pou *Domestic and International Tax Policy Division*; *welcome to the National Assembly*. E mon ava envit Onorab Sylvanne Lemiel pou demann son kestyon silvouple.

### **HON SYLVANNE LEMIEL**

Mersi Mr Speaker. Mon kestyon i al koumsa Mr Speaker.

Eski Minis i kapab donn sa Lasanble lenformasyon detaye lo:-

a) ki prosedir pou ganny *Charity Certificate* e lekel ki sipoze *apply*?

b) ki prosedir ki en biznes i devret fer pou li ganny rediksyon taks ler i oule donn en *sponsorship* sibstansyel pou en proze dan en distrik, vi ki CSR in aboli detrwa lannen pase?

### **MR DEPUTY SPEAKER**

Mersi Onorab. Mon ava envit Minis pou larepons.

### **MINISTER NAADIR HASSAN**

Mersi Mr Speaker. Mersi Onorab pou sa kestyon. Mr Speaker, pou ki en *Charity Certificate* i kapab ganny aprouve i enportan; Premyerman ki sa lorganizasyon sosyete sivil in deza anrezistre kot lofis Rezistrar Zeneral. Prosedir revi e verifikasyon i pran plas a 2 nivo.

Enn, kot *Citizen Engagement Platform Seychelles (CEPS)*, e lot a nivo Minister Finans Planifikasyon Nasyonal ek Komers.

Mon a pas lo sa *clip* letap an detay;

Enn fwa ki en lorganizasyon sosyete sivil i anvi fer laplikasyon pou sa *Charity Certificate*, i neser ki i lyez ek lofis CEPS pou li soumet son laplikasyon. I bon note ki CEPS i annan sa manda pou verifie bann laplikasyon. E fer ki sa lorganizasyon sosyete sivil pe kouver laspe, laspe bonn gouvènanans e latransparans.

I osi enportan ki sa lorganizasyon i montre ki zot kontribisyon anver nou sosyete. Sa i kapab par egzanp dan domenn larelizasyon, lanvironnman, drwa imen, la demokrasi e bon gouvènanans, spor, lar ou kiltir. Enn fwa ki

nivo ki revi in konplete lo nivo *CEPS*, sa laplikasyon ava ganny anvoye kot mon Minister.

Lo nou kote, nou fer verifikasyon lo si sa aplikan i a zour ek tou son lobligasyon kot lofis Rezistrar Zeneral. I annan de fwa Mr Speaker, ki sa aplikan i pa ankor soumet son bann kont lo kot Lofis Rezistrar Zeneral.

A sa pwen, i responsabilite sa aplikan ki i met li azour ek son bann lobligasyon, avan ki son laplikasyon i ganny konsidere. Apre ki tou verifikasyon in ganny fer lo nou kote, nou *issue* sa *Charity Certificate*.

I bon note ki sa sertifika i valid pou lan.

An se moman nou annan an total 40 *Charity Certificate* ki valid. Sa i plizoumwenn dan domenn sport, lanvironnman, lasante, sosyal e larelizyon.

I bon note Mr Speaker ki atraver 5enm *schedule* dan Lalwa Tax Biznes 2009, dan okenn lenstans ki en biznes i donn en donasyon anver en lorganizasyon ki annan en stati *charity*, e i ankor valid, sa biznes i kapab rikord 100poursan sa donasyon koman en *deductible* lo son *assessable income*. Ler pe determin son *tax* ki i pou peye.

Menm si nou ankouraz biznes pou siport lasosyete sivil pou byennet nou sosyete, mon prezimen ki en tel previzyon dan nou Lalwa i kapab ankouraz zot pou fer plis kontribisyon.

Parey sa provizyon i rekonnnet, donasyon ki'n ganny fer anver bann *charity* koman en *deduction* lo son *accessible income* pou *tax*, i osi rekonnnet donasyon ki ganny fer anver Gouvernman.

E sa Mr Speaker i anmenn mwan lo larepons lo dezyenn bout sa kestyon. Lalwa *Tax Biznes* napa okenn provizyon pou redwir tou *tax* pou bann biznes ki kontribye anver bann proze dan distrik.

Me selman parey ti ganny mansyonnen pli boner, sa biznes ki pe fer sa donasyon pou kapab rikord sa koman en *deductible*, depandan lo lekel ki pe antreprann sa proze distrik. Sa donasyon i kapab ganny donner ek sa *charity* ou antite Gouvernman.

Sa biznes a son tour pou bezwen fer sir i gard tou rikord pou siport sa donasyon ki pe ganny donner. Sa pou ede siport son *tax* retourn. Si sa donasyon pe ganny fer anver en *charity*, i enportan pou verifye si son sertifika i ankor valid.

Mr Speaker, pou konklir, mon le azoute ki Gouvernman pe diskite ki mannyer pou entrodwir plis benefis pou bann biznes ki fer donasyon lo baz kominoter. Mersi Mr Speaker.

**MR DEPUTY SPEAKER**

Mersi *Minister*. Onorab Lemiel ou annan siplemanter?

**HON SYLVANNE LEMIEL**

Mersi Mr Speaker. Mersi Minis pou ou leksplikasyon. Enn mon bann kestyon ki mon ti pe al demann Minis i se ki, ki *incentive* oubyen kwa ki lo zot latab ki zot pe mazin diskite, pou ede e ankouraz bokou plis *businessmen*. Par egzanp nou annan dan distrik en legzanp, nou annan dimoun ki'n *sponsor* lalimyer parey ou konnen dan distrik.

E sa ki'n fer mwan vin ek sa kestyon, akoz ti en pti pe kot pou ale? Ki sertifikasyon pou ranpli? E petet sa i pou ankouraz bann *businessmen* deor ki pe ekoute pou zot konn bann prosedir ki zot pe fer ki wi, zot ankor kapab kontribye. E *venture* dan serten proze sirtou bann gro proze.

Par egzanp la nou Anse Royale nou annan sa proze ki nou le *install CCTV cameras* dan distrik. E petet i annan bokou dimoun ki le dir i a *sponsor* biznes. Me i pa konnen

kot i pou ale or i pa konnen petet ki benefis ki petet sa i kapab vin avek.

So, mon kestyon la i se ki si ou kapab donn nou en pti pe plis detay lo konmsi kwa ki ankour, ki zot pe diskite ki ou'n mansyonn en pti bout dan ou larepons. Mersi.

**MR DEPUTY SPEAKER**

Mersi Onorab *Minister*?

**MINISTER NAADIR HASSAN**

Mersi Onorab pou sa klarifikasyon. Premyerman lo kote prosedir, mon krwar i vre ki nou bezwen fer plis pou nou *sensitized* bann biznes. Kwa ki zot benefisye? E osi ki mannyer sa *process* i marse?

So, ki mon pou fer dan sa bann semenn ki pe vini se bann teknisyen ava al lo medya, fer konpany medya. Ki ava fer sa *sensitization* pou dimoun pli kler lo la.

Dezyenm pwen e sa mon'n mansyonnen lafen mon *speech*, se nou pe travay - Nou deza annan bann diskisyon lo bann Polisi. *Policy measures* pou Bidze 2024. E en keksoz ki mwan mon le met devan, se ou konnen lo bann pti proze dan distrik. E nou'n war dan bann *meeting* piblik ki'n fer, i annan bokou demann pou pti proze,

Lalimyer, en rigol, en *bus stop*, en *bin site*.

E i kler poudir Gouvernman pa pou kapab fer tousala lo li menm. E ki manner Gouvernman li i kapab ganny lasistans avek bann biznes. Bann biznes ki baze dan sa distrik, pou *raise* sa *financing*, pou nou fer sa bann proze pli vit ki si Gouvernman pou kapab fer li, li menm.

So, i annan bann *proposal* ki nou pe evalye, lo kote bann benefis tax ki nou kapab met an plas. Ki ava *incentivized* bann biznes pou fer plis sa bann kontribisyon anver bann proze kominoter. Me sa i ava ganny anonse ler nou al dan Bidze pou lannen prosen. Mersi.

### **MR DEPUTY SPEAKER**

Ou annan en klarifikasyon Onorab?

### **HON SYLVANNE LEMIEL**

Wi. Dernyen. Minis savedir la ozordi si mon annan sa dimoun ki le sponsor mwan en proze dan distrik, i vin ver mwan *MNA* i demann mwan. Ki nou prosedir? Mon anvoy li kot *DA*? Mon anvoy li kot Minis Finans?

Konmsi ki prosedir ki sa biznes pe ekoute laba deor, i le donn sa *sponsorship* Anse Royale pou fer sa tel proze.

Ozordi i tann mon lapel i le vini dir wi i a donn sa bann *CCTV cameras*. Ki prosedir i merit fer? Mersi.

### **MINISTER NAADIR HASSAN**

Mersi Onorab. Onorab pou bann proze ki al anver Gouvernman, zot pa pou bezwen sa *Charity Status* parey mon'n eksplike. So, prosedir se zot al *towards Local Government*. So, *point of focal points* se dan bann distrik bann *DA* i *escalate* sa. So, *that's the procedure to follow*. Mersi.

### **MR DEPUTY SPEAKER**

Mersi. Onorab Pillay.

### **HON SEBASTIEN PILLAY**

Mersi Mr Speaker, bonn apre midi. Mr Speaker, Minis pe regard la ou ti annan en *statement* ki ou ti fer *regarding phasing out of CSR tax*. E serten konsern ki nou ti *raise* sa letan, vizavi bann keksoz ki ou ti dir. Bann konsern ki nou ti annan zisteman lo sa size. E ou ti reasir nou - *that's almost 1an edmi la* - ou ti reasir nou poudir ou ti pou met an plas en striktir pou fer ki sa pa vin en *issue*.

E la ozordi nou annan serten konsern. E mon tann ou pe dir ou pe retourn ek bann teknisyen lo teren. E mon'n tann ou pe koz lo pe re

entrodwir serten benefis *tax*. So, klarifye pou nou kwa egzaktaman ou pe re entrodwir? E akoz ou pa ti *take onboard* serten bann konsern, ki nou ti met devan ou ler ti annan sa *repeal of the CSR Tax*. Ki ti anliny ek bann mezir *tax*, mezir, revwar bann mezir *tax*.

Me prezan ki nou pe war pe kre en *issue* e konbyen *Charity Certificates* ki'n ganny *issued* ziska la? Si ou annan sa lenformasyon. Mersi Mr Speaker

### **MR DEPUTY SPEAKER**

Mersi. Mon krwar lakantite *Charity Certificate*, wi in dir. *Ok?* So, Minis ava reponn parey sa enn premye.

### **MINISTER NAADIR HASSAN**

Mersi Mr Speaker. Mersi Onorab pou ou bann kestyon. Lo kote mon *view* lo *CSR* i reste parey. Ti annan en kantite *issues* lo kote *CSR*. Ti annan serten kantite labi lo kote *CSR*. So, *whether it was the right thing to do*, mon *stand by* sa desizyon, ki nou ti bezwen retir *CSR*.

Lo kote ki *incentive* ki annan? Ti annan, *incentive* ti la li. *Ok?* parey mon'n eksplik Onorab Lemiel, i bann *incentive tax* ki ti egziste. Ki nou bezwen fer? Nou bezwen fer plis

*sensitization* pou bann biznes *be aware* ki bann benefis *tax* ki zot benefisyé avek. So, zot konnen poudir i annan en benefis la.

Trwazyenm pwen ki mon'n mansyonnen la, mon pe *go over and above* sa ki deza egziste, *ok?* *Over and above* poudir be ki mannyer nou kapab anbelir sa ki nou annan, e fer li even pli ankourazan pou bann biznes vin devan. E sa ki mon ti pe koz lo la, lo bann *incentive* fiskal pa *CSR*, pa *raising tax*. Me bann *deductible* dan *tax allowances* ki pou *incentivize* bann biznes. Mersi.

### **MR DEPUTY SPEAKER**

Mersi. Ou annan klarifikasyon lo la?

### **HON SEBASTIEN PILLAY**

Mersi Mr Speaker. Vi ki nou'n ariv lo sa pwen bann *deductible*. Eski ou dan en pozisyon la pou dir nou vi ki i annan 26 distrik, kot i annan bann *MNA* pe kontakte bann biznes pe demann sipor. I annan biznes i vini i donnen, i pe enport regilasyon zis i vini i donnen.

I annan biznes ki le *go through the process*, akoz si son donasyon i sibstansyel i le *go through the process* pou li fer sir poudir i annord. E demen pa

akoz in fer en akt bon volante, li i *end up* dan problemm.

Ki ou pe donn nou imedyatman la pou nou *midyear* la. So, dizon *going forward for the next, the next half of the year*. Nou'n ariv *almost second quarter, for the third quarter*, pou asire ki dan landrwa kot Gouvernman pa'n kapab *meet* son bann *deadline* proze, e i annan dimoun dan bann distrik, bann *MNA* ki'n kontakte zot in kapab fer li. Ki ou pe dir nou pou arive la, dan sa sironstans. E kote zot pou vini? Ou'n dir nou vin kot *DA*, me i pa sitan kler ler mon pe gete.

Sirtou bann donasyon ki pou *substantial*, i kapab anler Mont Signal zot pe ganny en nouvo keksoz laba anler. Oubyen anba Pointe Au Sel zot pe ganny en keksoz. Sey fer kler pou nou Minis. Mersi.

### **MINISTER NAADIR HASSAN**

Mersi Mr Speaker. Mersi Onorab. Onorab parey mon'n mansyonnen, sa bann *tax benefit* i deza la, *ok?* So, nenport ki lakonpanyen ki le vin devan pou fer sa bann donasyon lo bann proze kominoter, zot apros *Local Government*.

So, *Local Government* is the focal point pou zot aprobe,

akoz sa i bann proze distrik, *ok?* So, si *MNA* i annan en *businessman* ki le, ki le ede, sa *MNA* i apros *DA through Local Government* e i fer le nesese e i benefisy e avek son bann *tax benefit* ki vin avek bann donasyon. Mon krwar sa son keston lo kote kantite ki annan, sa i 40. Mersi.

### **MR DEPUTY SPEAKER**

En dernyen pwen lo sa size Onorab Aglae.

### **HON EGBERT AGLAE**

Mersi Mr Speaker. Minis, mon krwar i annan en kantite ledikasyon i bezwen ganny fer, an term prosedir e osi pou elimin en pe sa bann birokrasi an term prosedir. Se sa ki bokou lakonpanyen pa vin devan ki anvi vini. Mon krwar i annan en travay pou fer lo sa Minis.

Kote kot i konsern bann lakonpanyen ki kre fondasyon, *ok?* Mon a donn ou en legzanp parey *Seybrew*, apre i *invite* bann *Charity Certificate Holder* pou zot vin *apply* bann konponan finansyel pou bann proze, anba sa lakonpanyen. Ki mannyer zot pe zer sa? kote i tonbe li? Dan ki kad li?

### **MR DEPUTY SPEAKER**

Mersi. Minister.



**MINISTER NAADIR HASSAN**

Mersi Mr Speaker. Mersi Onorab. Wi, lo premye pwen parey mon'n dir boner mon toutafe dakor. Plis *sensitization*, ledikasyon i devret ganny fer. E mwan mon pe donn *commitment* ki nou bann *staff* ava al lo en konpany medya pou nou eksplike, ki benefis e osi ki prosedir pou *follow*. Mon toutafe dakor ek ou. E i napa ase sa ki'n ganny fer.

Lo kestyon lo *foundation* si mon'n konpran ou byen. En *foundation* li menm i ganny *setup*, me i pa en *profit making objective*. Me i la pou konsider bann *charitable cause*.

So, kekfwa ou ti ava zis klarifye ki egzaktaman ti ou pwen lo kote *foundation* pou mwan kapab donn en larepons pli konkret.

**HON EGBERT AGLAE**

Wi Minis. En konpany parey mon'n nonmen *Seybrew* ki byensir pey *tax* li osi, *ok?* E i kre en fondasyon parey ti anonse. E la i envit bann *Charity Holders* pou zot vin *apply* sa larzan anba zot ki- Eski sa i en larzan ki *tax* ki pe ganny met la? Ouswa i *part of his profit* ki i met dan en fondasyon.

Apré i envit sa bann *Charity Holders* pou zot kapab

ganny akse pou fer bann proze. Mersi.

**MR DEPUTY SPEAKER**

Mersi Onorab pou ou klarifikasyon.

**MINISTER NAADIR HASSAN**

Mon konpran ou kestyon prezan. Onorab wi, dan sa ka sa bann fondasyon li menm i en antite separe avek sa lakonpanyen. So, mon krwar nou pou bezwen regarde dan bann ka koumsa kot si sa fondasyon i separe ek sa lakonpanyen.

Annefe si sa lakonpanyen ki li i pe fer en kontribisyon kot sa fondasyon, ki mannyer *then* nou tret sa? I en bon pwen, nou ava *take into note* ler nou *review* bann Lalwa. Mersi.

**MR DEPUTY SPEAKER**

Mersi Minister. Donk, sa in anmenn nou lafen nou sesyon *Questions for Oral Answers* ozordi. Nou ava remerisi Minis avek- Anfet mon pa konnen si zot in remarke, me depi bomaten nou'n annan en levantay Sesel konmsi byen edike, byen kalifye, zenn ki'n vini. 12 zot, 7 madanm, 5 msye. E mon krwar lesan ki bann zenn ki pe swiv Lasanble ozordi deor, i merit ganny enspire par

devosyon sa bann zenn Seselwa ki'n pran zot letid serye.

E ozordi pe rann en gran servis nou pei. E *we are very proud of all of you* ki'n pas la, koman bann Seselwa ki'n kapab vin reponn bann kestyon. Mersi.

**(APPLAUSE)**

**MR DEPUTY SPEAKER**

Nou ava eskiz Minis parmi nou. Nou annan en dernyen *item* pou nou *dispose of* avan ki Lasanble i recess pou la ozordi.

Bon anba *Order 25*, annakor avek *Order 25(2)* me anba *Order 40 Leader* Lopozisyon ti'n demann mwan pou fer en, *raise en matter of privilege* ki mon pou akord li. E nou tonm lo kondisyon ki nou ti koz lo la. Onorab *proceed*.

**HON SEBASTIEN PILLAY**

Mersi Mr Speaker. A mon tour les mwan felisit sa bann zenn. Annefe tou dimoun ki'n demann kestyon ozordi, enkli nou Manm Lasanble ki sa 43an pa'n anven. Sa nou kapab konstate.

**(APPLAUSE)**

**MR DEPUTY SPEAKER**

Onorab, sa komanter pa ti neser. E sanmenm sa

Speaker i dir lot zour "i pa kapab fye ler i donn ou laparol pou dir en keksoz" Nou'n fer en keksoz pou Sesel, pou Seselwa napa naryen pou fer avek 43an, ouswa *US* ouswa *LDS*. I talan bann Seselwa se tou. *Proceed*.

**HON SEBASTINE PILLAY**

Mersi Mr Speaker. Mr Speaker, mon *matter of privilege* i relate lo lefe ki *Speaker* i Mr Roger Mancienne i Speaker Lasanble Nasyonal. E mon pe refer avek en *speech* ki i ti fer dan en servis ki ti pase le 29 Zen, kot komanter e bann parol ki'n ganny servi dan sa *speech* par enspir linite e latolerans dan lafason ki mon war li.

E sa i montre ki *Speaker* Mancienne i war li difisil pou separ son rol koman *Leader LDS*, e koman Speaker Lasanble Nasyonal. Bokou dimoun ki'n koz avek mwan e ki'n zwenn mwan, in demann mwan akoz ki lo nou kote nou, nou pa ti ganny demande osi pou fer en serten refleksyon. Mon pa konnen akoz sa bann dimoun in desid sa bann keksoz dan sa fason.

Me sa ki mon krwar Mr Speaker in arive, bann parol ki'n ganny servi i montre, e i montre klerman ki sa ti pe target en group dimoun. E ki mon war poudir sa i montre en

serten nivo soule mank lendepondans dan rol ki sa dimoun ki *Speaker* Lasanble.

E parey mon'n dir i montre osi ki i war li difisil pou separ son rol koman dirizan *LDS* e koman *Speaker* Lasanble Nasyonal. E koman en Manm Lasanble dan sa Lasanble ki mon santi e mon *caucus* osi i santi poudir sa bann komantr in a nou regar. E i pa'n fer nou okenn dibyen, nou le met sa lo rikord Lasanble.

Akoz nou krwar poudir privez en Manm Lasanble, i ganny ankastre dan rol e ankadre dan rol *Speaker* pou li diriz Lasanble dan en fason enparsyal. Mersi Mr *Speaker*.

### **MR DEPUTY SPEAKER**

Mersi Onorab pou sa bann komantr lo ou *matter of privilege*. Mon rezerv mon drwa pou fer en repons lo bann pwen ki ou'n leve pli tar. Nou ava pran en poz la. E nou pou rebran 2er ki nou pou kontinyen avek Mosyon ki pou prezante par Onorab Adelaide.

Donk, nou ava zwenn 2er.

**(BREAK)**

### **MR DEPUTY SPEAKER**

Bonn apre midi tou Manm Onorab e tou bann *staff* e piblik ki pe swiv nou travay pour sa

Mardi. Byenveni pour kontinyasyon nou travay e *next item* lo nou *Order Paper* i Mosyon e sa i premye Mosyon sorti kot Manm Elekte pour distrik Baie Lazare Onorab Francois Adelaide. Mon ava demann ou pour prezant Mosyon e en lot Manm i a segonde avan, pour *proceed* ek ou lentervansyon.

### **HON FRANCOIS ADELAIDE**

Mersi Mr *Speaker*. Bonn apre midi Mr *Speaker*. Bonn apre midi tou Manm Onorab e tou dimoun a lekout. Mr *Speaker* mon Mosyon i lir koumsa:-

Pour asire ki Sesel i kontinyen mentenir en bon nivo sekirite, Lasanble Nasyonal i ankouraz plis sitwayen pou investir dan bann lenstalasyon bann *camera* sirveyans en pe partou kot i neser pour asir plis sekirite dan nou bann kominote. Mersi.

### **MR DEPUTY SPEAKER**

Mersi Onorab e lekel ki segonn Mosyon? Onorab Monthy.

### **HON PHILIP MONTHY**

Mersi Mr *Speaker*. Mosyon i ganny segonde. Mersi.

### **MR DEPUTY SPEAKER**

Mersi Onorab. Donk mon ava envit loter Mosyon aprezan pour fer son entervansyon.

### **HON FRANCOIS ADELAIDE**

Ankor enn fwa mersi Mr Speaker. Mr Speaker nou'n fek selebre nou Lazournen Nasyonal le 29 Zen. E parmi bann koze ki nou'n tandé, se pour ki Seselwa dezormen i vin pli patriyotik, pli inifye dan tou sa ki nou anvizaz-e fer e byensir vin pli atantif avek bezwen nou pei.

Alors sa Mosyon pe vin dan en bon moman pour angaz nou sitwayen e bann zanmi Sesel, pour ki nou fer en diferans. Dan plas Lasanble pe demann Gouvernman parey dan bann Mosyon oparavan, *cette voici* nou pe demann avek bann kominote swa atraver bann endividi; swa atraver bann lasosyasyon; swa atraver bann lorganizasyon; bann biznes ouswa okenn groupman pour zwenn ansanm, inisye bann bon pratik pour fer ki nou pei i vin pli an sekirite - pour nou bann zanfan, pour nou bann fanmir, pour nou bann kominote, pour nou bann viziter e byensir pour nou pep an antye.

Parey en vre patriyot, dan plas demande, “ki nou pei i kapab fer pour nou”? Nou'n

pran lapros sey eksplore ki mannyer nou kapab asiste nou pei lo sa ki konsern sekirite e nou stabilite koman en Nasyon.

Wi Mr Speaker, sa Mosyon in paret vin en pe tro tar, me parey koze i dir “plito tar ki zanmen”. Non Sesel pe ganny rezonnen dan tou le kat kwen lemonn, pour bann tre bon akonplisman. Bokou pep i anvi konnen kote sa pei i ete e lekel son bann zabitan. Savedir ler nou pe ganny bann bon piblisite, i egalman osi tre enportan nou sofgard, defann e osi prezerv tou sa ki fer nou briye koman en Nasyon; kot sa ki vin kot nou i santi zot alez, konfortab, ganny apresye e byensir an tout sekirite.

Sa i pa zis pour nou bann viziter. I osi vreman enportan ki nou koman en pep, nou osi kapab viv e promot sa latmosfer kot nou zanfan, fanmir, zanmi e koleg e pep antye i santi sa latmosfer sekirite pour ki nou evite viv anba *stress* e sa ava fer nou vin pli prodiktiv, pli lantouzyazm e nou a viv pli an bonn sante.

Mr Speaker pa ti pour gou, si sa ki mon pe dir ti kapab en realite dan nou kominote ozordi. Kot ler en paran pe al travay, i kit son zanfan dan lakominote, i konnen ki i kapab

kont lo sa bann dimoun koman bann gardyen pour sa ki pli feb.

Satisfaksyon ti pour vin pour sa bann planter, ler zot get zot rezim bannann ki'n byen plen e dan 2 zour i pe al rekolte pour li kapab kontinyen sonny son fanmir. Granmanman osi ti pour viv pli lontan, ler i konnen ki i ti kapab respir bann ler fre, akoz i kapab dormi laport ouver pandan lazournen, san bezwen ganny atake par okenn bandi.

Pa ti pour pli gou ankor, kan nou tou dan bann kominote, sirtou dan bomaten, setaki pe mouvman te pour nou al ranpli en zournen dan nenport ki domenn pour benefis nou fanmir e nou kominote. Tout an mazinan ki ler nou pe debourye, nou annan lape lespri e ki tou sa ki nou'n kit deryer, i dan bon lanmen e ki nou pa bezwen enkyet.

Ki zistans nou ti pour ete ozordi koman en Nasyon, si nou ti ankor kapab annan sa fason fer e sa konviksyon ki *every little thing is gonna be alright* ler nou absante kot nou lakour?

Mr Speaker, Sesel ti'n deza koumsa, me i tris poudir ki nou'n sorti lo sa bann bon fason fer e ozordi nou lwen avek sa realite. Laplipar kominote konmela i annan bann *dark spot* kot drog pe ganny trafike. Bokou kominote nou trouve kot

i annan bann vagabonde partou kote.

Nou'n vwar bokou video, lo rezo sosyal, dan bann kominote kot zabitan pe lager avek kanmarad an servi bann zouti danzere.

Nou'n vwar dan bann kominote kot bann viziter pe ganny agrese par bann sitwayen iresponsab. Nou'n vwar osi bann ka kot konportan anti-sosyal i kontinyen afekte nou bann kominote.

Mr Speaker, pa zis Seselwa ki pe fer sa bann zafer, nou'n trouve osi, kot etranze pe kolabore pour fer sa bann krim organize. Pran par egzanp legzanp frod lo bann *ATM*, trafik bann drog ilegal, kasyet dan bann distrik pour sov deteksyon bann zofisyè Imigrasyon. Legzanp i tro bokou.

Tousala i fer ki annan dezord dan bann kominote, e ler i annan dezord i pli fasil pour bann move manni antre. E sa byensir i vin avek tou bann lezot vis tel ki vol, trafik drog, vagabonde, mandyan, labi zanfan, menm krim ki sok bann kominote e byensir anmenn douler pour bokou fanmir e zanmi dan nou kominote.

Byensir ler sa bann keksoz i arive, i pa swazir si ou ris, ou mizer, si ou en adilt

ouswa en zanfan, si ou vye oubyen ou zenn, ouswa si ou en Seselwa, swa en etranze. Nou tou nou kapab vin en viktim, e nou bezwen a tou pri sey rod en fason pour minimiz sa bann evantyalite, e asir sekirite pour nou tou dan nou kominote.

Depi later i later in egziste tou sord bandisite, me avek evolisyon, sa in ariv dan nou zalantour e pe vin deplizanpli sofistike ki fasil pour ariv kot nenport ki.

Lontan pour anpes voler vin kot lakour bann zabitan ti sonny lisyen, pour kapab vey lakour e sas bann bandi, me avek bann *animal lovers* konmela sa pratik kot pour servi lisyen pour fer pas koman gard sekirite, in nepli popiler.

Zot pe osi *lobby* pour ki lisyen i ganny garde koman bann *pet*, me pa koman bann sekirite pour vey voler. Sa ki kapab *afford* baro zot mete. Me laprev in montre ki napa okenn oter baro ki kapab anpes ni vol, ni drog, ni krim, ni labi imen arive.

Byensir napa bokou opsyon e resours imen i sa sours ki bezwen kontinyen ganny servi pour siperviz e sey anpes sa bann zafer arive.

Byensir imen osi i annan son limit. Tou imen i imen, nou'n ganny bann diferan

mantalite e souvandfwa nou trouve ki menm apre ki bann zonn e fanm dan liniform in ganny formen pour asir sekirite dan bann kominote, i pa tou kou leka ki zot onor e respe zot langazman.

I osi annan bann febles e bann - e bann mankman osi, ki i fer ki nou pa kapab antyerman depan lo imen pou touzour asir sekirite dan nou bann kominote.

Se pou sa rezon ki sa Mosyon pe demande pou tou sa ki kapab, annou ede mannyer nou kapab pou nou protez nou kominote.

En fason pli asire, se byensir entrodiksyon bann *camera* sirveyans dan bann kominote. Sa i en lot fason ki Lasanble Nasyonal i anvi angaze, pou asire ki nou bann kominote i reste touzour an sekirite.

Baie Lazare i en distrik ki pa'n ganny eparnyen avek sa bann *act* vandalizm. E byensir ler sa bann keksoz i arive, i anmenn lakoler, *panic*, lensertitid, mefyans, laper, sagrinasyon. E byensir detri fabrik nou kominote.

Nou tou nou rapel ler nou Legliz ti ganny vandalize. Nou tou nou mazine ler nou Lasapel Anse Poules Bleues ti osi ganny vandalize.

Bokou nou, nou temwanny ler semen pou al Dan Fatak i ganny anvair par bann dimoun ki pe vann drog ilegal. Bokou ankor i arive kot nou bann zabitan pa neserman apresye e santi zot an sekirite.

Nou pe vin en distrik *top* e enportan dan Sesel. Kot bokou dimoun pe vin vizit nou tou lazournen. Baie Lazare pou bezwen prezerv son *charme* e son bon vwazinaz kot nou bann zanfan; nou bann zenn; nou bann adilt, byensir sitwayen aze; travayer e viziter, zot sa a santi zot an vre sekirite.

Atraver *MNA*, bann zabitan Baie Lazare ti a kontan ki Lasanble Nasyonal i fer pase sa Mosyon. E ankouraz Gouvernman osi pou angaze dan rod bann *incentive*, pou ankouraz bann kominote pou angaze dan enstal bann kamera sirveyans dan diferan landrwa dan kominote. Ki a ede dan mentenir en bon nivo sekirite dan kominote.

Dan laplipar distrik, nou annan bann lenfrastriktir Gouvernman, ki osi merit ganny sipervize. Pran par egzantp dan nou distrik Baie Lazare; nou annan lekol primer. Nou annan lakres. Nou annan en *hall* lekol. Laplenn ek son bann *changing room*, legliz.

*daycare centre*, Sant Administrasyon Distrik, klinik, simityer, kordgard, eksetera.

Pou sa bann fasilite, mon ti a swete ki Gouvernman i fer li son priyorite, pou enstal bann kamera sirveyans pou sekiriz sa bann landrwa tel stratezik.

Avek bann distrik ki annan bann fasilite kordgard, ti ava bon ki i annan en dyalog avek lapolis. Ki sa bann kordgard i ava ganny ekipe avek bann lekran ki kapab sirvey sa bann sit.

Sa i a fer ki sa bann landrwa ava ganny sirveye 24 lo 24. E sa a fer ki i ava annan bann vizit pli kalkile; pli byen ganny targete pou evite annan okenn bann *act* malisyè, e bann aktivite anti-sosyal a okenn moman.

Sa ava osi akte koman bann *deterrent* pou tou sa ki pe mazine pou fer bann tel aksyon endezirab. Nou osi annan en Stasyon Petrol ki pe deservi lakominote. La avek negosyasyon, nou a demann Mr Payet, pou li osi enstal son kamera sirveyans ki a ede protez son biznes, menm dan son zalantour. E nou a osi negosye pou ki i a kapab enstal en lot kamera ki ava regard dan son visinite.

Lakominote nou ava kapab rod *sponsor* atraver bann

biznes, pou enstal bann kamera sirveyans lo bann poto dan bann landrwa problematik, ki ava annan plis sipervizyon e aksyon pli targete i ava kapab ganny pran ler i annan bezwen.

Sa *screen* osi nou pe sizere ki ava ganny mete dan Stasyon Lapolis, ki i osi i a kapab ganny sirveyans 24 lo 24.

Pran bann landrwa santral dan Baie Lazare, kot i annan bokou aktivite toulezour, Mr Speaker, nou annan lafanmir Pool ki ler zot – nou ava *advise* zot pou zot met bann *camera* sirveyans, *at least* zot a met enn ki pou vir lot kote semen.

E nou osi nou annan Mr Naidoo ki dan sant Baie Lazare. E nou osi annan Mrs Low-Wah. E sa i a fer ki sa *area* dan sant Baie Lazare kot i annan bokou aktivite, i ava kapab ganny plis sipervizyon. E sa i a fer ki sa landrwa i ava reste en pe pli an sekirite. E kot nou bann dimoun i ava kapab sirkile san bezwen annan okenn laper ouswa okenn krentif.

Mr Speaker, kote sitwayen i antre, zis parey sa Mosyon pe sizere? I tre senp. Premyerman; Gouvernman i asir sekirite son bann batiman e balizaz. Sekter Prive i a sekiriz son bann batiman e son balizaz.

E la, i ava tour bann endividi dan kominote pou partisipe dan sa partenarya. Pou zot osi enstal bann kamera sirveyans. Byensir avek pli bon gidans, tout an mazinan bann laspe *privacy* pou bann lakour. Avek bann *incentive* byen ankouraze par Gouvernman.

Kot bann letablisman i ava kapab, i ava permet annan ase lespas monneter pou asiste bann lezot ki pa kapab dan lakominote. E sa i ava fer ki *maximum* lespas i ava ganny kouver. E byensir i ava annan bokou plis sirveyans ki parey sa Mosyon i ava pe demande.

Mr Speaker, mazinan, Si nou kapab fer sa, ki mannyer nou bann kominote pou reganny plis konfyans e plis sekirite?

Mr Speaker, sa i en Mosyon ki pou demann debat lo la. Mon pe fer sir ki mon pa pe met okenn petet lobstak pou personn vini avek okenn bann amannman. Be ki nou ava vremen tret sa Mosyon avek tou son kredi ki i annan. E sa i a fer ki nou kapab vremen anmenn sa nide dan nou kominote. Fer nou bann dimoun konpran.

E petet zot ava pli kapab partisipe, anmenn zot nide, pou ki nou bann kominote i ava reste an sekirite dezormen ozordi, e pou a lavenir.



Mr Speaker, parey mon'n dir; napa naryen dan sa Mosyon ki pa kapab ganny modifiye pou nou ganny sa pli bon model, pou nou kapab komans avek. Pou ki nou vremen ariv lo sa lobzektif ki sa Mosyon pe demande.

Mr Speaker, mon pa pou kapab bliye osi pou remerci tou bann sitwayen ki'n deza pran sa lapros e pe ede pou donn sekirite dan bann landrwa, dan bann kominote. Me atraver sa Mosyon, i ava en sans pou lezot bann dimoun ki petet ti ava anvi. Me ki pe rod lespas pou zot kapab antre e donn sa soutyen nou kominote.

Mr Speaker, avek sa 2 mo, mon soumet sa Mosyon avek Lasanble Nasyonal pou plis deba, pou konsiderasyon. E petet pou bann propozisyon pou ki nou ava sorti la avek en Mosyon pli kadre kot Gouvernman e bann zabitan, menm tou sitwayen i ava kapab konpran.

E zot osi zot ava annan zot pwennvi ladan pou ki nou ava kapab realiz sa rev pou nou pei, pou nou kominote e pou nou bann zabitan. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Adelaide pou lentrodiksyon ou Mosyon. Mon note, Onorab Monthy ti segonde. Ou pou koz la Onorab Monthy? *Please proceed.*

**HON PHILIP MONTHY**

Mersi Mr Speaker. De pti mo lo Mosyon anmennen par Onorab Adelaide. Mosyon – ler mon'n ekout lentervansyon loter Mosyon, in konsantre en pe plis lo lakominote. Bann landrwa stratezi ki dan lakominote.

Mon, mon pou konsantre en pe plis Mr Speaker, lo bann lakour prive ki mon santi i annan en nesesite. Akoz sa prodwi pou le moman, petet mon vwar li i aksesib pour serten group sitwayen. Me petet pa tou fanmir ki neseserman annan sa mwayen pou protez zot lakour avek en tel lenvestisman.

Mr Speaker, mazorite Seselwa i annan en lakour avek en fanmir. E kot nou lakour byensir nou annan nou bann propriyete personnel. Ki swa dan nou lakaz oubyen an deor nou propriyete.

En gran mazorite fanmir Seselwa, i annan ki swa enn ou plizyer transpor. E lezot propriyete ki annan swa en valer finansyel, oubyen en valer santimantal.

Annan nou osi ki annan zannimo domestik. Ki nou tret zot parey en manm nou fanmir. Akoz apre tou, zot form par nou fanmir.

E mon konn tre byen Mr Deputy Speaker, ou osi ou annan zannimo domestik ki ou kontan tre byen. E pa ti pou swete okenn keksoz i arive avek zot. Parey mon osi mon annan.

Tel parey si zot ganny vole, mon konnen ki lapenn sa i anmennen pour serten nou. Akoz souvandfwa mon war bann lanons lo medya sosyal; kot tel ou tel *pet* in perdi, e son met pe ofer en rekonpans pou sa ki annan okenn lenformasyon. Oubyen ki kapab retourn avek son zannimo.

Mr Speaker, apre ki nou'n pas en lazournen travay avek tou sa kantite presyon, ki nenport ki profesyon ki nou ladan i anmennen, mon asire ki tou Seselwa i *look forward* pou antre kot li, kot i kapab repoze dan tranquillite, e sekirite son prop lakour.

E ler sa konfor e sekirite i ganny vyole par bann kriminel, sa i annan en lenpak negativ lo lemosyon sa endividi oubyen sa fanmir ki'n ganny afekte.

E mon santi ki petet parfwa nou pa realize ki kantite sa i kapab afekte en dimoun. Ler ou mazin ou *privacy* in

ganny enteronpe, e kot ou ti santi ou an sekirite. I nepli le ka.

E souvandfwa, sa i afekte sa bann dimoun ki'n pas atraver bann tel leksperyans, plis ki sa byen materyel ki zot in perdi ler in ariv kek vol dan zot lakour. Kot bann vagabon in ganny akse dan zot lakaz.

Mon'n komans koumsa Mr Speaker, pou souliny lenportans ki Mosyon Onorab Adelaide i annan. Mon rekonnet ki lapolis in fer gran progre an sa ki konsern deteksyon, prevansyon e arestasyon kot krim i konsernen.

Sirtou dan bann ka kot lakour in ganny kase e vol in ganny komet. Oubyen kot touris in ganny vole, e sa bann ki responsab in ganny atrape. E sa bann propriyete in ganny retournen – in ganny retrouve e retournen avek son met.

Me Mr Speaker, nou konnen ki menm sa, vol i kontinyen annan e i pou kontinyen annan. Zis dan mon distrik, preski tou le semenn mon ganny bann tel rapor.

E zis yer swar, mon ti pe koz ek enn mon zabitan kot; sa dimoun ki'n antre kot li in kit en koute deryer. E ki malerezman lapolis pa'n kapab idantifye okenn *fingerprint* lo la.

So, son propriyete in ganny vole. Malerezman dan sa ka la, personn pa pou kapab ganny atrape. Me parey koze i dir ki; prevansyon i pli meyer ki gerizon. E mon pou antyerman dakor avek sa.

Mosyon Onorab Adelaide ki pe demande ki bann landrwa stratezik dan nou kominote, e sa landrwa kot nou sipoze santi nou plis an sekirite ki nou apel nou lakour, i ganny proteze atraver lenvestisman ki nou bann sitwayen i a fer dan bann kamera sirveyans. Sa i pa pou zis fer ki nou lakour i an sekirite. Me i pou osi rann nou kominote enn ki pli an sekirite.

Envestir dan bann kamera sirveyans i en lenvestisman ki anmenn plizyer benefis. E i enportan alors parey Mosyon pe demande, ki nou bann sitwayen i mazin pou al dan en tel direksyon.

Ler ou annan kamera sirveyans kot ou lakour, ou tou dabor – i tou dabor azir koman en *deterrent* pou bann kriminel. Akoz ler zot konnen ki sa landrwa i annan kamera, zot pou mazin de fwa avan zot vin vandalizm ou lakour.

E mwan, mon konn menm dimoun ki met *camera* kot zot ki menm pa pe marse. Zis kriminel i vwar poudir i annan *camera*, zot pa pou vin kot sa

lakour pou vin kase. E sa i rezon prensipal akoz plizyer bann *homeowners* i swazir pou fer en tel lenvestisman koman en *deterrent*.

Menm dan bann lenstans kot sa bann kriminel i met *mask*. Parey i annan dimoun i a dir; be ou'n met *camera*, zot vini dan *mask* - ou war *footage*, ou pa konnen lekel?

I annan bann sistenm ki *motion activated*. E ki alors pou fer okenn kriminel mazin de fwa, avan zot vin sey antre kot ou lakour. Akoz ou pou konnen dek ki i annan en dimoun pe antre lo ou propriyete.

Kamera sirveyans i ede osi asiste lapolis pou *solve* bann ka kriminel par met a zot dispozisyon bann *footage* e lenformasyon ki esansyel pou kapab atrap sa ki responsab. E posibleman reganny ou bann propriyete ki'n ganny vole.

I annan sistenm osi ki ou kapab ganny en *alert* lo ou telefonn lo bann aktivite sispe kot ou lakour. E ou, ou a deside si ou pou enform lapolis oubyen non.

Bann tel sistenm i osi azir koman en proteksyon pou ou fanmir. Ler ou pa kot ou lakour, akoz ou kapab ganny bann *footage* direk lo ou telefonn e donk ede kit en lizye lo ou fanmir ler ou pa la, Mr Speaker.

Ler ou'n envestir dan bann sistenm sirveyans kot lakour, i osi kapab ede fer desann ou *premium* ki ou peye avek ou lasirans, pou asir ou lakour kont okenn sa bann evantyalite.

Mr Speaker, sa i en lalis bann benefis ki kamera sirveyans kot lakour i kapab anmennen. Me kestyon petet ki plizyer nou pe poze se; eski tou fanmir i annan sa mwayen pou fer en tel lenvestisman? Parey o komansman mon'n dir. Repons i non.

E se pou sa ki mon pou lans en lapel avek Gouvernman, pou konsider bann opsyon posib. Tel parey entrodwi en *scheme*. Parey in annan pour pano soler. E mon rapel ti annan en kanpany pou retir stov petrol kot nou bann lakour dimoun.

In annan plizyer bann *scheme* dan sa laliny kot bann konsesyon in ganny donnen. E mon mazine ki atraver bann konsesyon *tax* lo sa bann lekipman sirveyans. E ankouraz plis dimoun al dan bann tel biznes koumsa.

Ki sa prodwi a vin pli afordab pour nou bann sitwayen. E ava ede rann nou bann lakour avek nou bann kominote parey Mosyon pe demande. Plis an sekirite.

I enportan osi Mr Speaker, pou ki ler nou pe ankouraz nou sitwayen pou envestir dan sa bann lekipman sirveyans, ki nou osi asire ki i annan bann Lezislasyon adekwa pou fer sir ki *privacy* nou bann sitwayen i ganny respekte.

E ki ava osi asire ki bann endividi ki'n fer sa bann lenvestisman i ganny serten proteksyon anba Lalwa. Akoz mon aktyelman konn serten ka dan mon distrik kot pe annan serten konfli antre vwazen lo sa zafer kamera sirveyans.

Annan pe dir kamera pe vir kot li e pe afekte son *privacy*. Me selman, *huh*, ler i annan en vol ki arive kot sa menm dimoun, li menm li i apros sa vwazen pou demande, si i kapab vwar *footage*? Si pa'n vwar lekel ki'n vin kot son lakour?

Avek sa de pti mo Mr Speaker, mon pou aport mon Mosyon pour – mon siport pou sa Mosyon, ki mon santi i annan en gran lenportans. E ki mon swete Gouvernman ava konsidere e enplimante dan en dele pli kourt posib. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab Monthy. Onorab Samynadin, *you are next*.

### **HON KELLY SAMYNADIN**

Mersi Mr Speaker. Bonn apre midi tou dimoun a lekout. Mr Speaker, en pep ki an bonn sante e an sekirite, i anmenn ver en kominote ki for e pli rezilyan.

Sitwayen i santi zot pli an sekirite letan zot ganny respekte, valorize e ganny akse avek en varyete resours ki enkli; lasante, sosyal, natirel e edikasyonnel.

Mosyon pe met lanfaz lo mentenans en bon nivo sekirite, par ankouraz plis sitwayen pour investir dan lenstalasyon bann kamera sirveyans dan bann landrwa ki neser, pou kapab garanti plis sekirite dan nou bann kominote.

Mr Speaker, Au Cap i en distrik ki pa'n ganny eparnyen avek krim ek bann lezot aktivite ilegal; sirtou kot vol ek kas lakaz i konsernen. Bann lakaz ek bann pti letablisman touristik i kontinyelman ganny kase. E sa in byensir elev bokou konsern ek fristrasyon parmi bann zabitan.

Lotorite Distrik in zwenn avek plizyer lotorite konsernen, tel ki; lapolis, Departman Tourizm. Ensi ki bann zabitan zot menm. Pou esey trouv bann

solisyon tanzib pou kapab lit kont sa bann *act* ilegal, e esey atrap bann *perpetrators*.

Swivan sa, bann zabitan, enkli Lotorite Distrik ti zwenn ansanm dan en *WhatsApp group*, ki mon pou dir i vremen aktiv ziska ozordi; kot ansanm, detay lo bann *perpetrators* ou okenn lensidan sipe i ganny fer pase. Avek bi pou kapab ede kree bann sou distrik e nou distrik an zeneral, pli an sekirite.

Mr Speaker, kamera sirveyans pa en eleman ki nouvo parmi popilasyon distrik Au Cap. Letan ki mon ti pe konsilte bann zabitan lo sa Mosyon, anmennen par Onorab Adelaide, zot in vremen akeyir sa linisyativ, anvi ki en anplifikasyon lo sa travay ki nou'n komanse lo nivo distrik. E ki i ava osi en *wake up call* pou lezot zabitan, ki petet pa ankor vin devan pou ede dan transformasyon nou kominote.

I enportan pou note ki plizyer zabitan in deza komans enstal bann kamera sirveyans kot zot lakour; kot zot biznes, oubyen letablisman touristik. Sirtou bann ki ti pe ganny kase par voler. Me fodre nou met antet ki bokou *perpetrators*, zot pa vremen enterese avek kamera sirveyans.

Bokou dimoun ki kontakte mwan. Sirtou bann ki'n sibir bann lensidan vol. Zot anvoy mwan bann *footage* kot voler pe antre dan zot landrwa, san vreman pran an kont ki i annan kamera an plas.

E malgre ki sa bann levidans i ganny anvoye kot lapolis, swa zot dir ou sa dimoun pa ganny arete. Oubyen zot dir ki aksyon konkret pa ganny pran avek sa bann *perpetrators*.

E souvandfwa nou vwar dan distrik, ki se bann menm dimoun ki kontinyelman komet sa bann lofans. Ki montre ki i annan en defayans dan Lalwa ki bezwen ganny amande; sirtou dan *Misuse of Drugs Act* an sa ki konsern probasyon, *penalties*. Ensi ki pou bann *repeated offenders*.

Mr Speaker, *motto Community Crimewatch Seychelles* ki; "*Let's take back our communities*" inisyé par Mr Christopher Lespoir, i enn ki tre kler. I enn ki pe demann sitwayen dan tou kominote pou zwenn ansanm e angaz plis avek Lotorite Distrik.

Lapolis, ensi ki lezot Lotorite konsernen, pou kapab ede promouvwar bann kominote ki pli an sekirite. E ki lakantite krim ki ganny komet i ava ganny redwi.

Mon vreman fyer pou dir ki swivan Mosyon ki mon ti anmennen tou resaman, kot mon ti pe demann lapolis pou entansifye patrol dan bann distrik, enn bann rekomandasyon ki ti ganny met devan in aktyelman pe vin an realite.

La mazorite distrik atraver Sesel pe aprezan ganny zot prop *Neighbourhood Crimewatch WhatsApp Group* ki pou konpri 4 *admins*, DA avek MNA sak distrik, *station commander* ensi ki *regional commander* sak rezyon.

Mon ti a voudre profite pou remersye Departman Lapolis atraver *Community Engagement Unit*, anba ziridiksyon ASP Vincent Marie, pou reaffirm zot langazman an sa ki konsern *Community Policing*. Ensi ki dan lansman bann *Group Community Crimewatch* dan bann distrik.

Sa i demontre en lapros pli konsiltativ dan travay ki zot pe fer dan bann distrik, kot patrol e prevansyon krim i konsernen.

Mon pe osi lans en lapel avek tou bann endividi dan tou distrik, ensi ki bann ki dan Lotorite, ki pa ankor fer li, pou vin devan, zwenn zot bann diferan group respektif. E ede pou refer nou bann kominote ki *crime-free* e kot nou bann

sitwayen i santi zot pli an sekirite.

Nou tou konman Seselwa nou pe koegziste dan nou zoli pei. E byennet nou pep i konsern nou tou, e i devret nou priyorite.

Mr Speaker, enn bann pli gran litilite bann kamera sirveyans, se pou anpes oubyen *dissuade* bann ka vol ek vandalizm. Zot *act* konman en form sekirite kont bann eleman anti-sosyal ki ganny prodwir lo en baz frekan ou kotidyen.

I osi ede dan koleksyon, analiz ek disimilasyon bann levidans, pou bann rezon prevansyon kont krim. I enportan pou nou konpran osi ki sekirite pa sipoze annan okenn baryer. Pe enport kot nou ete; ki swa dan prive oubyen piblik, okenn ant nou pa pou anvi vin viktim, temwannou oubyen fer fas avek okenn aktivite ilegal. E lenstalasyon bann kamera sirveyans i enn bann solisyon pli konkret ki pou ede protez sitwayen, e garanti zot sekirite pou plizyer rezon.

Premyerman; pou ede anpese ki dimoun i ganny atake e garanti ki zot bann propriyete i ganny sofgarde.

Dezyenmman; i pou ed lapolis trouv levidans kont bann krim ki ganny komet. E

osi lenstalasyon bann kamera sirveyans pou osi ede pour idantifye e determin lidantite en *perpetrator*.

Sepandan parey in ganny fer resorti oparavan, i enportan pou note ki malgre ki napa *duty* lo kamera sirveyans, i zis annan sa 15poursan VAT. Pri bann kamera sirveyans pa neseserman abordab pou plizyer sitwayen, ki petet ti ava voudre investir dan enn.

Dan sa ka, mon pe demann avek Lotorite konsernen pou travay anver revizyon abordabilite bann kamera sirveyans. Pou ki sa ki ti ava anvi investir dan enn, i ava kapab fer li. Si non, rezilta ki nou pe rode pa pou ganny obzerve.

I osi enportan ki mekanizm i ganny met an plas pou asir *maintenance* sa bann kamera, pou asire ki zot reste azour e toultan dan bon kondisyon.

Mr Speaker, avan mon terminen, mon ti a voudre lans en lot lapel avek zabitan distrik Au Cap, pou fer sa pa e zwenn sa *Team Community Crime Watch* pou nou distrik ki'n ganny etablir, pou nou kapab fer nou distrik vin pli an sekirite.

En kantite in ganny fer depi son konsepsyon. E bokou

sitwayen angaze in vin devan e pe ede fer en diferans. Me parey zot konnen, linyon i fer lafors. En kominote ki angaze, i en kominote ki konn sikse e ki solid.

An konklizyon mon pou dir ki wi, sa Mosyon i enn ki tre sibstansyel e ki annan en gran merit kot tou dimoun, dapre zot diferan rol e responsabilite, i devret pran li konman zot responsabilite personnel.

Avek bi pou garanti bann kominote pli an sekirite pou investir plis dan bann kamera sirveyans. Mersi Mr Speaker e mon konfirm mon sipor pou sa Mosyon.

**(APPLAUSE)**

**MR DEPUTY SPEAKER**

Mersi Onorab Samynadin. Prosen enterven an lo mon lalis i Onorab Michel Roucou.

**HON MICHEL ROUCOU**

Mersi Mr Speaker. Bonn apre midi a tous. Mr Speaker Mosyon anmennen par MNA Baie Lazare Onorab Adelaide, ozordi dan sa letan kot nou ete, i vremen enportan parey bann ki'n koz avan mwan in dir. Akoz ozordi konmela, ler ou pe get nivo krim, parey in deza ganny eksplike dan sa Lasanble dan

plas desann nou vwar poudir pe monte.

E ozordi, menm kot ou lakour, ou vwar ou ki kot ou nepli an sekirite. E ozordi kot bokou lakour ler ou pour pase, ou vwar bokou dimoun pe investir pour enstal *camera*, kot sa i vin lo zot prop sekirite pour zot menm, pour zot prop sirveyans me i osi i annan bann lezot lakoz akoz ki dimoun i enstal *camera*.

E mwan mon rapel tre byen ler mon ti ankor pe travay *Housing*, mon ti bezwen pe vwar mwan pe, pe antre dan en sityasyon apre ki en vwazen, ti pe fer en konplent ki son vwazen o bor li ti'n enstal en *camera*. I ti santi li ki son lavi prive pe ganny menase dan nenport ki fason e la kot ler nou ti ale, nou ti bezwen fer son met ki'n enstal a *camera* kot son lakour pour montre nou egzaktman kote son *camera* pe vire, si vremen i annan sa lenpak ki pour afekte son vwazen.

Wi Mr Speaker, nou ti vwar sa dimoun e nou ti enform sa dimoun ki ti'n fer sa konplent. Be apre en pe letan apre sanmenm sa dimoun ki ti'n fer sa konplent, i ti retourn kot nou menm apre ki ti'n ariv en lensidan kot son lakour ti'n ganny kase e ganny vole.



E i ti menm demann nou, pour nou apros sa vwazen ki'n enstal sa *camera* pour li kapab ganny *footage* pour li konnen lekel ki'n kapab komet sa aksyon, pour antre kot li. E sa vwazen ti refize, i ti refize Mr Speaker akòz i ti mazine poudir ler li i ti enstal son *camera*, petet pour en bon, pour en bon rezon, e son vwazen dan plas apros li, i ti pran li dan en fason negativ.

Mr Speaker, apre osi ozordi kot bokou lakour nou vwar kot i annan dimoun ki pe antre, pour fer bann kek aksyon, dan lakour e souvandfwa nou vwar nou'n vwar, kot i annan dimoun menm aswar ler i pe repoze, ler i sote petet lo granmaten i annan dimoun ki'n antre petet dan kek mask, dan son lakour, atak li ek son fanmir.

E ozordi, nou pe vwar poudir se ki i vreman enportan, ki ou annan en fason pour ou kapab vin - pour ou kapab dir ki i montre - ler ou enstal en *camera* i montre dimoun ki - i evite ki sa dimoun i annan sa nide, pour zot kapab vin fer - komet kek aksyon mal.

E osi Mr Speaker, mon panse poudir anvi ki *camera* i pe vin sitan popiler isi Sesel, nou devret annan en ledikasyon. Nou devret annan

en ledikasyon pour donner pour edik nou pep, lo kote *camera* li menm li, ler i ganny mete, pour kwa ki ou devret pe ganny pour met en *camera*? Akòz? E ki i respe dan lo sa lapar, *privacy* pour ou donn ou vwazen, pour ou donn ou vwazen akòz li osi tou - i annan son drwa pour li annan son *privacy*.

Me selman nou devret annan en ledikasyon lo la, par kelken, ki oubyen bann dimoun ki enstal *camera* li menm li oubyen bann ki pe fer vini *camera* dan pei, petet i annan plis dyalog kot nou bezwen edik Seselwa.

Ou konnen avek keksoz ki pe evolye ozordi, ek lemonn modern parey toultan i dir, se ki ozordi tou dimoun pe rod sa pli bon sekirite pour son lakour, pour son fanmir li menm li, pour son propriyete; akòz menm si sa dimoun pa pe antre anndan kot ou, petet i annan kek keksoz deor ki si - ou kapab zis vini vwar i manke.

E ozordi avek vandalizm ki pe ariv souvandfwa Mr Speaker, petet bokou dimoun sa osi akòz ki zot vwar poudir nesessite ki i annan en *camera* kot zot lakour. Me selman parey mon'n dir, se ki mwan mon panse poudir, bann vwazen dan

bann kominote zot bezwen annan dyalog.

Akoz konmela souvandfwa, nou vwar poudir se ki ti annan enn pti nanryen ditou i kapab deklar koman en gro keksoz, en diskisyon *between* antre vwazen. E mwan mon krwar zot devret annan sa dyalog, e petet ler ou – en ler sa dimoun li i pe enstal son *camera* li menm li i pa pe demann permisyon sa vwazen, petet enform li, entel mon pe met mon *camera* pour tel rezon, selman mon pe fer sir poudir petet i pa pe - i napa nanryen pour fer ek ou *privacy*. Mon pa pe mete pour petet filmen ou *or whatever* ki pase kot ou lakour.

Mr Speaker, apre ler nou'n koz lo nivo sekirite, nou vwar ozordi ki Lapolis li menm li i fer konnen poudir lo kote son *manpower*, i napa sa kantite ki li i ti devret annan. E nou vwar poudir vol i pe ogmante kot bokou bann biznes, bann laboutik, kek landrwa, bann apartman li menm li espesyalman kot bann lotel osi tou, souvandfwa bann touris i ganny vole; kot petet nou devret ankouraz bann biznes pour zot kapab met *camera* sirveyans, ki sa i a kapab anpese, i a dekouraz bann dimoun ki annan kek nide malisye pour zot vin fer, oubyen kas landrwa.

E nou konnen poudir i annan serten letan konmela, se ki nou vwar bann video ki ganny anvoye, mon osi tou mon gannyen tanzantan kot bann dimoun ki pe al komet kek aksyon zot kouver zot figur. Me petet sa avek letan i a kapab letan ou met en *camera*, sa dimoun i a kapab ganny idantifye dan nenport ki fason.

E avan mon vin koz lo sa Mosyon, mon'n ganny sans pour mwan vin koz avek lapolis, zot in fer mwan ganny en konpran poudir souvandfwa i annan bokou dimoun ki zot annan *camera*, ki petet son vwazen li i napa, li i pa kapab pour lemoman investir dan enn sa, zot ganny problem - pour lapolis kapab ganny en *footage* sa *camera* pour ed zot dan zot travay.

E sa osi mon mazine poudir se ki nou bezwen adrese e si plis manm piblik la deor, oubyen bann *owner* bann biznes, ouswa bann *owner* bann lakaz ki annan sa *camera* kot zot, zot kapab ed lotorite pour ede.

Akoz zis mazine poudir sa ki ariv kot ou vwazen i kapab ariv kot ou demen, nenport kwa si ou annan *camera*. E si ou fer li petet i annan kek dimoun la dan ou kominote ki ou pa abitye vwar, oubyen ou kapab pa vwar

lo *camera*, ki ou soupsonnen sa i kapab ede ki demen sa i ede pour ed zot kominote.

E osi Mr Speaker, ki mon'n ganny dir avek Lapolis se ki zot pe ganny bokou problem espesyalman Providence kot i annan bokou biznes, aköz i annan bokou biznes kot zot napa *camera*, zot napa sa. E sa lapolis, i dir mwan ti pour ed zot espesyalman Providence li menm li Kordgard Mont Fleuri, e deservi ziska laba.

E lapolis dan distrik Mont Fleuri in fer mon ganny en konpran poudir zot ganny bokou problem pour zot kapab idantifye bann dimoun ki pe komet kek aksyon, aköz i annan plizyer biznes ki zot napa *camera*.

Petet la, si zot kapab investir dan enn sa, sa i ava ede. E dan bann kominote li menm li Mr Speaker, si nou kapab ankouraz bann dimoun avek mon'n dir, parey mon'n dir lo komansman avek ledikasyon, pour fer sir poudir sa demen i pa vin en diskisyon li menm li, kot sa i ava ede pour dekouraz kek akt malisyè; kek dimoun ki pe antre petet pour vin fer dimal bann fanmir kot bann lakour. E sa osi tou, petet i ava fer nou kominote vin en landrwa enn pti pe plis an sekirite, kot nou kapab ede.

E mon osi dan mon distrik Mr Speaker i annan bokou biznes, tou dilon semen Mont Fleuri ou pour vwar i annan bokou laboutik, e si zot osi zot kapab ede pour investir bokou dan *camera* ki sa i ava ede pour *deal* avek bann nwizans, bann dimoun ki pe fer bann akt anti-sosyal li menm li, kot nou a kapab bouze.

E mon distrik, Mr Speaker i baliz avek lavil - parey zot tou zot konnen - se ki nou vwar poudir kot dan lavil i manke lakantite *camera*. E petet parey souvandfwa mon demann mon kestyon atraver ou Mr Speaker, pour Komisyoner Lapolis ler i vin la, mon krwar pros trwa fwa mon'n demann li; petet annou get nou bann *partner* - bann *partner* ki zot, zot annan.

Ki petet i kapab ed zot osi avek en pe *camera*, kot sa i ava ed zot enn pti pe plis, dan zot travay ki zot fer e pour detekte bann krim dan lavil, dan kominote e partou bann landrwa kot i annan bann aktivite ilegal.

Mr Speaker mwan mon pour donn mon sipor sa Mosyon anmennen par *MNA* Baie Lazare. E mon dir li kont lo mwan, aköz mon osi mon krwar poudir dan sekirite nou pep, dan sekirite nou kominote, i pa depan zis lo lapolis, i pa depan

zis lo en serten endividi i depan lo nou tou.

E nou tou nou devret konsernen avek nivo krim ki pe arive. E nou bezwen pe travay bann kominote nou bezwen pe travay en tim, e nou vwar se ki konmela tro bokou - i annan tro bokou diskisyon antre vwazen dan bann kominote, pour bann keksoz ki ou kapab dir zot kapab ganny rezournd.

Mr Speaker mon pour donn sipor sa Mosyon. Mon le dir ek *MNA* Adelaide kont lo mwan mon osi. Mersi.

### **MR DEPUTY SPEAKER**

Mersi Onorab. Prosen entervenans lo mon lalis se Onorab Egbert Aglae.

### **HON EGBERT AGLAE**

Mersi Mr Speaker. Bonn apre midi tou dimoun ki a lekout. Mr Speaker Mosyon ki la devan nou, i en Mosyon ki pe demann sitwayen pour pran serten responsabilite, pour kapab enstal bann lekipman sekirite - sa i *camera* plizoumwon - pour zot kapab redwir en pe bann tandans kriminalite ki pase, enn pti pe partou e osi ede dan deteksyon bann ki koupab.

E pour mwan Mr Speaker, mwan mon regard sa Mosyon e demann ki sa Mosyon pe demande ladan de fason.

Premye fason mon pour koz lo sa laspe sekirite. Mon krwar nou tou avek lemond ki pe evolye nou pe vwar bann pratik pli modern, pli avanse, kot ozordi *in broad daylight* parey Angle i dir, bann lensidans i arive e pase.

E souvandfwa bann ki ganny afekte, i al rod rekour ver sa ki mandate pour etabli lord ek lape e dan pe fer sa pa toultan ki zot ganny sa rekour, ouswa sa zistis ki zot ti a swete.

E osi nou vwar poudir ozordi ek levolisyon teknolozi ki'n avanse, bokou nou, plizyer nou mon kapab dir i annan en *mobile* avanse, bann *smart phone*, e lo la osi i annan bann aplikasyon e osi *camera*; ki bokou endividi i servi letan i annan bann lensidan osi i arive pour *capture* swa portre, ouswa video, avek bi - me pa dan tou konteks ki pe ede. Me selman i kapab ganny servi koman bann levidans dan bann prosedir legal.

E mwan sa mon - mon pa kapab dir mon annan problemm avek, si i pe ede dan en fason. Me kot parfwa nou tant pour pri dan bann lenstans, se - tou keksoz ki nou fer la, ki nou pe demande osi, i bezwen annan en limit osi. Mon dir limit akoz kot mon drwa i komanse,

ouswa kot mon drwa i fini, pour ou i komanse.

E si nou mal servi teknolozi ki a nou laporte, i kapab gratwit ouswa ou ki'n aste ek ou prop larzan, i kapab koz ditor en endividi ouswa en fanmir, ouswa mon pa konnen en lakonpanyen li menm li, si nou mal zerans sa.

E se sa ki mwan mon santi poudir koman en pei, ki nou rekonnèt e nou nimero enn lo nivo Lafrik dan plizyer domenn. I neser ki nou koman en pei, nou bezwen osi annan bann kad legal, ki azour ki fer ki malgre ou drwa posesyon okenn keksoz materyel ou telefonn, ou *camera*, i kapab en *drone* osi, i osi ozordi i popiler, i bezwen annan bann regilasyon e *guideline* ki atas avek ki fer ki i ava akord ou drwa pour ou servi li, me selman i ava akord proteksyon, pour sa ki ou pe target li.

Ouswa dan en fason si ou pe mal servi li, sa endividi i a kapab ganny rekour anba en Lalwa pour li kapab egzers son drwa, koman son privelez.

E la Mr Speaker, mwan mon pe dir sa pa ti neserman akoz mon annan serten dout, me selman nou konn natir imen parfwa, nou *go* enn pti pe *overboard*, dan nou fason fer.

Me Mosyon li, i pe demann en lenstalasyon sirveyans *camera*, dan lakominote e dan bann landrwa. Me nou bezwen kler lo landrwa osi ki nou pe demande pour met sa, *ok*?

Landrwa piblik byensir i ganny zere dan en fason par bann Lotorite gouvènmantal, e nou koman en Manm Parlman i annan plizyer kestyon e tou resaman in annan kestyon lo size *camera*. Perseverance Onorab Deshiela Bastienne atraver ou Mr Speaker, ti anmenn kestyon, Onorab Regina Esparon osi mon krwar ti swivi avek serten kestyon dan la laliny.

Lo sa size li menm li, dan landrwa piblik, Gouvènmant li i annan en responsabilite pour li zve parey bokou pei, sirtou Lerop ki avanse, Lanmerik, Lazi preski partou dan bann *spot* landrwa piblik, ou pe vwar i annan bann *camera* ki swa ou pe koup semen; ki swa ou pe pase dan ou transpor kot bann *traffic lights*, bann *speed detector camera* osi, tousala i annan.

I en responsabilite en Gouvènmant ki atraver en lakonpanyen i kapab mandate pour kapab fer sa bann lenstalasyon.

E osi nou vwar poudir i annan bann defayans ki atase

ek sa size malgre nenport ki Gouvernman pour seye, pour mete. I annan son laspe *maintenance* si ou pa pe fer li, akoz teknolozi i annan en *lifespan*, e osi ou bezwen *update* li tanzantan, son *software* pour fer li reste relevans pour li kapab kontinyen siport avek bann lezot *software* ki atase avek deteksyon.

E la mon pour al enn pti pe pli profon letan mon pe koz bann lezot konponan *software* ki atase avek sa bann *camera* sirveyans.

E letan mon'n dir, ki zistans ki nou, nou pour ale, si nou pour met bann kad legal e *allow* nenport ki endividi fer en lenstalasyon dan son vwazinaz, ouswa distrik li menm i pran bann linisyativ atraver Lofis Lotorite Distrik pour met dan bann sa ki nou apel *black spot*, bann *dark spot*, kot dimoun i frekante, kot i kree serten nwizans lenkonvenyans. Nou pour bezwen annan fason pour annan kontrol osi lo sa bann *device*.

E si nou pe koze nou pour bezwen santraliz - bomaten i annan kestyon ki Onorab Churchill Gill in anmennen, kot i konsern lavansman teknolozi dan domenn finansyel, bann sistenm entegral e la, i annan posibilite ki sa bann sistenm ki

nou pour bezwen mete dan nimeron distrik ki pour entegral avek en sant komann, i kapab en Sant Lapolis me tousala i vin avek en kou ek en Bidze pour kapab *manage*.

E la osi konsern se nou pour bezwen bann ekspertiz, pour kapab anmenn bann lakonpanyen ki pour kapab zer sa bann lenfrastruktir letan nou'n met li an pratik, letan nou'n *set li up* e nou bezwen fer sir osi ki nou fer avek data, akoz i rikord data li. Nou annan *camera* ki rikord lavwa ozordi, i avanse pa zis portre i annan *capture song*.

So ou pour annan en *bank of* lenformasyon data ki pour ganny anmase si zanmen nou pa dan en sistenm entegral a lavenir, pour anmas sa so, lenformasyon piblik lo en endividi i kapab pe ganny anmase dan en fason ou en lot. So tousala nou bezwen pe *think alongside* sa.

E osi se sa ki mon'n koz sa kad legal ki pour enportan, pour kapab annan proteksyon dan tou lede kote sa. Mon pa pe koz zis pour sa endividi mwan, be osi Leta osi i deza annan serten proteksyon *ok*.

Prezan letan nou pe dir endividi, pran son responsabilite e nou tou nou konnen ki mannyer ozordi nou,

nou viv dan en kominote Mr Speaker. I annan plizyer *housing estates*, ok? E la mwan mon dir poudir lo kote *housing estates* si pour annan lenstalasyon, annou demann sa konpanyen ki zer, bann *housing estates*, sa se *PMC*.

I ava investir li osi, donn lanmen investir, akoz si nou dir tou dimoun fer, met en *door to door camera*, lo son lapartman i kapab annan 10 apartman dan en blok, i kapab koz serten konsern. Akoz mwan mon'n deza ganny *call*, i dir entel i met son *camera*, in vir zis kot li, kot li i pe pase, i pe *breach* son *privacy* dan en fason.

So tousala i bann konsern i kapab lev kankan. I kapab fer problem, so nou bezwen konpran ki mannyer nou pour *allow* dan bann *estates* sa ganny fer. *Is it* nou pour met lo *entry point*? Nou kouver *car park*?

Parey nou konnen poudir i annan *car park* ki ganny vandalize, transpor i ganny kase. I ava en pwen ki a ganny mete. Petet sa i bann sizesyon ki nou bezwen eksplere, nou pa pour kapab dir en *housing estate* tou dimoun met en *camera*, petet i ava met dan en fason, dan bann kwen, pa konnen!

Pour bann *stand-alone house* parey bann ki annan son propriyete prive sa i pli fasil pour li zere li menm li akoz i pour preski napa person lo bor li ki pour ganny afekte. Sa i en lot sityasyon, me dan konteks *estate* annou, annou *think about it*.

En lot eleman se sa eleman finansyel, ki mon krwar i annan refleksyon ki bezwen ganny fer lo sa si tou dimoun pe al *upgrade* pour met en *camera* kot li. Me nou bezwen osi mazin *along the line* poudir i annan *camera* ki'n avanse ozordi, ki servi en sistenm *wireless*, pa bezwen pas difil partou, i annan ki ou kapab *monitor* avek ou telefonn.

Mon asize mon la anndan mon kapab pe get kot mwan ki pe arive, ouswa dan mon zalantour ki pe pase. E data i koute byensir, i pour kout en pe larzan pour ou kapab *maintain* en sistenm *Wi-Fi* kot ou, pour kapab fer *run* sa sistenm *camera*, si *ever* ou'n al lo sa enn ki pe servi sa sistenm.

E se sa ki vin ek en kou mon dir petet avek Gouvernman, vin ek en *scheme* ki ava al pour en peryod letan, parey nou met en *Scheme Pano Soler*, ki an mars atraver *PUC*. Si nou serye nou anvi fer sa Mosyon zistis, a vin avek en

*scheme* ki ava kapab aköz pa zis napa *tax* lo la, i pe neserman fer li pli abordab. Sa nou bezwen konpran sa.

Nou pour bezwen si nou anvi ankouraz dimoun pour fer sa ki nou pe demande, nou bezwen annan serten *incentive* ki atase avek pour en peryod letan e la dimoun i ava *get the grasp of it* apre zot, zot a kontinyen fer zot bann *maintenance* tousala.

Lot laspe mon krwar ki enportan, se lefe ki *camera* i en zouti, ki detekte. Souvandfwa nou'n vwar bann *case* ki'n al Ankour ki malgre levidans in montre poudir lo video, lo *camera*, sa aksyon ki'n ganny fer, Lakour in vwar poudir i pa *admissible* koman levidans.

E sa i annan diferan fason ki zot kapab argimante ennler aköz ozordi byen nou'n avanse teknolozi, nou annan sa ki nou apel osi bann, "*deepfake*", konmela en dimoun i kapab servi en portre ki pa reel, i kapab mwan, zot in serk mwan ladan, i dir "vwala i ti laba tel ler, lala lo *camera* nou'n vwar, lo *video*".

Tousala i bann keksoz ki mon krwar i enportan pour nou mazine lo la. I kapab ganny servi byen, e osi kapab ganny servi mal e kapab koz ditor, e

kapab koz dibyen pour dimoun tou sa.

So se sa mwan ki mon pe met sa devan, se ki mannyer nou kapab anbelir sa propozisyon ki la devan nou e ki mannyer nou kapab servi teknolozi dan nou lavantaz, dan deteksyon kriminalite, me osi pour nou pa bliye kot i konsern *privacy* en endividi i pa ganny afekte.

Aküz mwan mon pa *believe* dan met *camera* partou kote ou pe pase, nek ou pour annan - *comme* dir annan, en tors ki pe kler ou, mon pa *believe* ladan sa mwan!

Me selman mon *believe* dan met bann landrwa piblik, kot dimoun i santi li ler i deor i an sekirite, an piblik ki i pa pe bezwen vwar li pe maske isi, pe maske laba pour gete. E osi si nou pour met dan lakominote, nou ava met li dan en landrwa ki ideal, ki pa afekte person.

E osi en dimoun ler i sorti i konnen poudir be mon pe al travay bomaten 7er mon'n kit kot mwan 6er, si okenn keksoz i arive kot mwan mon konnen mon annan en sistenm sirveyans ki kapab dir mwan lekel.

Me selman *camera* li menm li, i pa ase dan deteksyon, i vin ek ledikasyon, i vin ek *awareness* e la mon pou



dir poudir, ti annan en *statement* ki ti ganny fer dan Lasanble, mon pa tro mazine si Minis Finans li menm li ouswa mon - se sa ki mon pa pour kapab. Me selman ti dir, be Gouvernman pour al enstal plis *camera* dan bann landrwa kot ti annan bann lakonpanyen sekirite. I byen! Napa problem!

Me selman nou bezwen konpran poudir *camera* malgre i kapte, i vin en *deterrent*, me selman letan keksoz pe arive *on scene*, letan imen i pran aksyon dan en fason.

So nou bezwen annan sa balans koezyon pour sa de keksoz armoniz ek kanmarad, kontinyen viv. Nou bezwen *camera*, me selman nou bezwen imen osi pour travay. Fodre pa nou fer sa fot, zis dir nou pour met *camera* partou, angiz ki krim pour arete. I pa neserman sa.

E nou vwar poudir menm si i annan landrwa ki annan *camera*, kriminalite, vol in arive. So sa i bann refleksyon mon krwar ki mon pe pous devan. Mersi Mr Speaker.

### **MR DEPUTY SPEAKER**

Mersi Onorab Aglae. Mon ava pas laparol aprezan avek Onorab Desheila Bastienne.

### **HON DESHEILA BASTIENNE**

Mersi Mr Speaker. Bonn apre midi Mr Speaker. Bonn apre midi tou Onorab e bonn apre midi tou dimoun a lekout. Mr Speaker permet mwan ankore enn fwa repas lo sa Mosyon li menm, avan mon kontiny mon deliberasyon.

“Pour asire ki Sesel i kontinyen mentenir en bon nivo sekirite, Lasanble Nasyonal i ankouraz plis sitwayen pou investir dan lenstalasyon bann *cameras surveillance* en pe partou kot i neser pour asir plis sekirite dan nou bann kominote.”

Mr Speaker Mosyon anmennen par Onorab Adelaide, i demande, i en demann ki gradyelman i pour vin en neserite tre enportan ki pour nou - ki pour anmenn son rol - ki i pour annan son rol enportan pour zwen dan tou distrik.

Mr Speaker, sa Mosyon pe demann sitwayen pour investir dan lenstalasyon bann *camera* sirveyans, pour kapab arive asir plis sekirite dan lakominote an zeneral.

Mr Speaker, ler nou pe koz dan lakominote, i vreman enportan ki otour lakour bann endividi i osi ganny konsidere koman en lenvestisman tre enportan dan term sekirite.

Ozordi sekirite i tre enportan, e mon pa pour ezite poudir dan sa lavi toulezour tro bokou keksoz mal pe deroule. E sa pe arive senpleman akoz bokou dimoun pa oule fer en zefor, pour leve pour al debourye.

Pour serten pran lavi fasil i zot target, ler mon dir pran lavi fasil se bann ki krwar dan pase e vol tou sa ki zot kapab. Vole, al vann, ganny larzan fasil, e viv ere san okenn remors.

Mr Speaker, dan tel sityasyon, lapliparditan i komans lanmenm la dan nou kominote, zis akote nou kot nou pe viv. I komans dan pey fri, nou prop vwazen, sa pti zarden legim, lanmenm la akote, e menm li devan son lakour, en lot fanmir ki pran son letan pour fer son pti zarden koman son letan lwazir, ouswa en fason tir presyon apre en zournen travay i pour pran sa koman en terapi, san realize ki i pe prodwir, pour en lot dimoun ki tanzantan pe pase e pe obzerve.

Mr Speaker, ler dan nou prop kominote, nou perdi respe pour lezot, nou perdi respe pour nou prop Gouvernman, e ozordi, nou pe koz lo investir dan *camera* sirveyans, se bann keksoz deplorab, ki arive atraver bann seri vol ki parey,

ki pe arive parey kas lakaz, vol materyo konstriksyon lezot, vol bann *grill* feray ki ganny met lo bann rigol pour fasilite netwayaz sa bann rigol, enkli bann slab an beton ki ganny plase lo bann *pavement*.

Mr Speaker, i annan serten ki li i zis pran plezir pour kas transpor lezot, kas magazen, detrir bann enfrastriktir ki ganny mete dan distrik. E la mon pour tous lo sa fame vandaliz lo bann lalimyer dan distrik, ki toulezour annan leokri, konsernan *streetlight* ki pa pe marse.

Mr Speaker Gouvernman i fer son bout, i fer aranze me en lot i pase i kase alor lenportans pour enstal *camera* sirveyans, i a zwe en gran rol dan sa bann tel sityasyon.

Mr Speaker nou kontinyen demande, akoz tousala pe arive? Senpleman akoz zot annan zot azanda, zot annan zot plan, ler kominote i a dan fernwanr, i a pli fasil pour zot fer sa ki zot anvi.

Sa Mosyon pe koz plis lo *camera* sirveyans dan lakominote, me i bon note ki i arive osi ki i annan dimoun ki pa kapab investir dan bann tel lekipman.

Son mwayen finansyer pa permit li investir dan tel demann, e la i bon osi note ki i

enportan ki Gouvernman ouswa bann partner prive i angaze dan sa proze, pour kouver serten landrwa kot i vremen bezwen *camera* sirveyans e ki en pe retire avek bann lakaz.

Mr Speaker, i pou bon ankouraze, ki annan bann tel lenvestisman baze lo bann *scheme* kot zabitan ki enterese i a kapab enstal *camera* kot zot e apre zot a ganny sa sans pey par *installment*.

I annan dimoun la deor Mr Speaker, i annan serten endividi la deor ki enterese pour lans dan sa biznes. Mr Speaker dan bann ka kot zabitan i vwar difisil pour investir dan *camera* sirveyans, fodre pa ki nou bliye, ki nou osi kapab tous en lot laspe sekirite.

E sa se bann lalimyer *solar*, ouswa *spotlight* ki zot a kapab met an deor zot lakaz, ki vir lo kote kot i pli fernwar e sa i a kapab ede osi dan bann tel sityasyon dan lenstans, kot zot pe esper sa fasilite, pour zot kapab ganny en *camera*.

Mr Speaker, lo sa note, mon ti a kontan osi enform bann zabitan ki *streetlights* i pour semen piblik, pa neserman pour kler kot lakaz bann endividi, pour vin en *sort of* sekirite parey i annan i krwar. Sekirite kot lakaz sak

bann endividi i son responsabilite, e sak dimoun i fer li dapre son kou, ki li i santi i kapab investir ladan. I pa pe ganny forse pour li al met li dan en problem investir dan en *camera*, me i annan serten lezot pti keksoz ki antretan zot kapab servi.

Asir sekirite dan nou kominote, i kapab ariv senpleman si nou osi nou annan sa bon lantant antre nou, bon lantant i anmenn bon korporasyon e bon planifikasyon. Vwazen antre vwazen i kapab diskite e desid antre zot lo pli bon fason fer, kot zot partaz kou depans, pour zot met *camera* sirveyans an group ouswa menm *spotlight* otour zot lakour.

Mr Speaker, i annan osi sa bon kordinasyon, i kot vwazen i pratik zet en lizye kot lakour kanmarad a tou moman. Lontan ler en dimoun ti sorti i ti kriy son vwazen lot kote i dir mon pe sorti, zet enn pti koudey kot mwan. Konmela nepli egziste Mr Speaker!

I enportan ki a tou moman, petet letan - nou vwar, nou remarke ki en endividi i pe vir, vire e ki en dimoun ki pa la ki pa sorti dan sa distrik, ki nou pa'n abitye vwar li, sa osi i enportan, ki nou montre li, ki nou rekonnet li, e nou osi ganny

sa kouraz, pour demann li ki son – ki i pe fer la?

Mr Speaker, kot bann lekòl osi fodre pa nou bliye ki i vremen enportan pour nou ganny bann sipor pli irzan posib! Sirtou lo semen piblik an deor baro lekòl, kot bann gro *jeep* i park pour anmas bann zanfan apre lekòl. *Camera* sirveyans i ava donn ase levidans.

Mr Speaker sa Mosyon i annan son merit, e i enportan ki *camera* sirveyans i osi ganny enstale dan bann kominote, pour asir pli bon levidans kont vol, vandalizm, aksidan, e osi bann ka mert ek vyol.

Mr Speaker, mon pour remersi Onorab Adelaide pour sa Mosyon e mon pour donn li tou mon sipor total. Mersi.

### **MR DEPUTY SPEAKER**

Mersi Onorab Bastienne. Mon pou aprezan apel Onorab Wallace Cosgrow.

### **HON WALLACE COSGROW**

Mersi Mr Speaker. Bonn apre midi Mr Speaker. Bonn apre midi tou Manm e tou dimoun ki pe ekout nou swa lo radyo, swa lo televizyon.

Mr Speaker mon pe aport mon kontribisyon apre midi pour sa Mosyon. Mon krwar i annan serten pwen ki apre ki

mon'n ekout serten Manm koze, mon krwar i annan serten pwen ki mon – ki enportan ki nou fer resorti koman bann Manm sa Lasanble ki nou met deor, pour ki piblik i kapab avan ki zot fer bann desizyon ki pe – ki sa Mosyon pe demande, pour ki piblik i kapab fer serten konsiderasyon osi, baze lo bann lenformasyon petet ki mwan mon pour met devan la Mr Speaker, en?

So si nou pe koz lo sa size apre midi Mr Speaker, i vedir ki i annan en problem dan lasosyete. Nou bezwen admet ki ozordi dan lasosyete i annan en problem kriminalite, ki pe afekte nou lasosyete, nou bann kominote, e nou bann lakour.

E bokou bann Manm ki'n koz avan mwan, in fer referans lo bann problem kriminalite ozordi dan lasosyete, bokou bann Manm ki annan, ki bann Manm Elekte dan bann distrik, zot in koz lo problem kriminalite dan zot distrik, dan zot lokalite.

E se pour sa rezon mon panse osi ki loter Mosyon Onorab Adelaide, in vwar li neser pour li vin avek en tel Mosyon, avek en tel propozisyon. Me nou bezwen get sa zafer dan son lansanm e nou pa kapab get li an izolasyon avek serten lezot keksoz.

Kriminalite Mr Speaker i en rezilta detrwa keksoz. De bann keksoz ki mon pour koz lo la, mon'n swazir pour koz lo la apre midi se premyerman Mr Speaker, se sityasyon sosyal ozordi dan nou pei. Nou pa kapab divors kriminalite i pa sel lakoz, byensir! Me nou pa kapab divors lensidans kriminalite avek sityasyon sosyal dan nou sosyete.

E ozordi i en realite ki bokou dimoun, in vin pli pov e lapovrete Mr Speaker i fors serten dimoun pa tou! Me serten dimoun pour opte al ver kriminalite pour kapab zot soutenir zot bann aksyon. I annan ki decide al travay plis, nou bezwen aksepte sa i normal, e nou felisit zot.

Me malerezman i annan bann group dan lasosyete ki ozordi ki decide li i pour al ver serten eleman kriminalite, pour li kapab ganny plis larzan pour li sonny son fanmir *or* pour li kapab *meet* son bezwen personnel ki li i annan.

Sa i en fe, sa i en realite e nou bezwen zi nou anvi adres sa sityasyon, nou bezwen kapab annan latolerans pour nou ekoute, pour nou ekoute; mon pa pe dir zot dakor avek mwan, sa i mon pwennvi, i mon pwennvi. E nou bezwen aksepte e dakor ki poudir i annan

diferan faktor ki koz kriminalite.

I annan pei ki ozordi zot sityasyon kriminalite i bokou pli ba. E si nou asize nou, nou get lasosyete, nou get lafason ki sa bann pei i ganny zere, nou pour vwar ki poudir, i annan en korelasyon ant kriminalite avek sityasyon sosyal.

Sa i en fe sa! I en fe e i pa neserman 100poursan me selman i annan serten korelasyon. E alors Mr Speaker mwan dan mon pwennvi, ler nou pe koz lo kriminalite, pour mwan akter nimerò enn ladan responsabilite akter nimerò enn ladan, se Gouvernman.

Gouvernman i bezwen fer sir ki li, li koman sa responsab bann lenstans dan lasosyete, dan pei par egzanp lafors lord ek lape, lapolis, bann lafors sekirite, i ekipe, i annan tou mwayen pour zot kapab *deal* avek kriminalite dan pei.

Nimerò enn se Gouvernman, se responsabilite bann lazans sekirite dan pei, pour *deal* avek kriminalite. Ozordi i annan en kantite sitwayen wi vre zot, zot in ganny afekte *or* dan prevansyon pour zot pa ganny afekte, zot in pran serten mezir lo zot menm pour zot kapab protez zot lekor avek zot bann *assets*.

Me responsabilite prensipal fodre pa ki nou ignore, responsabilite prensipal pour protez sitwayen, i tonm lo Leta e se Leta ki bezwen fer sir i *provide* e garanti sekirite pour tou sitwayen e tou sitwayen, tou byen personnel, tou byen Leta, se Leta ki sipoze pe fer.

I annan sitwayen parey mon dir ki'n fer sa bann keksoz, ki'n pran sa bann linisyativ, sa ki'n met *camera*, sa ki pran sekirite ki met se li, sa ki pran diferan form aksyon, pour zot kapab sekiriz e protez zot lekor e zot bann *assets*.

E Mr Speaker ler mon'n – manner mon'n konmans ek sa, mon krwar i enportan ki nou osi admet ki pa tro lontan, pa tro lontan Mr Speaker *Leader* Lopozisyon ti vin avek en *PNQ* lo sekirite dan pei, lo sityasyon sekirite dan pei.

E ti en loportinite Mr Speaker, pour nou bann Manm Lasanble Nasyonal sa zour ki Minis ti la, direkteman, direkteman demann Minis bann keston e fer Minis reponn e *commit* avek nou Lasanble, avek pep Seselwa lo bann aksyon ki li i kapab pran koman Minis ki ansarz sekirite pei; bann aksyon ki i kapab pran pour asire ki nou sitwayen sekirite dan pei i reste *top!*

Me Mr Speaker malerezman Minis sa zour ti dir poudir kriminalite pe tonbe, i pa konpran ki manner dan en pei ki i annan 3poursan *unemployment*, nou kapab koz lo kriminalite, lo dimoun ki napa larzan.

So pour mwan sa zour ti en loportinite pour nou kapab ganny larepons serten sa bann *issues* ki sa Mosyon pe etabli. Me malerezman bann Manm lot kote Mr Speaker, zot pa'n neserman adres sa size sa zour, zot in kontinyen defann pozisyon zot Gouvernman pozisyon Minis. Me, ozordi nou vwar en Mosyon koumsa!

En Mosyon ki pe adres sekirite dan pei, en Mosyon ki pe adres sekirite lo nivo bann lokalite, dan bann distrik, e en Mosyon ki pe demann sitwayen prezan pour pran aksyon dan zot lanmen. Nou bezwen *be very careful* ler nou pe komans demann sitwayen pour pran aksyon dan son lanmen.

Ozordi nou pe demann sitwayen pour pran aksyon *camera*, demen sitwayen in ganny sa loportinite pour pran serten aksyon kote i arete? Demen sa dimoun i rikord en zafer, i vwar en dimoun i komans pran lord dan son lanmen, i ale i al aret sa dimoun i le bat sa dimoun, parey nou'n

vwar plen fwa, ki'n ganny sirkile lo rezyon sosyal.

So nou bezwen - *it's a* -i en *very fine line* sa, nou bezwen asize, konsider Mr Speaker tre byen nou bann parol ki nou pe dir, nou bann aksyon ki nou anvi ganny fer ozordi atraver sa Mosyon, akoz sa *issue* sekirite i enn ki tre, tre delika.

Mosyon Mr Speaker - mon panse, i annan bann Manm ki'n koze, ki'n dir mon panse nou letan nou pe demann bann sitwayen pour enstal bann *surveillance cameras* en pe partou dan lakominote, menm pour mwan la i enn pti pe pa kler.

Si nou le dan lakominote, si nou le sitwayen enstal *surveillance camera* kot zot ki kler dan lakominote - so pour mwan menm la i annan en *grey area*, mon pa tro kler lo ki Onorab li menm pe sey demande. Me mon panse ki pour sitwayen kapab *afford* sa.

E Onorab Aglae taler in koz lo enn pti pe lo bann *cost*, pour sitwayen kapab *afford* sa, Onorab Adelaide pe petet osi anvizaz-e ki Gouvernman i met serten *Rebate Scheme* dan en fason kot, sa bann *device* i kapab vin bokou pli bon marse.

Me i annan lezot eleman, i annan son kou aste, ki petet sa nou kapab *sort out* e fer

serten *Scheme* kot dimoun i kapab i kapab ganny akse avek, be i annan son bann kou loperasyon; kou loperasyon, son Gouvernman pran en larzan i met dan en *scheme* kot en dimoun i aste en *camera*, ki apre 6mwan, li menm li personnelman i pa kapab *afford* pour li kapab pey *internet*, pour li kapab manivre son bann zafer, *maintenance* e tou sa. So nou bezwen *be very careful*.

Mwan Mr Speaker, mon annan propozisyon pour en *scheme*, ki mon pour anmenn devan Lasanble tre byento atraver en Mosyon, ki dan mon pwennvi Mr Speaker i pour benefisye lafanmir - lafanmir Seselwa bokou plis personnelman, benefisye Bidze lafanmir personnelman si nou kapab enplimant sa *scheme* ki pour mwan i a fer en lavantaz.

E mwan mon krwar sa size sekirite, sirtou sekirite i dan landrwa piblik, i devret reste responsabilite Gouvernman, e Gouvernman i bezwen kapab - Leta i bezwen kapab asir sekirite sitwayen.

Sa ki anvi met son bann *security devices* dan son propriyete personel, mwan mon dir zot si zot kapab *afford*, si zot anvi, zot kapab *afford, by all means* fer sa ki zot santi zot kapab *afford*, protez zot

propriyete personnel. Me kot i konsern bann landrwa piblik sa i reste ankor parey mon'n dir, responsabilite Leta.

E Mr Speaker, i anmenn mwan lo mon lot - lo mon lot pwen e la mon le anmenn sa eleman "*big brother*", parey bokou i - parey bokou i term li sa eleman kot Leta or en *higher authority* pe get lo ou. Ok i en konsern sa Mr Speaker!

Ozordi Lerop, Lanmerik bokou pei Lazi, *La Chine* dayer zot annan zot bann - sirtou dan bann lavil partou, bann *extensive coverage of cameras of-* sirtou bann *camera* vreman, vreman sofistike, kot zot kapab vwar bokou. E bokou sitwayen dan sa bann pei, in annan bokou konsern kot bann sitwayen i vwar zot dan bann sityasyon, kot tou zot mouvman i ganny *monitor*.

Ozordi i annan *camera* ki kapab *pick up* mon *facial*, mon bann soz lafas, zot kapab vwar bann diferan pwen lo mon figir i kapab idantifye mwan *anywhere* dan en lafoul kot mon ete. E sa i serye Mr Speaker!

E bokou sitwayen dan bann bokou bann pei, in eksprim zot konsern lo lefe ki Leta Gouvernman i sirvey zot partou, i kapab sirvey ou, i kapab fer nenport kwa e i

*border* lo zot laliberte personnel.

So nou bezwen veye ozordi ler nou pe koz lo met *camera* sirveyans partou. Mr Speaker, si mon kapab ganny enn pti pe - akoz mon osi mon annan en *line of thought* mwan. Mon annan serten keksoz ki mon'n mete, bann *line of thought*. Letan en dimoun, en dimoun i koze laba lot kote i *disturb* mwan e i kas mon *line of thought* Mr Speaker.

Si nou kapab ganny serten lord, sirtou avek serten group dimoun laba deryer. Mersi bokou Mr Speaker.

So nou bezwen veye Mr Speaker e Onorab Aglae in entrodwir en eleman ki nou bezwen osi koz lo la e pa bliye. Ozordi teknoloji, i *such* ki dimoun i kapab met ou dan en landrwa kot ou pa ti ete.

Ozordi nou pe koz lo *AI technology*, dimoun i kapab pran ou figir, atraver *AI technology* pran ou figir, pran lavwa, fer ou, fer nenport ki nou la koze, fer nou aparet en landrwa kot nou pa neserman ete.

E i riske enpakte ozordi Mr Speaker e dan le fitir lo ankor parey mon'n dir, lo *privacy* nou sitwayen. Wi sitwayen i annan serten *privacy* ki nou bezwen respekete.



E nou bezwen kapab konpran, poudir i annan serten landrwa menm si mon'n pase, mon pa neserman petet anvi vwar dimoun, Leta konnen kot mon'n pase. Mon pe pase dan semen mon pe fer mon pe *go about* mon *daily business*. Mon pa neserman anvi ki Leta ou *whoever or* endividi i nobou kapab sivre mwan kot mon pe ale. So tousala Mr Speaker nou bezwen be *very careful*.

Sa bann lenformasyon Mr Speaker ki ganny anmase, par egzanzp dan bann *cameras* partou ki ganny rikorde, bann lenformasyon in ganny dir ki *cameras* i kapab rikord lavwa ozordi, sa bann soz sekirite i kapab rikord lavwa. Kote i ale? Avek ki i *belong*?

Si demen bomaten mwan mon'n deside met en *camera* ki mon reste o bor semen ki anmas tou transpor, tou isi tou laba. Ki sa - avek ki sa data i *belong*? Eski i pour mwan, pour Leta eski mon kapab fer sa ki mon anvi avek?

Eski mon kapab pran *AI technology* pran desin Mr Speaker, fer krwar Mr Speaker ti pe al tel landrwa sa ler Mr Speaker ti pe zis al se li? Ou konpran mwan Mr Speaker? So nou bezwen – *we have to be very careful* avek sa bann zafer

sirtou ler i konsern keksoz personnel dimoun.

E la Mr Speaker i anmenn mwan lo mon dernyen pwen ki mon ti a kontan adrese, ler mon'n koz lo tousala, si nou pe dir sa i en keksoz ki nou devret anmennen e ki Gouvernman i santi, *or* piblik i santi ki poudir sa i en keksoz ki nou bezwen fer li demokratiz li dan en sans dan nou sosyete, Mr Speaker nou bezwen annan en bon lankadreman legal.

Zisteman pour nou *avoid* tou sa bann zafer ki mon'n dir boner, bokou sa bann zafer ki mon'n dir boner. Nou bezwen annan nou en proper lankadreman legal, ki kapab diriz tou sa bann *issues* ki kapab leve ek sa lentrodiksyon bann *security cameras* partou.

Nou bezwen kapab annan en lankadreman legal ki *deal* avek bann lenformasyon ki anmase, *privacy* dimoun, *right to liberty, to movement* dimoun. Nou bezwen kapab osi *deal* avek bann keksoz ki dimoun i kapab fer manipilasyon, ki dimoun i kapab fer avek sa bann lenformasyon.

So tousala i enportan Mr Speaker, ler nou pe konsider bann pwen ki'n mete dan sa Mosyon e tou bann pwen ki'n ganny leve par bann Manm Onorab ki'n koze avan mwan.

So i en Mosyon ki pour mwan i pe al dan en direksyon ki bokou dimoun petet i koz lo la, me i en direksyon ki vremen, vremen sansib e ki nou bezwen *very, very careful* avan ki nou, nou larg sa dan domenn piblik; avek piblik.

E nou dir ale tou dimoun fer sa, nou pour donn ou en rediksyon lo lakantite ki en *camera*, en sistenm sekirite i koute, ale mete, fer sa, vin lapolis ou menm e lapolis li menm li i pa neserman al fer sa travay ki li i sipoze pe fer.

So avek sa Mr Speaker mon ava aret la e mon a donn loportinite lezot Manm pour osi pour fer serten kontribisyon. Mersi.

### **MR DEPUTY SPEAKER**

Mersi Onorab pour ou entervansyon ki'n anmenn nou zis 3er edmi. Donk in ler pour nou pran *break* ziska 4er, ler nou a retournen pour kontinyasyon deba. 4er nou zwenn.

**(BREAK)**

### **MR DEPUTY SPEAKER**

*Welcome back* tou dimoun. Nou pou kontinyen avek deba, lo Mosyon prezante par Manm Elekte pou distrik Baie Lazare,

Onorab Francois Adelaide. E mon ava zis relir Mosyon pou bann dimoun kekfwa ki fekwenn nou.

Mosyon pe demande ki; Pou asire ki Sesel i kontinyen mentenir en bon nivo sekirite, Lasanble Nasyonal i ankouraz plis sitwayen pou investir dan lenstalasyon bann *surveyance cameras* en pe partou kot i neser pou asire, asir plis sekirite dan nou bann kominote. Sa i Mosyon.

Prosen entervenans ki'n endik son lentansyon pou partisipe se Onorab Sathya Naidu.

### **HON SATHYA NAIDU**

Bonn apre midi Mr Speaker. Bonn apre midi tou koleg Onorab e tou dimoun ki a lekout. An relasyon avek Mosyon ki'n ganny anmenn par Onorab Adelaide, mon pou donn tou mon sipor. Akoz i kler ki malgre nou dan Gouvernman, i annan serten demann ki nou bezwen fer pou kapab adres bann defayans ki egziste dan sosyete.

E enn bann defi ki plizyer zofisyè lapolis in met a mon latansyon se mankman resours imen. Malgre ki nou annan en pti popilasyon i egziste koman en defi, prenon kont diferan

kalite aktivite kriminalite ki in annan konmela.

E alors i annan en difikilte ler i konsern sa prosesis an relasyon avek idantifikasyon, ler en krim in ganny komet. E ouswa se sa ki fer dimoun parfwa i pa menm raport krim avek lapolis. Akoz baze lo bann leksperyans oparavan, ki zot koman en endividi in kapab pas ladan zot pa'n deside met konfyans dan sa prosesis.

E alors ler i konsern *camera* koman en zouti, i kapab donn koudmen lapolis. E byensir endividi zot menm, i en pa de lavan. Byensir i annan en kou ki atase avek, i annan en eleman bidzeter ki sak dimoun, sak *household* pou bezwen pran ka avek.

E se la kot sa sizesyon pou kapab vin avek en *scheme*, i kapab donn sa bann dimoun ki annan sa lentere ki annan lemwayen, ki pare pou pran sa desizyon en opsyon ki zot, zot pou kapab konsidere.

Me selman nou pa pou kapab zistifye konportman en endividi ki kondwir dan en fason kot i a pe komet en krim, baze lo lapovrete. Sa i en pwen ki Onorab lo lot kote ki'n koz avan mwan, in fer resorti. Nou pa pou kapab servi sityasyon dimoun pou zistifye en kondwit kriminel.

Ler nou pe fer referans avek en sirkonstans en endividi, eski sa Onorab in pran sa 10poursan ki lo drog? Sa menm 10poursan ki servi zot adiksyon malerezman, zot en viktim. E zot annan en tandans pou kondwir bann akt kriminel.

Sa 10poursan, kan eski nou'n ganny sa 10poursan? Oktob 2020? Ouswa avan? Akoz in annan mankman lavolonte lo lapar sistenm ki'n la oparavan, pou kapab *deal* avek sa size. E ozordi mon le felisit tou ban zofisye dan lapolis. E tou bann diferan lotorite ki relye avek sa responsabilite, ouswa sa rol ki zot annan dan nou pei pou kapab gard lape avek sekirite.

Mon dir zot felisitasyon pou sa travay ki zot pe fer, dimoun i satisfes avek bann mezir ki pe ganny pran pou anmenn en lalit kont drog. E mon santi ki lo nivo Gouvernman, apart zis met en lobligasyon lo sitwayen, lo nivo Gouvernman i bezwen annan en *mapping exercise*, kot nou pou kapab etabli ki bann landrwa stratezik ki Gouvernman an partenarya avek Sekter Prive kot i posib, i kapab fer bann lenvestisman neserer, espesyalman dan bann *dark spot*. Parey in ganny fer resorti pli boner.

Bann *dark spot* tou dimoun i konnen, ki ler sa bann lensidan i arive. Ki kalite tranzaksyon ki pran plas? Me pou kapab prouv bann tranzaksyon, pou kapab etabli bann fe. E pou kapab prosekit sa bann dimoun i vin en pe difisil.

E se la kot bann plasman bann *cameras* dan bann landrwa stratezik pa partou kote, me selman dan bann landrwa stratezik ki pou kapab ede.

E dan ka St Louis, avan sant kominoter distrik, St Louis ti pe ganny itilize koman en landrwa pou vann drog lo en baz regilye, me atraver zefor ki Gouvernman Lokal in mete, apre enstalasyon, nou pe nepli war bann kondwit kriminel.

E alors i klerman montre ki enstalasyon bann *camera*, i kapab zwe bann rol pozitiv pou kapab garanti ki nou viv dan en sosyete, kot i annan sa eleman sekirite an plas. Pou kapab fer sir ki dimoun i kapab mars libreman dan tout konfidans, pou dir ki pou napa okenn keksoz grav ki pou ariv kont zot.

E i enportan pou nou kapab osi rekonnèt ki dan bann *housing estate*, ler Minis ti'n vin reponn lo en kestyon relye avek bann aktivite anti-sosyal, i ti

annan en lalis an term ka ki zot pe *deal* avek.

Me si nou kapab idantifye bann *estate*, ouswa bann nouvo *estate* ki pe ganny konstrir nou met bann eleman relye avek sekirite. E nou *factor in* sa *cost* pou ki sa dimoun ler i pe pey son lakaz, i non selman pe pey pou son lakaz, i osi pe pey en *maintenance fee*.

E si nou oule apel li en *security fee* nou mete, pou kapab fer sir ki i annan *maintenance*. E nou, nou bezwen konsidere dan bann nouvo *housing estate* ki pe vini, pou fer bann provizyon pou fer sir ki nou pe zwenn demann dan lannen 2023.

E sa i bann propozisyon ki nou bezwen konsidere, menm pou zofisye Lapolis. Mon apresye pou dir ki tou bann zofisye, ansanm ek tou bann zofisye dan larme ki pe fer bann travay relye dan sa lalit kont drog zot annan *bodycams*.

E alors i enportan ki menm bann zofisye ordiner, i annan sa bann lekipman pou zot kapab delivre byen sa servis. E an relasyon avek menm bann *speed cameras*, nou bezwen regarde si sa i posib.

Konbyen fwa nou'n war sa bann aksidan ki nou war lo en baz repetitif menm landrwa, i

annan aksidan ki arive. So, ler nou annan camera byensir i pou ede dan sa prosesis.

Lo kote lapolis ler i konsern *digital extraction*, baze lo lenformasyon ki mon annan nou napa gran kantite dimoun zis enn ki vreman spesyalize dan sa domenn. Alors lo kote lapolis i annan ankor travay ki nou, nou bezwen fer pou met bann striktir an plas.

E i sagrinan poudir sa, me se sa ki nou, nou'n erite e nou bezwen travay pou kapab amelyor kot nou bezwen fer lesansyel.

E an relasyon avek bann *hot spots*, wi lapolis i annan zofisyé ki'n dir nou napa ase mendev. Me i pa anpes zot *at least* met 1 ou 2 dimoun pou kapab kouver en *radius* ou paramet ki fe en diferans dan lakominote.

E baze lo sa ki mon'n tande lo teren, lo kote Harrison ek Lodge Street dimoun in apresye ler zot in war en 20tenn gard pe fer patrol. Zot in satisfé en sel kou poudir zot prezans in zwe en gran rol, pou kapab elimin sa problem ki devan nou. E alors ler nou konnen i annan bann *hot spots*.

E nou konnen ki patrol i anmenn serten benefis i enportan pou zis fer li lo en baz 1 mwan 1 fwa. Me fer li lo en baz

pli regilye, sela kot ou kapab vreman *attend* sa rezilta ki nou, nou osi nou pe rode.

E an relasyon avek bann *footage* ki ganny *extract* osi, parfwa dimoun i dir sa prosesis lo kote prosekisyon i pran tro bokou letan. Ouswa menm sa dimoun ki'n komet sa lofans, i vin en *repeated offender*. Me pou bann dimoun ki komet bann lofans la, tel ki vol koko en *so on and so forth*. Kot zot menm zot avoue poudir mon'n al 2 fwa, 3enm pa en problem.

Nou bezwen fer en analiz pou regarde ki mannyer nou pou *deal* avek zot. Si sa bann endividi in vol bann fri *so on, and so forth*, nou a fer sir ki i pran fri partou kote, apre atraver prizon si fodre vann kot bazar i a vann, pou kapab pey sa dimoun. Sa i bann santiman ki parfwa i eksprimen.

E an relasyon avek *cameras*, konmela nou annan osi bann *cameras* parey Onorab Aglae in fer resorti ki kapab rikord son. Me ankor enn fwa ler nou pe koz lo son, polisyon tapaz, sa osi i vin koman en konsern. Kekfwa i pou ede.

Konmela i annan bann *cameras* avek menm bann, bann *features* ki kapab rikord bann *noise decibels*. Sa osi pou ede dan bann serten landrwa,

kot dimoun lo en baz kontinyel, i met devan sa konsern kot zot santi i annan en nwizans dan lakominote.

Alors i kler ki i annan en neseseite, pou nou kapab demann nou bann dimoun pou pran en pe responsabilite. An menm tan i annan neseseite pou bann lotorite konsernen pou fer zot bout. E byensir i pa demen ki nou pou war *cameras* partou kote. Me selman lo en baz anyel lo kote preparasyon Bidze, i enportan ki nou pran en konsiderasyon serye.

E ler *ACP Denousse* ti'n vin devan dan Lasanble pou fer resorti lakantite *camera* ki pa pe marse. Sa osi i en size ki nou, nou pou bezwen adrese. Me selman desizyon pou kapab enstal bann *cameras* par bann dimoun i pou ed Gouvernman dizour dan sa proses, pou kapab promouvwar plis lape, sekirite pou byennet nou zanfan. Mersi Mr Speaker.

**(APPLAUSE)**

**MR DEPUTY SPEAKER**

Mersi Onorab. Aprezan mon pou apel Onorab Audrey Vidot.

**HON AUDREY VIDOT**

Mersi Mr Speaker. Bonn apre midi Mr Speaker, tou Manm Onorab, tou bann zabitan

Roche Caiman. E tou manm piblik ki a lekout.

Mr Speaker, premyerman lo sa Mosyon mon pou tous 2 pwen spesifik. Premye mon pou elabor lo pou asire ki Sesel i kontinyen mentenir en bon nivo sekirite, ki Mosyon i fer resorti dan komansman.

Premyerman pou nou gard e bezwen regard, pou nou kapab byen regard dan nou nivo sekirite Sesel. I enportan ki nou bezwen get leta nou pep.

Ozordi ler nou fer letour dan bann distrik, si ou pou koz avek dimoun, ki zot santi ki mannyer zot vwar lavi ozordi? Ki zot kontribisyon? Premye keksoz zot dir ou, pli gro problemm lavi i ser.

Lavi i ser e li sa travayer, mon pe koz sa travayer Seselwa ki li i leve toulezour i al debourye i vwar li pe ganny li difikilte pou li vwar li fer 2 bout zwenn.

Sa paran i dir ek ou, ki ler i resevwar sa saler lafen dimwan i kas, kas li pou li pey son det. E i aste manze pou li ek son fanmir, e i sey vwar ki mannyer i kapab mentenir son lekor, son fanmir e son lakour.

Dimoun i fristre, ler i antre dan en laboutik ki swa oubyen i fer laliny dan en *takeaway* pou li rod en manze, i vwar li pe ganny demande par en lot

endividi ki li pa travay, i pe demann li larzan.

E ler li sa travayer, sa paran i sorti travay en zournen pou li antre kot son lakour, pou antre dan son kominote. I vwar li ankor ki mazorite mon asire ki nou bann Manm Lasanble, nou ganny konplent parmi nou bann dimoun ki bezwen pas otour en group dimoun ki depi li bomaten i la li. In stasyonnen la, ki son louvraz? Ou pa konnen.

Ki mannyer i fer son reveni? Me a lafen dizour sa dimoun letan i rantre, i vwar i obzerv tou sa bann aktivite anti-sosyal ki arive dan son kominote. E sa i pa nouvo, aköz Manm in koz lo la depi ki Mosyon in ganny prezante.

Me sa ki tris, se ki ler ou war paran ki li i pe vwar li pe sey met 2 bout zwenn, ki apre i pey son bann depans. I war li bezwen azout ankor keksoz an plis pou li sofgard son zanfan.

Ki swa i war li pe bezwen antre dan en program, pey swa *Intelvision*, swa *Cable & Wireless*, pou li kapab pey en *internet* bann program ki son zanfan i kapab reste dan lakour anndan. Pou li pa war li sey al tonm dan semen pou al angaz li dan bann aktivite anti-sosyal.

E apre ekout tou bann Manm lo sak kote latap, i kler ki

i en realite ki dan nou bann kominote i annan en gro problem sosyal. E krim, nivo kriminalite pe kontinyen ganny ogmante. E i tre konsernen pou nou koman bann dirizan.

I osi kler ki nou Lasanble, baze lo bann konversasyon ki bann Manm in fer ozordi dan deba. I kler ki nou pa satisfè avek lafason ki keksoz pe ganny adrese. Nou santi ki i annan ankor plis ki kapab ganny fer.

E se pou sa rezon ki ou war i annan Manm, i anmenn kestyon. Pou demann Minis pli kwa ki zot pe fer? Aköz i annan serten sistenm pa pe marse? E anmenn Mosyon, parey nou vwar ozordi atraver Onorab Adelaide in ganny anmennen. E se lo sa pwen, sa bann pwen ki mon'n fer resorti, ki mon pou siport mon koleg Onorab Cosgrow.

Akoz si nou anvi war keksoz i mars byen, keksoz i ganny fe pli byen. Nou anvi war to kriminalite desann dan nou pei, i bezwen annan plis zefor pou nou vwar dan byennet nou pep. Elimin okenn lapovrete eleman, kot i abes sa lavi sosyal nou pep, i bezwen ganny eliminen.

Si i annan striktir ki an plas, nou bezwen vwar ki mannyer striktir pa pe marse pou amelyor li, pou ki nou pep

pa vwar li dan difikilte. Mon tous lo sa pwen Mr Speaker, akoz i pou anmenn mwan lo mon dezyenm pwen lo sa Mosyon.

Kot pe demande pou nou ankouraz sitwayen, pou li investir dan letablisman bann sirveyans bann *camera*. Ki pou petet ede asir sekirite dan kominote, e pou zot prop lekor. Ou bezwen tous 2 kategori group dimoun, ler ou pe ankouraze. 1, sa ki annan ki santi i kapab siport Leta, pou li kapab ranforsi sistenm sirveyans dan bann kominote.

Pou ede vwar ki mannyer kapab vwar bann aktivite anti-sosyal ki ganny arive, oubyen bann krim pou ki i ganny adrese. E osi, i annan manm kot in koz lo bann endividi ki li i pou enstal bann sistenm *camera* kot zot lakour.

Nou pou dakor baze lo bann diskisyon deba ki'n ganny deroule depi ler Mosyon in ganny prezante, poudir ki Seselwa i ankor konsernen kot i konsern son lavi prive, e byensir son sekirite.

E sistenm sirveyans *camera*, i kler poudir i pa solisyon tou sa bann keksoz ki nou ti a voudre war amelyore. Akoz mon dir sa?

I annan konsern ki'n ganny souleve kot *camera* ki

ganny mete kot lakour, bokou fwa nou'n vwar kot i annan dimoun ki'n filmen in vwar lekel ki'n vin vole kot li. Ki swa i dan *mask*, ki swa i pa dan *mask*. I *provide* lenformasyon avek lotorite konsernen. Oubyen ou vwar i annan dimoun ki met lo medya sosyal, i komans sirkile pe rode lekel sa dimoun.

Me apre ler sa dimoun i ganny enformen, sa dimoun ki'n vole in ganny anmase, in ganny large e pe kontinyen vole ankor kot lezot lakour. I annan menm kot nou'n vwar kot sivilyen, sitwayen ki'n ariv son limit ki in menm perdi konfyans dan nou lafors. Ki war serten zot komans pran aksyon dan zot lanmen. Ki san realize osi, zot pe met zot lekor a ris e zot osi pe kas Lalwa.

Sa i montre nivo konsern ki parfwa menm si i annan nou, ler nou demann kestyon, dan moman ler nou koz lo bann Mosyon lo bann size parey nou pale fran. Letan nou annan lotorite ki la devan nou, pou nou kapab fer kestyonnen, zistifye pou vwar ki mannyer nou kapab ede kontribye anmenn laklerte, rod lenformasyon, i annan serten nou reste trankil.

Me letan in ariv ler pou lezot deba, zot lib pou koze. I mank senserite. E i enportan ki



dimoun osi letan nou pe dir ek zot envestir zot finansman, dan en sistenm, ki nou pe dir zot i bon pou zot. I pou dan zot prop benefis, zot osi zot pe donn en koudmen pou zot anmenn sekirite lo pei.

Me nou konn tre byen poudir parfwa letan nou vin avek bann propozisyon parey, me nou mank en kantite lenformasyon pou nou edik diferan nou kous nou sosyete nou bann dimoun, poudir ki risk osi i vin avek, ler nou enstal bann tel lekipman parey.

I annan ki servi li byen, me i malere ki pa tou ki fer li. E i annan menm ki met zot lekor menm a ris. I annan koleg Onorab ki'n fer resorti. Ozordi avek teknolozi ek bann menm lo kote gouvannans bann partenarya ki annan, bann pei. Nou Sesel nou en pti pei ki vilnerab.

Vilnerab dan le sans ki parfwa si nou pa port atansyon, nou ganny servi pou bann lezot azanda ki kapab annan en lenpak lo nou, espesyalman kot i konsern sirveyans *camera* partou dan pei.

Nou, nou pa pe kont pou lager kont bann aktivite anti-sosyal nou. Me nou pa oule osi ki demen, okenn sirveyans *camera* ki ganny mete ki *breach* drwa sa sitwayen ki li i annan

son lavi prive. Ki demen i vwar li pe ganny servi bann zimaz oubyen son lavwa in ganny *distort* pou li kapab ganny servi kont li demen pou en keksoz ki li i pa'n annan lentansyon pou fer.

Zis parfwa nou koman imen en senp konversasyon, nou mal enterpret keksoz. Nou zis sot ladan, nou pa realize poudir wi zis parey en lensidan taler. Ler en konversasyon pa'n aplik pou en dimoun i zis antre ladan apre ou war li i vini pou li angaz li, kot i konfront avek en lot.

Ankor, i montre ou poudir si nou pa annan ledikasyon avek nou dimoun, pou eksplik zot ris ki annan la deor, an term bann demann ki nou demann zot pou bann sistenm ki nou demann zot pou enstale kot zot lakour, i enportan ki nou annan sa ledikasyon.

E nou pe osi edik sa dimoun, nou bezwen osi edik sa dimoun poudir be regarde, ou pou annan en sistenm sirveyans *camera* kot ou, i annan osi en kou ki vin avek. E si sa dimoun i kapab *afford*, sa i li son pos i kapab. Me lamazorite nou bann dimoun ozordi ki ti ava voudre annan mete, me son mwayen pa pe permet li. Akoz nou konn tre byen i annan bokou ki pou

bezwen sistenm *Wi-Fi*, *internet*. Pou li asire ki pe enport kot i ale, omwen si i annan en alert ki kapab ganny leve atraver lo son telefonn, lo son *iPad* i kapab averti li poudir i annan kek keksoz ki abnormal pe arive kot li atraver sistenm sirveyans. E i annan en kou ki vin avek.

So, parey mon'n dir sa Mosyon i kapab annan serten pozitivite an term son merit. Me i ankor annan serten konsern. E mwan baze lo bann rezerv, mon a ekout loter Mosyon ki manner i ava *sum up* son konklizyon lo son Mosyon avan ler mon pran en desizyon lo kwa ki i pou pran lo son Mosyon.

Me i enportan ki nou bezwen balans byen pou asire ki ler nou pe edik nou bann dimoun pou angaze dan en sistenm, pou li enstal en sistenm kot li i bezwen fer li byen. E i bezwen osi edik son lekor ris ki vin avek.

Me osi bann endividi ki kapab *afford* pou donn en koudmen, pou met dan bann landrwa piblik ki nou konnen i pou Leta. Leta li i ava rod son fason ki manner i annan son kontrol lo la.

Me byensir tou a respekte en dwa enn i fini, enn i komanse e kot lot i fini nou fer sir nou respe kanmarad, e ki keksoz i mars byen. So, vwala mon 2

kontribisyon ki mon anvi fer lo sa Mosyon Mr Speaker. Mersi.

**(APPLAUSE)**

**MR DEPUTY SPEAKER**

Mersi Onorab. Lot Manm ki'n lev lanmen apre Onorab Vidot, Onorab Woodcock.

**HON WAVEL WOODCOCK**

Mersi Mr Speaker. Bonn apre midi tou zabitan Grand Anse Praslin, tou Seselwa, tou Manm e tou dimoun a lekout. Mr Speaker, i annan en gran diferans ant Lopozisyon dan 6enm Lasanble avek Lopozisyon ozordi dan 7enm Lasanble. Ler nou, nou ti dan Lopozisyon Mr Speaker nou ti toultan vin avek bann solisyon, avek bann sizesyon pou ed nou pei progresse.

**(APPLAUSE)**

**HON WAVEL WOODCOCK**

E ler nou dan Gouvernman Mr Speaker nou pa fer parey *US*, ki ler zot ti dan Gouvernman Mr Speaker zot ti per pou koz lo bann defi, lo bann *challenge* ki nou pei pe fer fas avek. Me nou Mr Speaker, o kontrer bann Manm lo sa kote latab ki dan Gouvernman, nou pare pou nou koz lo bann defi, bann

*challenge* ki nou pei pe fer fas avek.

Nou pa per pou nou koz lo bann difikilte, sirtou bann *challenges* ki nou Gouvernman ozordi in erite. Mr Speaker, nou Gouvernman pe rod solisyon, pe rod solisyon pou konbat kont kriminalite dan nou pei ki dayer pa fek komanse ozordi. I annan selman 2an edmi ki nou dan Gouvernman. E nou'n idantifye poudir sa i en problem ki nou bezwen adrese.

E nou Lasanble ozordi nou anvi ed nou Gouvernman pou rod solisyon lo ki mannyer nou pou rezourd e *deal* avek *issue* kriminalite dan nou pei.

Nou Gouvernman pe fer bokou zefor pou met lord dan bann dezord ki'n arive dan lepase, sirtou anba *watch United Seychelles* Mr Speaker. Mosyon ozordi nou pe sirtou koz lo bann vol ki arive dan nou kominote sirtou lo nivo *grassroot*. Me nou tou nou konnen poudir ki dan lepase, in annan bann vol milyon ki'n arive. I annan bann vol lo pli gran lanpler ki'n arive. Me ozordi topik nou pe sirtou *deal* avek bann vol dan nou kominote dan nou distrik.

Mr Speaker, i annan *the elephant in the room* ki petet nou pa pe adrese ozordi ki tou Seselwa i konnen deor, enkli

Lopozisyon. Se ki enn bann *making* lakoz mazer problem kriminalite sirtou vol bann *break-ins*, bann pti vol lo laferm partou dan nou distrik dan bann letablisman touristik, parey i annan dan mon distrik Grans Anse Praslin. Menm lakoz kriminalite sirtou vol dan nou pei se akoz en fleo, ki'n anvair dan nou pei ki Onorab Sathya in koz lo la.

Nou pli gro problem Sesel Mr Speaker se sa fleo drog. Ki malerezman bokou nou bann zenn, in ozordi tonm adikt anba sa sibstans in ogmante. I pa en keksoz parey mon dir ki ozordi i fek arive dan nou pei, me en keksoz ki'n progresif *over the years* in annan sa akimilasyon. Bokou nou bann frer ek ser ki malerezman in tonm anba sa fleo, bann drog bann *hard drugs* parey *heroin*, ozordi *cocaine* Mr Speaker.

Sa i *main* lakoz Mr Speaker, akoz nou pei pe fer fas avek bokou sa bann kriminalite. E trafik drog i relye avek lezot form kriminalite, relye avek trafik zarm. I relye avek trafik imen parey nou'n war Mr Speaker.

Me ozordi Mr Speaker, nou'n war bokou bann lasezi drog ki zanmen in arive lo sa lanpler ki pe arive ozordi kot

nou war sa kantite lasezi drog, lasezi zarm Mr Speaker.

Yer nou fek ekoute, nou fek tande dan nouvel ki kantite zarm ki ti ganny trouve dan lakour en endividi ki ti afileye avek *United Seychelles* dan lepase.

E si sa bann zarm Mr Speaker ti'n ariv dan piblik, dan lanmen bann vwayou bann vagabon. Zis mazine kantite, ki manner i ti pou *threaten* sekirite nou pei ozordi, mon dir mersi mon Gouvernman pou anpes sa bann zarm ariv dan piblik.

**(APPLAUSE)**

### **HON WAVEL WOODCOCK**

Kantite bato pe ganny sezi avek zarm dan nou pei ozordi. Kantite lasezi drog pe ariv lo *airport*. Nou war sa lanpler ozordi Mr Speaker. bann dav ki pe ganny sezi avek zarm lo la. E nou *Coast Guard* nou kapab sov nou bann frer, nou frer ki ti pe ganny trafike Mr Speaker.

E nou'n war malerezman ki olye siport Gouvernman nou'n war en bann in vin defann eskobar dan nou Lasanble Nasyonal.

Mr Speaker, *Compol* fek vin reponn en kestyon lo kriminalite dan nou pei devan sa Lasanble Nasyonal. E in dir

in fer en *statement* poudir anefe kriminalite an 2023, 2022 i pli ba ki bann lannen avan. Savedir Mr Speaker i annan en progresyon, *statement* ti ganny fer dan sa Lasanble.

E ozordi Mr Speaker, napa zistifikasyon pou krim. I annan en bann - en Onorab ki'n koze i ti Minis avan in i dir "dimoun ozordi pe vole, aköz zot mizer" Mr Speaker. Mr Speaker, eski zot ti mizer ler zot ti vol pei?

**(APPLAUSE)**

### **HON WAVEL WOODCOCK**

Eski zot ti mizer ler zot ti vol R50milyon dolar Mr Speaker? Napa okenn zistifikasyon pou vol ouswa krim. Nou annan *safety net* ozordi Mr Speaker, nou annan Lazans Proteksyon Sosyal. I annan plis louvraz ki zabitan, ki nou bezwen anploy *over* 19mil etranze pou vin travay dan nou pei ozordi.

Dan nou zanfan ozordi nou Gouvernman in fer provizyon pou donn goute bann zanfan pou zot kapab vin lekol, si zot paran napa mwayen pou pey goute pou zot ek dezennen osi.

E menm nou fek annan en meeting semenn pase avek *Seychelles Bureau of Statistic*, kot in dir kot *census* ki'n ganny

fer nasyonan. Ki zot in in dir Mr Speaker? Zot ti fer resorti poudir selman 20poursan Seselwa ki zot santi ki zot pov. Konpare avek sa 40poursan anba Gouvernman presedan.

Savedir Mr Speaker, in annan en progresyon. E i annan bokou zot ozordi zot en pe enkyet zafer *surveillance camera*, ki i pou en *deterrent* pou anpes bann dimoun fer krim. Pou anpes bann dimoun antre dan lakaz vole.

Me Mr Speaker, zot pe koz lo *privacy* ozordi poudir *selfless camera* pou anfe pou vyol zot *privacy*. Me selman Mr Speaker fodre nou pa zanmen bliy bann letan dan nou listwar, kot zot ti anvoy dimoun pou vey dimoun! Kot milisya i vey dimoun, zot ti fer vwazen *spy* lo vwazen Mr Speaker!

Pa ti bezwen *CCTV camera* sa letan, dimoun ki ti *CCTV camera* Mr Speaker. La ozordi Mr Speaker, zot per *CCTV camera*. Akoz zot per zot prop lonbraz Mr Speaker.

Selman ekout zot oponan dan lefase zot ti fer. *Spy* lo zot oponan ki ti rezilta lanmor enn nou frer Gerard Hoareau.

Mr Speaker, i bezwen annan en partenarya krentiv ant sitwayen, bann biznes avek Gouvernman. Nou pa kapab fer

sa travay lo nou tousel. Wi, Gouvernman i annan en responsabilite, i annan en rol pou li zwe. Me nou ki nou Lasanble pe demande se ki nou bezwen antre dan en partenarya avek bann biznes. Avek sitwayen pou nou ede annan sa sirveyans dan nou distrik, dan nou vwazinaz, dan nou kominote Mr Speaker, pou anpese ki sa bann krim i kontinyen.

E mwan Mr Speaker, mon an faver *camera* sirveyans; sirtou dan bann landrwa kot i annan bokou trafik. Parey mon pe dir bann *high density area*, bann landrwa biznes, bann *subdistrict* parey nou annan dan sa ki nou apel nou ban pti lavil, bann sant komersyal kot i annan bokou bann biro Gouvernman.

La mon pe mazin bann landrwa parey Grand Anse santral dan mon distrik kot mon sorti. Cote D'Or pou al semen pou al anviron Berjaya Praslin, Beau Vallon Santral kot i annan bokou bann laboutik biznes. Anse Royale osi ozordi ki parey i pe vin en pti lavil, i annan bokou biznes bokou bann lofis Gouvernman.

Providence i en landrwa komersyal Mr Speaker. E lezot landrwa Mr Speaker ki annan bokou bann restoran,

*takeaways*, labank, *ATM Machine* e bann servis biro Gouvernman. Sa bann landrwa i neselit Mr Speaker annan plis *camera* sirveyans.

E mwan mon krwar met *camera* dan plizyer sa bann landrwa i en keksoz ki pou ed nou Mr Speaker. E osi bann landrwa kot i ganny frekante par bokou etranze ek touris Mr Speaker, pou nou sofgard zot bann keksoz, zot byen e osi zot lavi.

Bokou sitwayen, biznes ozordi i annan serten defi Mr Speaker. Zisteman pa bokou letan Praslin fek ariv en lensidan dan mon distrik. Kot ti annan, bann voler ti kas dan *Cable Kiosk*, ti annan vol me malerezman sa bann dimoun ti dan *mask*. E semenn pase ankor, nou'n annan detrwa vol, kot 3 landrwa 2 laboutik Grand Anse avek 1 laboutik Sen Zozef.

E zot tou zot ti annan *camera* Mr Speaker. E sa bann voler ti dan *mask* ti pe kasyet zot figir. Me annou zis mazine si ti annan lezot *camera*, dan Grand Anse, kot *bus stop* dan zalantour nou ti pou kapab swiv sa bann *perpetrators*. Akoz ki zot fer Mr Speaker? Zot met zot *mask* dan kasyet sirtou ler zot al antre dan sa bann landrwa pou vole.

Zot pa pou met *mask* pou mars dan semen piblik zot, zot met *mask* ler zot ariv dan sa landrwa. Akoz dan piblik lo semen dimoun pou war zot. Me si ti annan *camera* dan bann landrwa dan bann diferan landrwa, kot ou kapab swiv. Swiv sa *perpetrators* ler i pe pase, ou pou pli kapab *track* li, si i annan plis *camera*, plis *monitoring*. E i ava ede kapte idantite sa voler e osi lezot krim.

Mr Speaker, mon'n annan en lensidan vandalizm pa tro bokou letan pase, ki o bor sant kominoter. Annefe zot in pas kot Ladministrasyon Distrik, e dife ti ganny mete kot en biznes. E sa dimoun parey mon'n dir ou, in pas kot sant. Me zis mazine si ti annan *camera* kot Ladministrasyon Distrik, e si ti annan *camera* kot *Petrol Station*.

E si ti annan *camera* kot biro byento nouvo biro *SNYC* Grand Anse, ti kapab ede idantifye sa voler, *apprehend* sa voler. Konnen lekel sa dimoun ki'n, *well*, sa dimoun ki fer sa *act of vandalism*, si avan ler i ariv kot sa landrwa la prezan ki i pe met son *mask*.

Nou ti pou kapab *track* li, e idantifye li avan ler ki i met sa *mask* lo son figir si petet nou ti annan plis *camera* sirveyans

dan lezot landrwa parey mon'n mansyonnen.

Mon dakor ki nou merit ankouraz bann biznes, enstal *camera* kot zot biznes. Me osi parey lezot Manm in dir, e i annan en Manm lo lot kote latab in koz lo la.

In dir pou dir Gouvernman osi i merit fer en bout. I kapab an partenarya avek bann biznes. I kapab met 1 ou 2 *camera*, plizyer *camera* i osi ede enstale li osi. E parey sizesyon in ganny fer petet sa bann *camera* i merit konnekte, sirtou bann ki Gouvernman i mete, *I don't know* petet an partenarya avek sa bann biznes en fason pou konekte sa bann *camera* avek en *centralized systems*.

Petet kot stasyon lapolis kot i kapab *monitor*, me selman *obviously* zot *busy*, zot pou napa sa letan. Me selman nou toultan konnen poudir *still* ler en krim, en vol i arive la ki ou ale ou *rewind* e ou al get lo sa bann *camera* ki ou war lekel ki'n fer sa bann aksyon sa bann akt kriminel.

E en lot propozisyon ki si mon pa tronpe dan en Manm osi in mansyonn sa, se en konsesyon *tax* lo lenportasyon *camera* sirveyans pou fer li pli abordab. Zot in koz lo son pri, son kou.

Petet bann dimoun ki mwen eze pa pou kapab *afford*, me petet Gouvernman i kapab konsider en konsesyon lo *tax* pou bann biznes ouswa bann endividi ki fer antre zot *surveyance camera*, ki ava ed dimoun ki ava fer li vin en pri pli abordab pou nou bann dimoun kapab *afford*. Ouswa bann biznes ki enstal sa, i ava enstal sa bann *camera* en pri bokou pli abordab.

Wi, i annan bokou ki'n konplent lo *privacy*. Me selman parey mon'n dir *camera* normalman, lafason ki i marse se ler bann akt aksyon. *Ok*, ou kapab si ou pe *monitor* ou pou war en dimoun ler i pe fer en aksyon. Me selman bokou fwa se ler en aksyon, ler sa krim in arive ki lapolis i re al get *camera*, i al *rewind* e la i kapab vwar lekel sa dimoun ki'n fer sa aksyon.

E i mars parey dan lamazorite bann pei ler bann ka kriminalite in arive, la ou a retyek *camera*. La ki ou war lekel sa dimoun ki fer sa bann aksyon. Me i *still as a deterrent* pou anpes dimoun fer, aköz i konnen poudir mon kapab ganny *capture* lo *camera*.

E si ou pou get dan lemonn ozordi Mr Speaker, preski tou bann lavil. Preski tou bann *cities* a aletranze i annan

bann *CCTV cameras* ozordi. Si ou pou get Lonm Mr Speaker, *London* koman, koman en legzanp i annan anviron 1milyon *CCTV camera* Lonm. E mon fek pe lir en rapor an 2020, kan popilasyon *Paris* ti 10milyon dimoun. Ti annan 33,479 *cameras, Paris*.

Sa i 3.06 *cameras* par 1000 zabitan. E ozordi, *Dubai* koman nou pe koze la i annan anviron 300mil *camera*. E i enn bann *city* pli *safe* dan lemond. E parey mon'n dir Mr Speaker, *camera* i en *deterrent*. I pou ede Mr Speaker. Mon pa konnen akoz bann Manm lot kote latab zot per *camera* ozordi.

E Mr Speaker, mwan mon annan plizyer zabitan mon distrik ki'n apros mwan ki'n aktyelman fer sa propozisyon. E mwan ozordi mon apresye ki nou annan en Onorab ki'n fran, ki'n pare pou vin devan akoz nou *it's not about* zis fer nou Gouvernman *look good*.

Nou dan Gouvernman ozordi, bann Manm lo nou kote latab la kot i annan bann *issues* dan nou distrik dan nou kominote dan nou pei la. Nou pou adres li *head-on*, e nou pou vin avek bann propozisyon, avek bann solisyon konkret.

Tou sa bann sizesyon nou a debat lo la, nou ava gete ki manner. Si i bon nou pran, si

pa bon nou zet anba parey nou ti zet zot anba eleksyon 2020 Mr Speaker.

Mr Speaker, avek sa 2 mo mwan 100poursan krwar ki sa Mosyon i en Mosyon ki valid, i en Mosyon ki annan merit. E mon santi ki i pou ede dan plis ki en fason pou deter bann dimoun, fer krim dan distrik.

E pou osi ede *capture* bann dimoun osi ki seye pou *attempt* pou fer okenn kalite form krim, vole ouswa nenport lezot form krim. Avek sa 2 mo Mr Speaker, mon pou siport sa Mosyon. Mersi.

**(APPLAUSE)**

### **MR DEPUTY SPEAKER**

Mersi Onorab. Prosen entervenans lo lalis i Onorab Waven William.

### **HON WAVEN WILLIAM**

Mersi Mr Speaker. Mr Speaker, mon pa pou long lo sa Mosyon. Lo komansman mon anvi dir ki mon pou aport mon sipor anver sa Mosyon anmennen par Onorab Adelaide, mon koleg o bor mwan la.

Mr Speaker, letan mon'n ekout Onorab Adelaide, Onorab Adelaide in prezant son Mosyon dan en fason ki i pa'n ganny tante pou politiz prezantasyon son Mosyon.



In vin direk, e Mr Speaker si ou get sa Mosyon dan li menm li, sa Mosyon ki Onorab Adelaide in anmennen koman Manm Elekte pou distrik Baie Lazare, ki i lo son 2enm manda.

Onorab Adelaide koman en Manm Elekte Mr Speaker, i annan dwa parey nenport ki Manm pou anmenn en Mosyon dan Lasanble.

Onorab Adelaide son Mosyon Mr Speaker si nou regard li, i pa bezwen ki Onorab Adelaide, i pe fors dimoun ouswa dir dimoun fodre zot fer sa ki sa Mosyon pe demande. Me pe plizoumwenn ankouraz sitwayen bann ki kapab, bann ki vwar sa nesesite fer li vizavi sityasyon zot prop proteksyon personnel, avek bann akt kriminel ki nenport sitwayen ozordi i ganny menase avek.

Mr Speaker, i annan en ta keksoz ki'n ganny dir ki par lot kote latab ki mon pa pou tous lo la. E pa oublie Mr Speaker, mon'n fer 5 manda lot kote latab. E mon annan en ta zistwar ki mon kapab rakonte. Ki pou kas mon kapab dir bann keksoz ki'n ganny dir ki pe ganny tire an deor konteks.

Mr Speaker, devlopman dan en pei i en proses. E en nenport Gouvernman i annan son fason ki i enplimant son program dan letan, e dan

konteks e sikonstans ki sa parti politik i dan Gouvernman.

E mon ava kapab dir ki konpare ek oparavan serten legzanp ki mon kapab donner Mr Speaker, se ki lakantite drog ki sa ladministrasyon in reisi kapab ramase ouswa *deal* avek, pandan sa 2an edmi Mr Speaker, i enkrwayab konpare avek oparavan.

Mr Speaker, lontan ou pa ti tande bokou dav in ganny atrape. Me ozordi Mr Speaker, ou tande poudir i annan plizyer dav ki pe fer bann trafik drog ki'n ganny atrape. Ou demann ou lekor, be sa bann, sa bann satelit sirveyans pa ti pe marse sa lepok? Ki ti pe arive avek sekirite pei sa lepok Mr Speaker?

Mr Speaker, an menm tan mon rapel ki anba ansyen ladministrasyon sa size *community policing*, i en size ki plizyer Lasanble oparavan in koz lo la en kantite. Me Mr Speaker mon pou dir ou nou pa'n vwar gran amelyorasyon. E ozordi osi nou pe vwar poudir i annan bann defi.

E parey loter Mosyon pe dir, parmi lezot Manm ki'n koze si pa enplimant bann *camera* sirveyans dan bann kominote dan bann landrwa ki neseser, i pou ed lapolis pa zis lapolis me kominote an zeneral pou kapab

ofer serten sirveyans. E Mr Speaker, petet mon a demann lafors lapolis pou eksplik dimoun osi ki zot osi zot form parti brans sirveyans.

Akoz ozordi nenport sitwayen i kapab *apprehend* tyonbo en dimoun, pe enform lapolis pou li vin fer sa bout ki sivilyen pa sipoze fer. So, Mr Speaker i annan en ta keksoz ki ozordi nou kapab koz lo la. Me selman pwen prensipal se ki nesesite ozordi pou annan *camera* sirveyans, in vin avek devlopman e evolisyon dan lafason ki konportman serten bann dimoun dan kominote zot pe fer.

Mr Speaker, i bon dir osi ki met *camera* kot bann lakaz i pa fek komanse Mr Speaker. Bon pe dimoun ozordi avan ki sa Mosyon i vin dan Lasanble, bon pe dimoun zot pe met *camera* sirveyans lo zot propriyete, bann ki kapab *afford*.

E Mr Speaker, mon asire ki i tant osi bann lezot dimoun ki santi zot lavi menase, ouswa zot propriyete menase pou zot pli tar dan lavenir atraver zot zanfan ki pe aprann etidye ganny en bon plas travay, dan lavenir zot kapab zot osi ed zot fanmir met *camera* sirveyans.

Mr Speaker, de lot kote *LDS, US* pe fer bann *door to door*

*visit* Mr Speaker. Be si nou pe koz *nation-building* Mr Speaker. I annan serten bann fraz ki ganny dir e ou demande par fwa si vreman bann politisyen zot annan bann azanda komen pou *nation-building*. Kot nou pran bann desizyon pou nou enn pa konpromize lo la Mr Speaker.

E koman en pti pei sa size lavi ser, parmi plizyer keksoz Mr Speaker, i pou en size ki pou reste la. Ler ou pran an konteks bann lafors ki enfliyans bann tel size parey lavi ser, kou lenportasyon ensidswit. E Mr Speaker mwan ki mon fer letan mon annan en konversasyon avek bann rezidan. E letan zot met sa bann size devan mwan mon demann zot kestyon.

Mon eksplik zot e fer sir ki zot osi zot partisipe, e sey konpran. Me mon pa war sa difisil. Letan ou pe eksplike sa dimoun ki fason ki keksoz i marse. So, Mr Speaker an menm tan mon pou lans en lapel avek tou sitwayen ki nou bezwen donn koudmen lapolis.

Mr Speaker, la mon ti a kontan felisit Mr Christophe Lespoir avek son lekip ki'n kre sa *platform Crimes Watch*. Mr Speaker, ozordi bokou dimoun pe anvi annan lapartenans avek sa. E i pe ed bokou lapolis dan deteksyon e prevansyon bann aktivite kriminel. Mon oule osi

profit sa lokazyon pou felisit sa group *Crimes Watch* La Misère, Fair View ki pe osi Mr Speaker zwen en rol enportan. E i enkrwayab dan lafason ki zot pe kapab ede, pou anpes ouswa aret bann voler dan kominote.

Mr Speaker, avek sa 2 mo mon anvi dir avek Onorab Adelaide ki, size son Mosyon i annan son merit. I pou ed lotorite dan son bann plan stratezik, pou vwar ki fason e ki kote i pou ale avek met an plas bann *camera* sirveyans dan distrik. I pou ed bann antreprenner bann *businessmen* dan kominote osi, ki anvi protez zot lentere pou bouz dan sa direksyon bann ki pa ankor fer li.

Mr speaker, i pou osi ed sitwayen pou pans lo sa teknolozi avek devlopman, sirtou nou konnen ki nou bann zenn ozordi se sa zenerasyon vreman ki pe pouse, pou fer sir ki zot ganny bann nouvo e *latest* teknolozi pou zot kapab fer fas avek bann *challenge* e difikilte.

An menm tan Mr Speaker avan terminen mon anvi dir osi ki wi mon dakor avek plizyer Manm ki'n dir poudir sa laspe kard legal nou bezwen fer sir, akoz mondyalman i annan serten lenkyetid par serten sa bann dimoun ki'n devlop sa

bann kalite teknolozi. E la nou pe refer avek *artificial intelligence* Mr Speaker.

E i pou bezwen annan pli bon kordinasyon par bann diferan *manufacturers*. E an menm tan pou fer sir ki ler nou pe koz lo *cybercrime* Mr Speaker, sa i bann keksoz ki toultan par deryer nou lespri ki trakas nou. Akoz si nou pa vey byen, i kapab al an deor kontrol. Avek sa 2 mo ankor Mr Speaker, mon anvi reasir Onorab ki mon pou donn li mon sipor. Mersi.

**(APPLAUSE)**

### **MR DEPUTY SPEAKER**

Mersi Onorab. Mon pou apel Onorab Pillay aprezan.

### **HON SEBASTIEN PILLAY**

Mersi Mr Speaker. E bonn apre midi tou koleg Onorab. Mr Speaker, Mon'n ekout atantivman bann deba ki'n pase lo sa Mosyon. E mon bezwen dir mon'n vwar bann diferan eleman enteresan dan sa deba. E i enportan osi pou mwan ganny loportinite pou aport mon kontribisyon parey tou lezot dimoun in fer.

Mon pou swiv en pti pe sorti kot entervenans ki'n koz fek fini koze avan mwan. Premyerman mon'n note

atraver ou Mr Speaker, son komanter ki lo nou kote latab in servi plizyer manda. E nou remersi ou pou ou servis, ki nou'n donnen letan ou ti lo nou kote latab. Ou servis ki ou'n donnen depi ki ou'n en Manm nou parti, ou'n en manm milisya ki Onorab Woodcock in fer referans lo la. Ou avek Onorab Porice in osi bann manm milisya.

Zot in form diferan par diferan kad dan nou parti. E i enteresan pou vwar ki ozordi, ou lo en lot kote latab. Me ou pe fer ou kontribisyon parey ou ti fer lo ou ti lo nou kote latab.

Mr Speaker, sa bann komanter ki'n ganny fer a legar plizyer keksoz, i bann komanter ki arive letan ou ganny bann deba, e sirtou ler ou annan en serten laenn. E mon bezwen dir mon pa ganny en konpran Mr Speaker.

Mon bezwen pran parol Onorab Gill ti servi, ki si i annan en Onorab ki koz bokou, me ki pa dir bokou e ki bokou zabitan Grand Anse Praslin i dakor avek sa, se Onorab Woodcock Mr Speaker.

Atraver ou mon dir ou sa Mr Speaker aköz mon note ki pandan ki in koze in fer referans ek en *case* ki *subjudice* Ankour. E in aköz lezot Manm

Lasanble voler, e okenn ka dan sez anler person pa'n aret li.

E apre tou dimoun an deor i a vire i ava dir pou dir i annan larogans, i annan latak, i annan diferan keksoz ki ganny dir dan Lasanble Nasyonal. Mon ti a kontan tou dimoun ti a note ki mon ton i vremen *neutral*, mon pa pe akiz personn. Mon pe fer refleksyon lo sa ki'n ganny dir. E i enportan pou mwan adres serten pwen ki'n ganny dir.

Par egzanp voler, wi ou dan Gouvernman ozordi. So, si ou war okenn dimoun ki'n vole anmenn zot Ankour e pran aksyon. Aret koze, aret rabase! Aköz ou kontinyelman apel ou kanmarad voler, kan voler i monte desann i tir portre avek ou Prezidan. Sa ou pa dir naryen, portre in sirkile partou.

E en lot keksoz ankour, ler ou koz lo ka ki Ankour zarm e dimoun ki afilye avek *United Seychelles*. Me i annan dimoun la anndan ki'n afilye avek ek sa bann dimoun osi. Konmsi mon krwar i enportan ki nou bezwen aret en pti pe *childish* dan nou deba. E lev deba lo en nivo ki *deal* avek sa size.

Par egzanp ler nou koz lo sa ki'n ganny dir lo kriminalite. Me mon krwar mon pe get *verbatim* devan mwan. Sa ki Minis Fonseka ti dir e non pa Komisyoner sete sityasyon

kriminalite dan pei i alarman. Alarman! So, ki mannyer en Onorab avek tou respe ki mon annan pou Lasanble, i kapab vin dir avek Lasanble ki kriminalite 2022, 2023 i pli ba ki zanmen i deza ete?

I fer lapenn pou war ki nou pa fer nou resers, e nou pa fer nou travay. *Verbatim* i la pou konfirman e sa in pas lo *SBC*. E sa ki pa'n arive se ki personn pa'n port latansyon lo sa ki Minis Fonseka in dir, akoz ankor enn fwa Leta pe sey rod tou fason pou anpes larealite ganny met devan popilasyon.

Tou statistik - Biro Statistik i montre ki lakantite krim in ogmante dan tou bann kad, tou statistik in montre. Kestyon ki sa kote latab ti pe poze otour sa Mosyon, sete pa son merit sa Mosyon. Me sete bann lezot faktor ki sa Mosyon pou anmennen, ki nou ti a kontan ki mover Mosyon i konsidere.

Ti napa rezon pou al dan en bann latak ki pa neser, e ki pa'n anmenn nou okenn par, nor kontribye okenn keksoz an plis atraver sa Mosyon Mr Speaker. Mr Speaker, i korek ki wi fleo drog i en fleo ki pe ravaz nou pei e ki pe met en kantite presyon sosyal lo nou pei, me annou *face the fact*, ki ozordi nou ganny diferan versyon lo

lakantite lasezi drog ki'n ganny fer.

E kontrerman ki sa ki Onorab William in dir ki mon pa dakor avek, Prezidan i dir nou drog i 1000 tonn drog i 3mil met profonder. Oubyen nou vini nou war lasezi i montre zis bann sak ki'n kouver, nou pa war ki annan dan sa bann sak!

Tousala i bann keksoz ki montre poudir gouvornman i devret vin pli transparan e toleran pou *allow* kestyon e pou les bann keksoz ganny diskite e ganny dir.

Sa ki mon pe war ozordi Mr Speaker, se ki Lasanble Nasyonal i ankor enn fwa montre mwan ki ti annan loportinite atraver *PNQ* ki mon ti anmennen pou met presyon lo Minis zisteman pou anmenn sa size, me ki pa'n ganny fer. Annou regard en pti pe bann *statement* ki'n ganny fer ozordi bomaten.

Onorab Roucou, atraver ou Mr Speaker i dir "lapolis in fer konnen konsern lo kote son *manpower*" me Onorab Roucou Minis ti vin la, en sou kestyon i pa ti demande.

Onorab Monthy atraver ou Mr Speaker in eksprim menm konsern, en sou kestyon i pa'n demann Minis.

Onorab Naidu, in dir mankman resours imen plizyer

defi pou nou adrese. Ankor enn fwa en sou kestyon i pa ti demann Minis. Menm ler Minis ti fer en *statement* ki lakantite krim dan pei i alarman, zot kote latab ti bat lanmen. Zot ti bat lanmen, i lo rikord, i lo CCTV, i lo *camera* Lasanble.

Kestyon i pa zot, kestyon i se ki zot bezwen annan en lapros kot zot pa kapab regard en size an izolasyon avek totalite sa size.

Premyerman nou ti adres sa size kestyon *camera* atraver en kestyon ki Onorab Desheila Bastienne ti anmennen. E la mon soke mwan, mon annan en Mosyon mon ki'n ganny bloke, akoz in dir poudir i pe debat en size ki'n deza ganny konsider devan Lasanble.

Me kestyon Onorab Bastienne ti en size *camera* e Onorab Esparon ti anmennen menm size. E sa Mosyon in *still* ganny admet lo *Order Paper*. Pa ki mon kont son Mosyon ganny admet. Mon pe kestyonn lezitimite bann prosedir Lasanble dan lafason ki i ganny aplike avek en kote latab avek en lot kote.

E dan bann repons lo kestyon ki Onorab Bastienne ti demande, ki ti bann kestyon pertinan, Minis ti eksplike ki manner zot pe ganny difikilte pou zot antreprann sa

*revamping of bann camera* dan bann landrwa piblik.

E enn bann keksoz ki mon'n note ki Onorab Adelaide in dir, kot in mansyonnen ki menm atraver bann *camera* ki en dimoun pou mete kot son lakour i pou kouver en landrwa piblik.

Prezan atraver sa, mon'n al fer mon resers pou mwan regarde ki konteks legal ki nou pe antre ladan. Sa ki mwan mon'n war, e sa ki mon konpran baze lo resers ki mwan mon'n fer, i annan en Lalwa ki *deal* avek kot ou kapab servi levidans en *camera* dan en *case*.

E sa se *Evidence Act*, son seksyon 15(1) e son seksyon 15(11). Me sa ki mon'n war dan bann *case* Ankour ki'n pase, diferan *case* i enterpret serten eleman sa levidans dan diferan fason. Par egzanp, dan bokou ka dan sa *CCTV footage*, sa dimoun ki vin komet sa lofans in kouver son figur.

E lefe ki nou napa bann *software* sofistike ozordi parey lezot pei i annan, ki sey fer servi bann teknolozi pou regard fizyoloji en dimoun pou sey idantifye li. Sa levidans pa ganny admet.

Dezyenmman, akoz nou *Evidence Act* pa ankor ganny amande pou enkli *CCTV footage*

me i enkli, i fer referans avek en *computer*. E anfen kont sa *storage* sa lenformasyon i pou dan en *computer*. Sa ki Onorab Cosgrow ti pe dir, se ki sa Mosyon pou inevitableman anmenn en nesesite pou revwar kad legal ki bezwen vin avan sa ki sa Mosyon pe demande.

Sete sa enn bann premye pwen kardinal ki ti annan otour deba ki nou'n anmennen lo sa kote latab. Rezon akoz nou'n anmenn sa deba, akoz ler nou regard bann *case* ki'n pase devan lakour. Mon pou lir en zizman la avek Lasanble kot sa zizman i dir, Sef Ziz i dir dan sa zizman "*the only complaint to my mind shows that there are over and above ordinary usage of their immediate neighborhood areas ... and a CCTV camera that points directly onto the bedroom of the defendants*" sa i en *case* Ankour.

So, Sef Ziz ti fer en dimoun tir son *camera*, akoz lafason ki ti vire i pe vir lo lasanm en dimoun. Alors si nou pou demann en sitwayen pou met plis *CCTV camera* kot li, i pou bezwen ganny fer dan en paramet legal. Kot sa *camera* pou vire i pou bezwen respekte serten lord.

E lefe ki nou pa ankor etabli sa bann norm - lefe ki nou pa ankor etabli sa bann

norm, se pou sa rezon ki i en pti pe prematire pou nou al dir ek dimoun investir dan plis *CCTV camera*. Se sa enn bann problem ki egziste avek sa.

Dezyenmman Mr Speaker, annou regard en lot premis legal ki konsern nou Konstitisyon e dwa *right to privacy*. Nou *right to privacy* i sa *sacrosanct* - i en drwa fondamantal. I pa en dwa ki kapab ganny anpese.

Me Konstitisyon i prevwar ki en Lalwa dan lentere piblik, i fer serten keksoz an relasyon avek ou *right to privacy*. E se pou sa rezon par egzanzp ki dan landrwa piblik ou kapab met en *camera*.

Akoz dan landrwa piblik ou aksyon ki ou fer i bann aksyon ki an piblik. Mwan mon krwar ki si nou pe bouz dan sa direksyon, enn bann keksoz ki nou merit pe demande se ki lotorite konsernen, parey lezot lotorite dan bann lezot pei in pran sa responsabilite pou zot met plis *camera* dan bann landrwa piblik.

Me la i vin en kestyon, se eski nou pou kapab fer konfyans lotorite avek sa *footage* sa *camera*, kan in annan lenstans ki lapolis li menm in determinen kot *camera* in ganny kase par bann dimoun ki sipoze pe fer

sirveyans? I lo rikord. Sa Mosyon i en Mosyon ki anmenn avek li lezot konotasyon ki ou bezwen konsidere.

E koman en Lasanble, nou bezwen fer en deba balanse. Nou pa kapab nou tou vot pou en Mosyon zis aköz nou siport en kote latab. Semenn pase nou ti annan en Mosyon lo dezabilite anmennen par Onorab Zialor. E tou Manm lo sa kote latab ti siport sa Mosyon. Tou Manm ti koz an faver e pozitiv atraver sa Mosyon.

Sa Mosyon ki la napa naryen pou fer avek sa kote e zot kote. I annan pou fer avek serten eleman ki zot pa pe vwar, aköz tou dimoun in ralye dernyen en sel pozisyon savedir pou siport sa Mosyon, aköz i sorti lo nou kote latab. Napa naryen mal ek sa, sa i zot pozisyon. Me nou osi nou annan dwa annan nou pozisyon. E nou'n eksprim nou pozisyon san maltret personn, san atak personn.

Mr Speaker, en lot pwen ki nou bezwen met an perspektiv. En lot pwen ki nou bezwen met an perspektiv se an relasyon avek kou sa bann *camera*. Teknolozi i fer ki ozordi sa bann *camera* i diferan pri. E ki en dimoun pou bezwen aste sa bann *camera*. Mon konpran ki i

pa vedit ki mosyon i pase ki tou dimoun i pou bezwen al aste *camera*, i pa sa ki pe ganny demande lo sa Mosyon.

Me nide ki serye la, se ki nou enn bann lenstitisyon gouvènanans pei, ki 3enm brans gouvènanans pei. E ler nou pe pronons nou lo en size nou dekoul en persepsyon, en lopinyon piblik. E mon konnen i annan dimoun ki annan en lopinyon en pe pli ferm, lo lafason ki nou deal ek kriminalite. E i fasil pou annan en lopinyon pli ferm ler nou *deal* ek kriminalite ler i pa konsern nou. Ler konsern pe arive ek lezot dimoun, oubyen ler pa nou ki bezwen pran sa desizyon lo lavi en dimoun.

Par egzanp mon'n war deba kot i annan dimoun pe koz lo re-entrodwir *death penalty* dan nou pei. E sa i pou al kont nou *Fundamental Chart of human rights, the right to life*. Malgre ki i annan dimoun ki pa pou dakor avek sa me *the right to life* i aplik pou tou dimoun.

E koman Lezislater se nou ki bezwen pas bann Lalwa pou asire ki bann Lalwa i regard dan lentere tou dimoun, anliny avek sa konstitisyon ki nou'n sermant lo la. Alors nou kapab koz lo pran aksyon ek kriminalite.



Par egzanp ler mon tann koz lo *citizen arrest* ki Onorab William atraver ou in mansyonnen Mr Speaker.

*Citizen arrest* i toultan la, me *citizen arrest* malgre ki ou ava anv'i fer li i pa v'edir *assault and battery*. Ki ler ou'n tyonbo sa dimoun ou bat li akòz la se ou ki pe komet en lofans. Malgre ki mon konpran sityasyon, akòz i annan dimoun ki plant son legim, i plant son fri e en boug i vini i rekòlte pou li apre sa boug i vann li son menm fri o bor semen ler i pase, ki mal.

Me 2 mal pa pou zanmen fer en byen. E se pou sa rezon ki nou bezwen regard dan lafason ki nou met bann *deterrent* ki apropiye me osi nou met ban mezir ki apropiye. Also, Mr Speaker, mon le met devan Lasanble en lot pwen enportan ki mon'n apersevwar, ler mon'n regard statistik ki biro statistik pe donn nou, se ki lapolis in reakte lo plis krim ki'n ganny rapòte avek li, dan plas reakte lo krim ki li in detekte atraver son prop sistenm. E sa i *raise* en konsern pou mwan. Akòz? Lapolis i deza annan en sistenm *camera* an plas. Dan lavil dan bann landrwa.

E plizyer fwa ou tann bann dimoun koz lo serten lofans ki'n arive dan lavil eksetera. Me si

lensidan reaksyon lo krim pou lapolis sipoze kapab detekte li i pli ba, alors eski nou pe fer en proper *monitoring* of sa sirveyans ki vin avek sa sistenm *camera*?

Sa i enportan pou nou konsidere, akòz a lafen dizour ou pou kapab annan ou *camera*, me si ou sistenm legal pa adekwa pou *deal* avek, *then* nou pou dan en problenm. I annan Manm lo mon kote latab ki'n sit legzanp, e mon asire lo zot kote latab osi i annan legzanp kot i annan dimoun ki'n pran son *CCTV footage* in anmenn kot lapolis.

E ankor pe esper en rezilta. Mon pa pe blanm lapolis dan okenn fason me, i en realite of bann *facts* ki nou pe fer fas avek. Wi krim in vin en nwizans sirtou bann krim ki *involve burglary*. Mon ti war en video kot en boug i pase avek en gro roulo fil lo son ledò i desann, en pti moman apre mon war i pe retourn avek kot lakaz sa dimoun.

En lot *video* en boug in ganny tyonbo, en msye pe administre li serten koreksyon vizavi in dir li aret vole. En lot i dir pa pou sa dimoun, in war tel landrwa. Me selman i kler poudir sa keksoz i sorti kot propriyete sa dimoun. Mon pa

ganny en konpran kote nou pe ale.

E se pou sa rezon ki dan bann mezir ki nou pran, annou pa al lo en ekstrenm ki fer nou perdi nou sans, nou sans *rule of law* ki devret ganny enplimante dan nou pei. Se sa nou rol koman Manm Lasanble pou asire ki sa *rule of law* i ganny *maintained*.

Eski Mosyon i annan merit? Wi. Mosyon i annan serten merit. Me eski Mosyon i pe ganny mete dan en fason pou *convey* en desizyon Lasanble? Mon pa pou agree avek Onorab lo la.

Akoz Lasanble son rol se *deal* ek Gouvernman. Si Onorab ti'n met li dan en lot fason, kot i ti'n dir met an plas en *scheme*, oubyen en fason atraver lotorite konsernen, pou *allow* bann sitwayen pou ganny akse. La i ti ava en lot zafer, me la ou pe ankouraz sitwayen pou investir dan lenstalasyon bann *camera*.

Me dan ou prezantasyon ou'n prezant lezot eleman ki en pe diferan avek sa ki ou'n ekrir dan ou Mosyon. E se pou sa rezon ki Onorab Vidot in dir ou i pou ekout ou, pou nou vwar si se sa lentansyon. Akoz si ou pe demann sitwayen pou investir, non i en realite nou bezwen admet ki ozordi, e Onorab

William i annan rezon Mr Speaker ki le 2 group dimoun ki lo teren, se swa lamazorite fwa i plis nou. Me i nou ek zot, se politisyen ki devan laport dimoun.

Napa gard i pa plis gard, i pa sanniter, i pa lezot dimoun. Me i se nou. E ozordi i kler ki poudir ler nou pase nou vwar realite, bokou dimoun pe *suffer* oubyen pe pas dan difikilte finansyel ki pou met en *burden* lo zot pou aste en *camera*. Oubyen ou dir zot aste en *camera*, i kapab antitez, i kapab pa ale avek serten refleksyon ki dimoun pe fer ozordi.

Bomaten menm mon pe get refleksyon lo bann kart bis. I annan dimoun ki konsernen, ki pa dakor avek. Konmsi i annan lezot keksoz ki dimoun i konsernen avek ki pa pou santi ki Lasanble pe tret en size, sa size dan en fason serye. Se pou sa rezon ki nou annan en deba lo en size. En deba i vedir en kote i prezant son pozisyon, lot kote i prezant son pozisyon. E nou deside swa nou pou agree, swa nou pa agree.

E dan ou propozisyon, sa ki enportan dan ou propozisyon ki ou'n mete ki byen se ki *camera* wi, i pou akt koman end *deterrent* kot ou annan li pou anpese ki en dimoun, i dan en

fason *willfully* montre son lekor pou fer en keksoz.

Me par kont, lo en lot kote ou bezwen annan lankadremman legal serye pou protez pa zis en endividi ki met sa *camera*. Akoz li i kapab ganny *sued for invasion of privacy*. E pou protez sa lot dimoun ki son *footage* pou ganny vwar. Zis an pasan Mr Speaker, mon fek vwar en video la apre midi kot i montre detrwa gard avek kot in ariv en aksidan kot en msye pe reakte, ki enteresan.

Tou sa gard la, me i annan tou sa *camera*, ou konpran? So, i montre nou poudir nou annan en kantite travay pou nou fer lo ki mannyer nou adres sa size servi teknolozi, pou nou adres bann defayans ki nou swiv ozordi sirtou ki en realite. E teknolozi pe montre nou en kantite keksoz, i pe ekspoz en kantite keksoz.

Nou'n tann sa odyo ki'n sirkile, ki'n ensit bokou, bokou reaksyon dimoun an relasyon avek komantr ki'n ganny fer atraver lot endividi oubyen en group dimoun. Nou'n vwar lezot *video* par egzanp yer kot nou'n vwar en *video* kot en aksidan ti'n arive. Mwan mon'n war sa *video* kot en dimoun pe filmen an menm tan en madanm pe sey sorti dan sa loto. Sa dimoun pe filmen, mon pa konnen

kekfw a i ki rezon sa bann dimoun ti pe filmen.

Me en lot dimoun ki'n ale pou ed sa madanm, ou konpran? Konmsi, nou bezwen konnen ki mannyer ki zistans nou pou *trust* teknolozi pou fer keksoz pou nou. E ki zistans koman imen nou bezwen *retain* sa kontak imen.

E mwan mon krwar ler mon pe koz lo kontak imen, en eleman enportan, se *community policing* e ranforsi rol ki lapolis pe zwe an relasyon avek *community policing*.

An konklizyon Mr Speaker, mon remerci Onorab pou son Mosyon e loportinite ki'n donn Lasanble pou li debat lo en size enportan. En size ki serye, e mon swete ki i pran an konsiderasyon bann konsern ki lot kote latab in eksprimen, vizavi bann kad legal ki nesaser. Sirtou kan nou konnen poudir toultan i pou annan en *challenge* Ankour.

Akoz nou en sosyete ki viv dapre en serten *rule of law*, e ki dimoun i toultan annan en rekour devan en Lakour. E ki enn bann eleman nou konstitisyon ki pli enportan, se ki tou dimoun inosan *until proven guilty*. Mersi Mr Speaker.

**(APPLAUSE)**

**MR DEPUTY SPEAKER**

Mon annan 2 Manm ki pe lev lanmen. Onorab William, ou annan en ...

**HON WAVEN WILLIAM**

Mr Speaker, mersi. Akoz mon ti a kontan koriz en *misapprehension* e...

**MR DEPUTY SPEAKER**

Anba *Order 61* ou kapab fer sa. *61(d)*. Ki *issue* ki'n leve?

**HON WAVEN WILLIAM**

Sa *statement* ki *Leader* Lopoziyon in dir, ki mon'n deza en manm milisya. Mon krwar poudir in mal fer son resers e *comme d'habitude* i abitye fer sa bann kalite alegasyon. Me ti a bon i *substantiate*, i anmennen en rezis sorti Bel Eau pou demontre si vre mon ti lo lafors milisya. Mersi.

**MR DEPUTY SPEAKER**

Savedir ou pe dir ou pa ti en manm milisya e sa *statement* pa korek? *Ok, very good.*

Onorab Woodcock ou'n lev ou lanmen.

**HON WAVEL WOODCOCK**

Mr Speaker, mon anvi *raise* en *point of order* anba *order 49(1)*.

**MR DEPUTY SPEAKER**

Anba?

**HON WAVEL WOODCOCK**

Anba 49(1). En *point of order* Mr Speaker. Mr Speaker, Onorab *Leader* Lopoziyon pe *mislead the House* e in osi *distort* sa ki mon'n dir. Mon annan la dan mon posesyon levidans poudir dapre dernyen *census* ki *National Bureau of Statistic* in fer, ki nou tou lede kote latab nou ti dan sa *meeting* avek *National Bureau of Statistic*. I montre klerman poudir dapre *census*, lo kote *trends in burglary and theft - census 2010* i montre poudir dan *experienced burglary* ek *theft* ti 16.8 poursan e an 2022 in redwir pou vin 8.9 poursan Mr Speaker; ki klerman montre en rediksyon par anviron 2mil ka Mr Speaker lo *burglary* dan nou pei.

Alor mon santi poudir Onorab *Leader* Lopoziyon pe *mislead the House* la Mr Speaker. Mersi.

**MR DEPUTY SPEAKER**

Mersi Onorab. Ou konnen mon pa anvi ki zot antre dan, li i pe servi en statistik, ou pe servi en statistik. *I just wish* konmsi zot ti kapab evite nonm non kanmarad dan zot bann deba, akoz ou pe fer ou prezantasyon, akfer ou bezwen nonm non en dimoun?

Onorab Pillay ki ou, ou annan en, dir mwan ki ou *point of order*? Ki *order* ou pe vin anba la?

**HON SEBASTIEN PILLAY**

Mersi Mr Speaker. Mon oule koriz 2 *misapprehension* apre *raise en matter of privilege*.

Ou konnen tou bann Manm ki'n koze in koze, mon pa'n *raise* okenn *point of order*. Parey ou dir...

**MR DEPUTY SPEAKER**

Akoz ou pa ti ankor koze.

**HON SEBASTIEN PILLAY**

Manm in ganny drwa eksprim zot lekor. *Ok?* Savedir en Manm ler i koze i bwenm mazine poudir sa ki i dir i osi pou ganny reponn.

Prezan zot in koriz, zot in fer zot koreksyon. Sa ki in dir poudir i pa ti ladan, tousala, laverite pou sorti. Be an se ki konsern *statistics*, mon oule refer Onorab avek *quarter 1-2023*, bann statistik an relasyon avek bann *social statistics* ki lo *website NBS*. Sa bann statistik in sorti apre ki *census* in ganny fer. E sa bann statistik ti ganny konfirman par *verbatim* Lasanble e ki Minis ti menm dir ki to kriminalite i alarman. E sa ti pas lo televizyon dan Lasanble. *Ok?*

Ler ou pe koz mwan statistik *census*, mon ava montre ou statistik ki lo *website NBS* e ou ava vwar ki tou i montre en logmantasyon per around 3.16 pousan, *ok?* So, i enportan Onorab ki ou regard byen bann statistik e ou pran an konteks byen bann statistik ki ou gannyen, Mr Speaker.

E pou lenformasyon Lasanble, mon ti la lo premye prezantasyon bann rapor *census*, mon pa ti kapab vin sa enn. Me mon o fe avek bann lenformasyon ki'n pase dan prezantasyon *census* aköz i en prezantasyon ki mon pran li tre o serye.

Ankor enn fwa Mr Speaker, mon regrete mon'n bezwen nonm non, me aköz i annan serten statement ki'n ganny fer lo legar mon parti, mon group dan Lasanble e i mon rol pou defann zot dan en fason byen e dan en fason lozik. Mersi Mr Speaker.

**MR DEPUTY SPEAKER**

Wi mon krwar ou'n fer le pwen, mersi.

Onorab Sandy Arissol?

**HON SANDY ARISSOL**

Mersi Mr Speaker, in ariv 5er 17. Mon ti a kontan mon osi siport bann Manm lo kote mon parti letan zot ganny akize

oubyen zot dir serten keksoz. Zis parey Onorab William in dir li menm, poudir zanmen in deza en manm milisya e nou lo nou kote nou krwar Onorab William e letan parey Onorab Pillay in dir poudir letan sa rezis ava sorti nou ava vwar. Mon pa konnen kot i ete sa rezis.

Me selman, ou konnen letan nou pe koz lo kriminalite, ou a krwar i en size ki fek arive, en keksoz i fek arive. Si Colin Dyer ti ankor dan nou Lasanble i ti pou komans son lentervansyon par dir le 5 Zen 1977, pei ti antre dan en koudeta. Se la kot pei in antre dan kriminalite e ziska ozordi.

**(APPLAUSE)**

**HON SANDY ARISSOL**

Fodre pa nou bliye sa. Fodre pa nou donn lenpresyon nou pe fer krwar poudir aköz Minis ti vin la, *SBC* in dir nou annan rikord, nou annan verbatim. Kondir ou a krwar bato kriminalite in debarke, ti koste ek *Port Victoria* le 20 Oktob, le 24 Oktob 2020. Non, depi 77. Nou annan rikord la, in fek ganny ankor en volim vin kot Lasanble Nasyonal, kriminalite dan nou pei.

Letan en Gouvernman i vini i dir avek son pep poudir i pou pran ka avek ou depi

nesans ziska lanmor. Be sa pa i fer pep vin pares. Asize fye lo Gouvernman? Letan en Gouvernman i vin i Mr Speaker i dir ek ou koumsa i annan en group dimoun dan pei ki kapab travay, be en lot group li tou le lafen dimwan i desann kot *Welfare*, i ganny en *cheque* e i al kot li i enjoy son *cheque*, mwan prosen i pa travay i ganny en lot *cheque*. Be sa pa i fer dimoun vin pares?

Letan nou met bann zenn lo diferan *scheme*, zis pou tenir zot dan en *corner* aköz ou pou servi zot pou eleksyon. Be sa pa i fer nou bann zenn pa bouze dan lavi. Fer zot vin pares?

Be se sa ki'n anmenn nou pei sa zistans kot nou ete ozordi. E nou, nou'n erit sa. Be nou sa ki nou pe fer nou, be nou pe sey de balans sa.

Letan Lasanble i vini i dir ek ou dimoun i lafen, sanmenm sa dimoun pe vole. Be ou pe zistifye en krim. Jimmy Cliff i dir ek ou "*voler c'est pas bon,*" "*travailler trop dur, oui.*" Be ou bezwen leve. Alpha Blondy, be ou bezwen leve al travay Mr Speaker.

Ou pa kapab zis vini dir ek dimoun aköz ou lafen i al vole. Non, e sa in ganny dir par Onorab Wallace Cosgrow, en ansyen Minis dan en

Gouvernman. La mon mansyonn son non, *ok*?

Nou pa kapab kontinyen fer sa bann kalite *statement* an servan medya nasyonal. La i anvi en *point of order*. *Ok*? Nou pa kapab kontinyen Mr Speaker. Nou bezwen parey Onorab Pillay in dir, nou bezwen vin rezonnab, rezonnab dan nou bann remark ki nou fer.

Nou'n fer 26 meting piblik dan 26 distrik. Napa en zabitan ki'n lev son lanmen anler e ler Prezidan in donn li laparol, "Prezidan mon lafen, ed mwan ganny en pe manzel!" Napa en dimoun ki'n dir sa. Me selman zot kontinyen vini, zwe sa gitar lafen. Dimoun i lafen! Dimoun i lafen! dimoun i lafen! Be lekel ki lafen, be enn ler mon oule krwar zot ki lafen plis ki sa bann dimoun laba deor!

Nou pa kapab kontinyen avek sa bann kalite *statement*.

Letan Onorab Adelaide i vini avek en Mosyon, ekoute ki son Mosyon pe demande;

Pou asire ki Sesel i kontinyen mentenir en bon nivo sekirite, Lasanble Nasyonal i ankouraz plis sitwayen. Akoz i met plis sitwayen? Mr Speaker, ler nou pe koz ozordi, annou al fer statistik, nou avwar kantite dimoun enkli bann Manm Lasanble *US* ki annan *camera*

ek zot lakaz. Plizyer dimoun i annan camera ek son lakaz.

Be Onorab Adelaide pe demande pou ankouraz plis sitwayen pou investir dan lenstalasyon bann sirveyans kamera en pe partou. Akoz? ler ou met sa Mosyon lo latav, savedir Mosyon i pa konstitisyonnal, zizman ki Ziz in donner pa pou annakor. Nou bezwen anmenn en lo. Non.

Onorab Adelaide koman en Manm Lasanble i son rol pou li osi kapab edik dimoun zis parey PUC ti fer. Ou konnen ki PUC ti fer? Ti fer kanpany vin sanz ou glob, vin tir sa enn, anmenn sa enn zonn mon a donn ou enn ki alim blan, *LED* akoz i servi mwens elektrisite, pou ede redwir ou kou elektrisite.

Be eski tou dimoun ti desann pou al fer sa? Non. I annan son glob zonn i ankor dan son lakaz. Ler PUC ti fer promosyon pou annan en tenk delo kot ou lakaz. Vini nou pou donn ou en *scheme* R15mil, ou a pey par morso pou ou kapab anmas en pe delo an ka lasesres. Be konbyen dimoun in fer? Tou dimoun in fer? non. I annan napa okenn, i depan zis lo son rakor ki antre kot li, li.

Letan PUC i kriye i dir ek ou i annan R300 restriksyon,

vin anrezistre, met ou non ou a ganny en rediksyon lo ou kou elektrisite. Be tou dimoun in ale, non. Li ki i ti anvi, i ti anvi sa 300 san son pos.

Be nou bezwen balanse. Mosyon. Kestyon, zot dir ek nou ler Minis i vini nou pa demann kestyon, nou pa dir naryen, nou asiz trankil. Prezan ou a krwar lopoziyon akoz zot in sitan dan Gouvernman, zot krwar zot ankor dan Gouvernman. Zot krwar zot ki pou donn nou lord ki pou fer lo sa kote latab.

Donn lord zot lekor, donn lord zot Manm.

**(APPLAUSE)**

**HON SANDY ARISSOL**

Aret donn lord nou Manm.

Nou, nou dan Gouvernman nou. Ler nou fer nou *caucus* nou kapab zwenn nou Minis, nou kapab zwenn nou *PS*. Nou kapab zwenn nenport ki zofisye Gouvernman ki nou anvi. Nou fer nou, kantmenm zot plennyen zot dir Speaker i vin asiste nou *caucus*. Selman ler zot ti dan Gouvernman zot Speaker ti annan drwa asiste zot *caucus*. Person pa ti pik paviyon ti fer monte pou zwenn lalin. La ozordi zot fer sa. *Ok?*

Tousala zot konplent ozordi. Zot vini zot dir ek nou zot kondann bann latak ki'n ganny fer an relasyon ek *teachers* akoz i en travayer. Selman ler zot Manm i fer latak, zot pa fer okenn renonsman lo la, zot reste trankil. *Ok?* Nou bezwen mazin pei. Parey Onorab Pillay in dir, nou bezwen fer bann *statement* ki konkret. Bann *statement* ki kler an relasyon avek zistifikasyon ki nou fer.

Onorab Wallace bomaten i vini ankor. Mon mansyonn son non ankor. I vini i dir ek nou, nou bezwen fer sir. Veye kote nou met bann *camera* pangar bann *camera* i vwar bann dimoun kot i pase. Ozordi i annan *camera* ki kapab tir laliny lo ou figir, re desin ou nennen, re aranz ou lizye.

Mr Speaker, in mansyonn nou Lasin i annan, Langleter i annan. Be bann *camera* dan lavil la, be pa administrasyon Onorab Wallace ki ti mete sa dan lavil bann *camera*., partou kote?

**(APPLAUSE)**

**HON SANDY ARISSOL**

Lo erport letan ou antre dan pei, be pa administrasyon Onorab Wallace ki ti mete lo erport, *camera?*



Ler ou antre dan *Cabinet* laba, ou antre *State House* dan tou bann baro, pa ladministrasyon Onorab Wallace ki ti mete Mr Speaker? Be ozordi kot sa lafreyer *camera* i vini? Nou, nou pa pe met *camera* pou rode si Ton Jack i desann, si Ton Yo i sorti lo balkon, si Ton Gro i sorti par laport deryer. Nou pa pe met pou sa nou. Nou pa pe met *camera* pou gete lekel ki antre par laport deryer nou.

Nou, nou pe ankouraz endividi pou met bann sistenm *camera* en pe partou, partou pou ki zot kapab ed zot lekor. An menm tan ed zot vwazen.

Letan Onorab Aglae i mansyonnen, i dir ek ou i annan bann *camera* ki anmas lavwa. Mon kontan letan i dir sa mwan. Parske mon rapel li son lavwa ti ganny rikorde e ti ganny zwe. I ti dir poudir i annan en laferm. Son lavwa ti ganny anmase li, mon pa konnen lekel ki ti anmase selman. Mon kontan ler i dir sa. Parski i pe servi legzanp ki ti arive avek li.

Be nou, nou pa pe dir sa an mal. Nou pe anmenn en Mosyon pou ankouraz lepep Seselwa fer keksoz pozitiv. Pozitiv. Pozitiv. E nou, nou kontan e la mwan mon anvi

profite Mr Speaker pou mwan felisit lapolis. Felisit lapolis.

Ler nou ti anmenn lamannman Konstitisyonnèl pou demande ki larme i zwenn lapolis pou fer serten travay, US ti sot anler, zot ti kriy lasasen. Pa Konstitisyonnèl. Landmen bomaten nou sipoze vwar larme lo semen. Ziska ozordi nou pa ankor vwar larme lo semen. Zis akoz zot reakte ek tou keksoz, zot eksit ek tou keksoz e zot kontinyen donn leson an krwayan zot ankor dan Gouvernman. Zot nepli dan Gouvernman, zot in vin en parti minoriter. Minoriter!

**(APPLAUSE)**

### **HON SANDY ARISSOL**

E zot donn lenpresyon poudir dimoun i ekout zis zot. Zis zot ki fer resers, zis zot ki konn dir sa, zis zot ki konn fer sa.

Mr Speaker, ankor enn fwa sa i en bon Mosyon. En bon Mosyon parski koman bann Manm Lasanble i enportan pou nou kontinyen edik nou pep. An vi an menm tan pe edik nou pep, i enportan pou nou pep viv byen. Viv byen ek kanmarad. Pou mwan zet en pti koudey lo ou lakour ler ou pa la. Pou mwan zet en pti koudey lo ou zanfan, Mr Speaker. Parey nou ti viv lontan.

Depi ler nou'n antre anba Sesel 1977 konmsi Mr Dyer la. Le 5 Zen 1977, tou dimoun bef dan disab, sakenn vey son lizye, parski nou'n viv sa kalite lavi. Be la sa ki nou pe dir, se ki dan bann ledikasyon ki nou pe fer, parey ler nou Gouvernman pe kontinyen lager ek drog; nou, nou pa kontan drog. Se pour sa rezon nou Gouvernman pe lager. Menm zot dir statistik pa ti bon, i annan 100 anba delo, i annan 100 anba later. I annan travay ki pe ganny fer ek drog, nou bezwen aksepte e rekonnèt sa travay ki pe ganny fer Mr Speaker.

Nou osi bezwen rekonnèt ki poudir nou bann zenn, nou bezwen, annou arete parski mazorite dimoun ki kriye i dir ek ou i lafen la, son *bill* i ser. Si ou get kot li, i annan 2 fenean oubyen 3 gran fenean pe dormi dan lakaz. I devret leve ed son vye manman.

Mr Speaker, fodre nou arete soutir sa bann kalite dimoun dan distrik. Parey nou'n ganny dir lot kote latab, ler ou sorti kot laboutik toultan i annan en *tenant* la. Napa naryen, fer keksoz. Non! Ozordi nou'n ariv 2023. Nou tou nou bezwen leve al travay pou ki nou a pey sekirite sosyal, nou a met en pti larzan dan Fon Pansyon pou ki i a ed sa

Mosyon ki Onorab Wallace ti pe demande.

Onorab Wallace ti pe rod en kominikasyon. Mon mansyonn ankor son non la. Mon mansyonn son non Mr Speaker. I ti anmenn en Mosyon pou demann en konversasyon. Selman nou'n fer 26 konversasyon dan 26 distrik, i pa'n annan en kouraz pou li vini, pou vin asiste miting, pou vin fer sa konversasyon ki i ti pe rode.

**(APPLAUSE)**

### **HON SANDY ARISSOL**

Konpran?

La mon a esper li, mon a gete anba ki Order i anvi lev son pwen letan mon fini Mr Speaker.

Alor, Onorab Adelaide mon krwar in amenn en Mosyon enportan pou ki nou donn sipor. Ed bann dimoun, envestir. Nou pe ankouraz bann dimoun pou envestir. I annan Manm ki'n dir i ava depan lo pri. Konsernan *tax*, ki mannyer Gouvernman i ava kapab vin ansanm oubyen bann biznes prive. Fodre nou arete ek sa zafer Gouvernman.

Gouvernman ki pou donn delo, Gouvernman ki si ou pa sonny ou zanfan ki pou anmas ou zanfan. Si ou bat ou

madanm Gouvernman ki pou anmas ou madanm pou ou. Si ou bat ou msye, Gouvernman i... *be arrrr!* Nou osi koman en nasyon nou bezwen pran nou responsabilite pou nou dir annou get ki mwan mon kapab fer en kou pou mon pei. Olye toultan nou, nou gete ki nou pei i kapab fer pou nou.

Se pour sa rezon bomaten nou'n tann kof vid. In sey eksplike pa kof ki ti vid, rezerv pa ti servi, lot, lot. Akoz i annan en konfizyon.

Be mon krwar Mr Speaker, nou ki la koman sa Lasanble serye e i annan en bon pe nou bann zenn. Nou, nou bezwen ankouraz nou bann zenn ki la deor pou zot leve, travay, siport nou fanmir. E pour sa ler mon ava pe fini Mr Speaker, mon ti a kontan felisit tou bann zenn. Tou Seselwa ki'n leve travay, pe anbelir son lakour, pe investir kot son lakour. Met son pti miray, aranze, penn fer zoli.

Se sa ki nou anvi. Ler nou pas dan distrik, se sa ki nou vwar. E sa i ankourazan parski nou kontinyen annan sa pti group ki li i zis kale pou vini pou rekolte.

E Mr Speaker, fodre pa bliye si napa reseler dan nou pei pou napa voler. Tro bokou reseler dan nou pei ki pe zis

aste keksoz vole. Sa osi i enportan pou nou koz lo la.

Onorab Adelaide lo nou kote latab parey labitid, nou pou donn ou *full* sipor e mon konnen lot kote osi zot pou donn ou full sipor parske zot vwar poudir i annan son merit parey Onorab Pillay in fer nou konpran. I annan son bout merit dan sa Mosyon, me i ava enportan pou nou letan nou Mosyon in fini pase. Prezan bann prive, tou bann lezot endividi ki pe swiv pou nou rode ki mannyer nou ed nou kominote, nou ed lapolis dan sa travay e osi nou ed nou pei pou avans *de l'avant* avek sa Mosyon ki ou'n anmennen.

E mon ti a kontan Mr Speaker pou mon donn en dernyen konsey mon dalon Onorab Wallace Cosgrow pou mon dir li aret per *camera*. Aret per *camera*, nou pa pou rode kot ou pase, nou pa pou rode kote ou ale dan *weekend*. Zis nou pe dir pou sirveyans la kot sa bann dimoun dan zot lakour prive. Napa naryen pou ou trakase, pou nou get laliny ou figir, si ou sa oubyen si pa pou ki ape pase.

Avek sa detrwa mo Mr Speaker, mon ti a kontan prezant sipor pou Mosyon Onorab François Adelaide *de* Baie Lazare. Mersi bokou.

**(APPLAUSE)**

**MR DEPUTY SPEAKER**

Mersi. Mersi Onorab. Ti dernyen enterven an lo lalis lo sa Mosyon.

*(Interruption)*

**MR DEPUTY SPEAKER**

Ou tin lev ou lanmen pou entervenir lo sa Mosyon ou Onorab. Ok. Ki pwen ou annan?

**HON JOHAN LOZE**

Mr Speaker, mon ti zis port a ou latansyon, pou rezon rikord Lasanble. Akoz posibleman i a perdi apre tou sa kriz ki mon tann in tonbe la.

Dan *speech* Onorab Naidu, in fer sorti en pwen ki mon krwar nou devret prezerve pou fitir diskisyon. In lev kestyon *reform the prison incarceration system*, akoz i posibleman enn bann lakoz pou kriminalite, bann keksoz ki nou pe diskite ozordi.

E li in tous lo kestyon atraver prizon en dimoun i a kapab ganny fer pou fer bann posibleman *travaux*. *But I think we should think about it further* ki posibleman en dimoun i annan *alternative*, konpletman *alternative sentencing* prezan, nou bezwen diskite. Apard al

prizon, konpletman ganny *sentence* pou ou fer ou *travaux*.

So, mon ti pe zis oule port ou latansyon ki i annan keksoz ki'n sorti dan deba ki pe posibleman perdi dan tou sa bann bwarla Mr Speaker.

**MR DEPUTY SPEAKER**

Mersi pou note. Mon rapel sa pwen ki ou'n dir zafer plant fri e vann lari bazar. Wi ou'n dir sa.

Onorab Cosgrow, dir mon ki *point of order*. Anba ki *order* ki ou pe lev en *issue*?

**HON WALLACE COSGROW**

Ok. Mersi Mr Speaker. Mr Speaker, mon anvi koriz en *misapprehension* fer par Onorab Arissol. Mr Speaker, si Onorab Arissol ti pe ekout mwan byen i ti pou konpran.

Onorab Sandy Arissol, si i ti pe ekout mwan byen i ti pou konpran ki poudir mon pa'n dir ki ler dimoun i lafen i annan lakoz kriminalite. Mon'n dir i en annan en kou, relasyon direk ant kriminalite avek lapovrete. Se sa ki mon'n dir Mr Speaker.

E Mr Speaker. Mr Speaker, *comme habitude* Onorab Sandy Arissol, napa naryen gran keksoz pou dir apard zis fer kankan. Sanmenm apre 3an i ankor dan Lasanble e bann koleg retrete

ki'n vin Minis e li i ankor la.  
Mersi bokou Mr Speaker.

**MR DEPUTY SPEAKER**

Non. La ou'n al en pe tro lwen pou ou fer en latak personnel Onorab. Mon ti ava apresye si ou *retract* sa.

(Off-Mic)

**MR DEPUTY SPEAKER**

Wi, be li osi i kapab vire pou dir menm zafer. So, annou evite fer sa bann zafer. So, Onorab Adelaide. Mon priye ki dan ou *summing up* ou remet mwan koman, ki dan Chair la avek lepep Seselwa ki pe ekout ou, lo ou Mosyon. Silvouple.

**HON FRANCOIS ADELAIDE**

Mersi Mr Speaker. Dabor mon ava dir bonswar tou bann dimoun ki a lekout. Ozordi parey nou konnen nou annan en zoli Mosyon ki mon koman Manm Elekte pou Baie Lazare mon'n anmennen apre konsiltasyon mon *caucus*. E mon ava relir ankor en pti kou sa Mosyon pou ki dimoun i konpran ki nou ti pe esey diskite.

Pour asire ki Sesel i kontinyen mentenir en bon nivo sekirite. Mentenir en bon nivo sekirite. Mon pa'n dir poudir nou napa sekirite, *ok?*

Lasanble Nasyonal i ankouraz plis sitwayen. Mon pa'n dir ki napa sitwayen ki pe fer sa. Pou ankouraz plis sitwayen. Avan nou pa'n fors person e la ankor nou pa pe fors person.

Pou investir dan lenstalasyon bann *surveillance cameras* en pe partou kot i nesese pour asir plis sekirite dan nou bann kominote.

Mr Speaker, en Mosyon ki vreman senp e o komansman mon pou remersi tou Manm ki'n pran en pti letan pou koz en pe lo sa Mosyon. Byensir mon pa pou antre dan okenn konfrontasyon avek person. E sa Mosyon osi ti napa okenn parey pe dir bann laliny lo figur parey Onorab Cosgrow in anmennen.

Sa Mosyon i kler e nenport. Menm en manrmay lakres pou konpran ki nou pe demande dan sa Mosyon. Byensir i annan bokou bann bon pwen, bann bon sizesyon ki'n sorti. Par egzanp se petet Gouvernman la ki nou'n demann sitwayen pou *lead by example*.

Petet Gouvernman osi ava trouve kot i kapab antre avek bann *scheme* e bann *incentive* ki pou fer ki pli bokou dimoun i ava santi li kapab pou li kapab ede avek sa kalite desizyon e sa

kalite manev ki nou pe rode, pou nou enstal en pe plis *camera* sirveyans en pe partou dan bann kominote.

Wi Mr Speaker, i annan bann Manm ki'n koz lo bann lankadreman legal. *Of course* Mr Speaker, i pa en keksoz ki Sesel pe envante. Nou annan bokou bann pei ki deza bann sanpyon ladan, e nou koman Sesel nou zanmi avek bokou pei.

E mon krwar si sa i en keksoz ki nou oule *venture* ladan, mon pa krwar i pou difisil pou nou kapab apros bann pei zanmi e petet menm donn bann lekspertiz lo ki manner pou mete, kote pou mete.

Tou sa bann keksoz mon krwar nou kapab rode e mon krwar i a vreman ed nou pei pou nou bouz devan.

Mr Speaker, mon'n anmenn sa Mosyon, petet pa akoz zis mon'n anvi anmenn en Mosyon koumsa. Ler mon kominote i dan problem, problem i pa zis pou mon kominote. Problem i pou mon osi koman zot *MNA*. E ler mon kominote i dan lazwa, i osi en lazwa pou son *MNA*. E ler mon pei osi i dan lazwa, mon krwar i en lazwa pou nou tou la dan Lasanble e ler nou pei i dan problem, mon krwar moman

bann Lasanble nou osi nou santi sa problem e nou esey rod solisyon pou nou kapab adrese, pou ki nou remet nou pei lo sa nivo prosperite.

Mr Speaker, ler mon ti pe dir. Par egzanp nou ti tann Onorab Pillay pe dir wi dan landrwa piblik i *ok* pou nou mete, me dan bann kominote petet i pa tro, tro satisfè.

Me mwan mon anvi demann Onorab Pillay, eski semen piblik dan bann kominote, se pa bann landrwa piblik. So, tousala i bann pwèn ki nou bezwen evalye, nou bezwen fer sir ki nou vreman konpran ki sa Mosyon pe dir.

Parey mon'n dir Mr Speaker. Sa Mosyon i pa en Mosyon ki nou pe fors Gouvernman, me selman nou ti a kontan ki Gouvernman i ekout nou e i antre kot i devret antre. Parey mon ti dir o komansman, sa Mosyon i annan lespas. Akoz ler nou dir en Mosyon se en konversasyon, e byensir nou Lasanble nou pou donn nou pwennvi.

Byensir i pou kre deba la deor dan bann kominote pou zot osi donn zot pwennvi e ansanm nou ava rode ki meyer fason pou nou kapab anmenn nou pei ver prosperite Mr Speaker.

Parey Prezidan Ramkalawan ti dir tou resaman, i pe lans en lapel avek bann Seselwa, menm bann zanmi Seselwa pou nou ede, pou nou investir dan en nouvo lopital. Se, i pa'n dir Gouvernman, me in komans sa linisyativ avek bann dimoun an deor. Setadir bann Seselwa, bann ki kontan zot pei. E sa Mosyon i pe vin egzakteman en pe parey. Nou pe demann tou bann dimoun ki kontan son pei, ki anvi vwar prosperite son pei pou nou rode mannyer nou kapab ede.

Byensir si ou napa larzan, menm ou bann nide, menm ou bann konesans i ava fer pour ki i ava vin en kontribisyon pozitiv ver prosperite nou nasyon.

Mr Speaker, parey mon'n dir, nou oule remerci tou bann Manm ki'n fer en deba lo sa Mosyon. *Espérons* ki nou tou nou'n konpran ki sa Mosyon pe demande e mon espere ki nou tou nou get sa Mosyon pozitiv, kot pou benefisye nou pei an zeneral.

So, Mr Speaker, mon pe soumet sa Mosyon avek Lasanble Nasyonal pou nou kapab pran en vot lo la e parey tou kou nou fer ler nou anvoy en Mosyon, nou oule fer sir ki tou bann detay ki nou'n mete dan sa Mosyon i a ganny

*compile* nou ava anvoy kot bann departman konsernen; kot bann groupman konsernen, pour ki zot osi zot ava ed Lasanble pou nou kapab bouz devan e fer ki nou fer Sesel vin sa pei ki annan bokou prosperite parey mon krwar nou dan Lasanble Nasyonal nou bezwen.

So, Mr Speaker avek sa 2 de mon ava remerci ou pou letan e mon ava petet demann bann dimoun pou, bann Onorab pou siport mwan e donn nou pei sa bon Mosyon ki pou vremen ede e anmennen nou pep ver, parey mon pe dir ankor, mon'n dir 3 fwa e mon dir katriyenmman, ver prosperite. Mersi bokou Mr Speaker

**(APPLAUSE)**

**MR DEPUTY SPEAKER**

Mersi Onorab Adelaide. Alors in ariv ler pou nou pran vot lo Mosyon ki devan nou e Mosyon pe demande, ki dir;

Pour asire ki Sesel i kontinyen mentenir en bon nivo sekirite, Lasanble Nasyonal i ankouraz plis sitwayen pou investir dan lenstalasyon bann *surveillance cameras* en pe partou kot i neser pour asir plis sekirite dan nou bann kominote.

Mon ava demann tou Manm ki an faver pou endike silvouple? Mersi. Okenn Manm ki kont? Mersi Madanm Deputy.

Donk Mosyon ki mon'n fek lir in al koumsa. I annan 18 Manm ki'n vot an faver, okenn Manm pa'n vot kont e 8 Manm in abstenir. Donk sa Mosyon in pase.

Sa i ti dernyen *item* lo nou azanda pou sa Mardi. Ou annan en point. Ki *point of order* Onorab? ou kapab sit ou *point of order*, anba ki *order*.

### **HON SEBASTIEN PILLAY**

Yes, Mr Speaker. *Order 41(1)*. *Order 41(1)* i dir koumsa poudir Lasanble i kapab propoz okenn size pou en deba dan fason en Mosyon ki ava en propozisyon ki ganny mete pou laprouvasyon Lasanble e i bezwen ganny drafte dan fason pou li kapab ki i eksprim en desizyon Lasanble.

Vi ki bann desizyon Lasanble i al kot Gouvernman, sa enn Mosyon pe demann ankouraz piblik, i pa pe demann en antite Gouvernman, eski nou kapab ganny en *ruling going forward*? Si eski nou kapab anmenn lezot Mosyon ki pou kapab demann enport ki antite pou pran en aksyon?

Akoz nou koman Lasanble nou egzers en *oversight* e nou kapab demann en desizyon avek Gouvernman. Ou kapab pa donn mwan ou *ruling* ozordi, me ou kapab eksplor sa aköz vi ki ou *Chairman Standing Order*, i pou en size ki nou pou bezwen dil avek.

Akoz Onorab in demann *compile* bann desizyon sa Mosyon. Me son Mosyon i pa en desizyon pou Gouvernman, i en desizyon pou piblik an zeneral. Alors mon pe sey ganny en konpran lekel ki pou pran desizyon lo sa, pou sa Mosyon. Mersi.

### **MR DEPUTY SPEAKER**

Mersi pou ou komanter Onorab e nou ava.

*(Off-Mic)*

### **MR DEPUTY SPEAKER**

Sertennman ou annan pwen klarifikasyon Onorab.

### **HON SANDY ARISSOL**

Non, mon kontan pwen ki'n ganny leve par Onorab Pillay. Selman an menm tan mon ti a kontan mon osi konnen, bann Mosyon ki adres Gouvernman, eski i annan okenn keksoz sorti kot Lasanble ki al kot Gouvernman zis parey pe



ganny demande. Akoz sa enn pa'n adres Gouvernman alors i annan sa bann klarifikasyon ki pe ganny leve. So, mon krwar i enportan pou nou etabli tousala e met li dan rikord. Mersi bokou.

### **MR DEPUTY SPEAKER**

Ok, sa ki, lenformasyon ki mon annan, nou annan en *unit research* dan Lasanble ki par egzant sak fwa Mosyon pe vini i anvoy nou en dokiman koman bann *talking points* lo Sa Mosyon. Menm zafer, ler Mosyon i ganny diskite, tou bann pwen rekomandasyon ki sorti lo tou lede kote latab i ganny drafte, i ganny *compile* e i al *State House* e *State House* li apre i *pass li on to the concerned Ministries*. E demen nou ava koz lo sa lot laspe ki Onorab *Leader* Lopozisyon in souleve.

Nou'n reste la bokou plis letan ki nou ti devret ozordi, si nou ti'n disiplin dan nou letan pandan nou bann deliberasyon. In ler pou nou al se nou, nou ava rezwenn demen bomaten 9er. Mersi.

**(ADJOURNMENT)**

